

## Ruka Yeng Yesuac Siduc Gombang Ohoec

<sup>1-3</sup> Kunenna Teofiro, profete yeneng yoaç degeç, imocngo botucninau fora fingereç, imocac siduc ohogenduae. Ngicngac yeni hanac hanaheaunacngoc erema kicnginango faka fingereç, imoc hemma yeni siduc gombangac kingangkpekepefora anggeç. Yeni faka fingereç, imocac siduc edenunugeç homacngo imoc hanahema ohogec. Imocac siduc edenunugeç amma ohogec, imoc isinggema hanac hanaheaunac erema fingereç-moc, imoc dindingac arenggema ohogemba naric anudeac negensiai.

<sup>4</sup> Ge yoaç yomoc osoma yoaç kpougenggeç, imocac fora ande, imoc naric negennade.

<sup>5</sup> Yuda bangeçac ngictau Herode yeac nasou Abia ua arenunac womong gareng mong kefec, kpara Dzekaria. Yeac enema kpara Erisabete ye Aronggac fingeçsahe, imohacnac.\*

<sup>6</sup> Ngicngahoc imoc yeri Anutuac kicfu dindingac yombong kecma dedeseriyoac nga singyoac sasawa modacma ikocngira kpac amma kpetiac kefec.

<sup>7</sup> Yeri kufing kefocac amma Erisabetengo sabaha kpac kefu yeri kecma ngicngac yada bic anoc.

---

\* **1:5:** Womong gareng sasawa yeni Moseac dara Aronggac bangeçfora. Yeni Aronggac fingeçsaheunacsac ngac naric megeç.

<sup>8</sup> Nga naso botuc ihai Dzekariango Anutuac kicfu uaarengfora yenigoc ua megec

<sup>9</sup> yeni fakangina modacma merang sesegerec homuna gombunga kpedzereckeude, imocac kpeing kpegec Dzekaria heficgeec. *(Makekeng 30:7-8)*

<sup>10</sup> Heficgeu sesegerec imoc kpedzereckebesonga nasoya hau ye Anutuac womong manau enec. Enu ngicngac habutoa yeni ngadeau numuma nanggec.

<sup>11</sup> Ifi ammagec Kebuac angero mongngo hosuc heiheiac arata, imohai Dzekaria fingecmiec. Fingecmima foiaugeng nanec.

<sup>12</sup> Nga Dzekariango hemma kpidohoma kengec ebiria anu

<sup>13</sup> angerongo yofi edeec, “Dzekaria, ge mi kengecguu, Anutungo nunumuga bic negendac nga enengga Erisabetengo medac mong kpenanggema megenude. Ge kpara Yohane, ifi kpacbesena.

<sup>14</sup> Yeng geac ubangerec nga sogac sogai anude. Nga ngicngac homacngo ye fingerecac amma ifingoc ubangerec negenggecde.

<sup>15</sup> Imoc yofiac, yeng Kebuac kicfu kuneng anude. Amma waing doku me doku seria mong naric mi neude. Ye nonggo heremanaunacngoc Tiri Asu wake wakeagoc amma

<sup>16</sup> Israe ngicngacfora homac wangecyunuu yeni ubangina Kebu Anutungina, yearu merenggecde.

<sup>17</sup> Amma medac ye manggac wangecyunuu ubangina meremma heregoc nambaracfocngina yeneac songo negenggecde. Amma yoackpekpe yeni negen negeng dindingac

meficgeyemmeudeac ua meude. Nga yeng Kebuac kicfu kecma Eriaac onga nga kucfu uaya mekefude. Ifi mekecma ngicngac meefaiyunuu yeni Kebuac kicfu efaima yeac ngicngacfora anggecde.”

<sup>18</sup> Ifi deu Dzekariango angero yofi edeec, “Ni neanna ngicyada nga enenna ifingoc, ye kifaya bic homac ammanu geac yoac dafugeng negemba fora anude?”

<sup>19</sup> Ifi deu angerongo deec, “Ni Gabirie. Anutuac kicfu nanganduae nga ye yengenaoc yoac edegubadeac suenuu hama siduc gombung yomoc edeguduae.

<sup>20</sup> Negennec, yoac deduae, imocac nasoya hau foraya fingerude. Nga ge yoacna imoc mi negens-ingedangac ge yoacga kpac anu ifi kecmana wiac deduaemoc, imocac nasoya hama fingerude. Fingeru wenac imohaingoc yoacgagoc monggoc annade.”

<sup>21</sup> Anu ngicngacareng yeni Dzekariaac tomai namma ye Anutuac womonnu naso herea yombong nanecac kerecgec anggec.

<sup>22</sup> Ifi anggec ye ngadeau mau yoara kpac anu yoac edeyunuudeac obohous yeni bic negentegecgec, “O, ye womonnu emma onga mong hendac.” Kecma ye yoara kpac anu mariangosac faka anec.

<sup>23</sup> Anu Dzekariaac womong garenggac ua nasoya wisickeu ye mama ameau monggoc dzigenema kenec.

<sup>24</sup> Kenu naso mi hereemanu enema Erisabete ye hereagoc amma afo 5 sufusufuu kefec. Kecma yofi negenec,

<sup>25</sup> “Yomoc Kebuac faka mong, yeng neac negensima naso yomohai gamena mesawerema faka yomoc anendac. Nga ngicngac yeneng neac deendema monggoc mi anggecde.”

<sup>26</sup> Anu Erisabeteac afoya 6 ammanu Anutungo angero mong kpara Gabirie sueu Gariraia prowinsiu taong mong kpara Nadzarete, ihai kenec.

<sup>27</sup> Kemma ngac naroang kpara Maria, ye fingecmiec. Maria ye ngic mong kpara Yosefe, yeac enema anude, imoc bic deserigec amma Yosefe ye Dawidiac kiscifunac.

<sup>28</sup> Angerongo Mariaac yofi deec, “Ohec, Kebungo gegoc kecde, wosoefactoayango gearu fedec ubangerec negembesena.”

<sup>29</sup> Ifi deu Maria ye imoc negemma kerectegec kuneng anec, “Angerongo noc wiacac negemma ifi edenude?” imoc negenu obohau negen negeng ua homac meec.

<sup>30</sup> Memanu angerongo yofi edeec, “Maria, ge mi kengecguu, Kebungo geac negenu ngereeande.

<sup>31</sup> Amma negenna, ge sabac mong kpenanggema menade. Amma ge medac yeac kpara Yesu kpachbesena.

<sup>32</sup> Medac imocngo engena yombong anude. Yeng Anutu Engenatoaninaac Medac, yeac kpara ifi kpacgecde. Nga Kebu Anutungo ye kisiha Dawidi yeac ngictauac tatac miu ihai tarude.

<sup>33</sup> Amma yeng Yakoboac kiscifora yeneac ngictau amma nasoya kpac kefude nga amabangeha garenggeude, imoc wisic wisickea kpac feeng kefude.”

34 Ifi deu Mariango angero edeec, “Ni ngicgoc mong mi fedua nga imoc dafugeng fingerudeac denec?”

35 Ifi kpesimiu yofi deec, “Tiri Asungo gearu mau Engenatoaac kucngo geac nokumuc amma kperacguude. Imocac amma sabacga kpetiac fingerude, yeac kpara Anutuac Medac degecde.

36 Negenna, geac areng mocgu Erisabete, ye ngacyada amma sifu medac kpenanggeec. Ngicngac yeni ye kufing kecde, ifi degec nga yeng heregoc anu afoya 6 bic ande.

37 Anutuaru faka kpungge kpunggea mi fede.”

38 Ifi deu Mariango deec, “Negenna, Anutu ye neac minginna imocac ge yoac dedang, imoc naric fingecnembeso.” Ifi deu angerongo wama kenec.

39 Naso mi hereemanu Mariango efaima Yudaiaac sifec bangecfu taong monnu kenec.

40 Kemma Dzekariaac amau emma Erisabete wenacngerec demiec.

41 Nga Erisabetengo Mariaac yoac negenu sabac hereau tarec, imocngo kpidohoec. Kpidohou Tiri Asungo Erisabetearu wakeu

42 ye kunengngoc kpacma deec, “Ge ngac botucninau kenecgagoc nga sabac heregau tacde, ye kenehagoc.

43 Kebunaac nonggeango nearu hau faka yomoc fingecnende, imoc faka kuneng.

44 Negenna, ge wenacngerecyoacga dena kedzancnango negembare sabacngo herenau sogaima yuengyuma andac.

45 Ngac ye Kebungo yoac edeu imocngo fora fingerudeac negensinggeude, ngac imoc ye kenehagoc.”

<sup>46</sup> Ifi deu Mariango deec, “Anutu, ge kicga fima nenna wanac naroangga mamea yombong amma kefai. Imocac amma ubaonganango Kebu hei-wayong anggenu

<sup>47</sup> Anutu memengerecna, ongaasunango geac amma sogaide.

<sup>48</sup> Yeng kingang naroang mamea kecde, imoc hentegecdac nga yofinenggac namma feengkefude, ngicngacareng sasawango negennemma yofi degecde, ‘Ye kenehagoc.’

<sup>49</sup> Kuctoa Minginango fakatoaya kuneng yombong anendac nga yeac kpara kpetiac.

<sup>50</sup> Kisicfunac kisc yeac ewea heimiandae, yeneac witiu yeac ubamangangngo feengkefude.

<sup>51</sup> Nga ngicngac yenang uba negen negengnginaac negenggec engena ande, yenearu kucfakaya mema maria sinema medereyunuu singsararang kpegecde.”

<sup>52</sup> “Ye ngictau kucnginagoc, yeni tatacnginaunac meicyunuma ngic kpac kuneng mong mi mekegec, yeni memiacyunuec.

<sup>53</sup> Nga ngicngac here home homegoc kecdae, yeng yeni yengena wiac gombunga yemmema mewakeyunuec amma finactoanginagoc, yeni ine maringinaw wiac mong mi faima eng sueyunuu kenggec.

<sup>54-55</sup> Anutungo yoara bangecnina Abrahang nga fingecsaheyaac edeyunuec, imoc mi nigeckpeec, kpac. Ye kingangkpekpefora Israe siriha ifiangoc meficyunuma wosoefac ayemmeude.”

<sup>56</sup> Amma Mariango afo harebec isoc Erisabete-goc kecma monggoc ameau dzigene kenec.

<sup>57</sup> Kenu Erisabete ye sabac fingec fingec nasoya wegenu medac meec.

<sup>58</sup> Meu amafora nga yengena arengfora yeneng Kebungo yearu wosoefactoa ammiac, imocac negemma yegoc momoc sogaigec.

<sup>59</sup> Anu uameme 8 ammanu yeni medac sebi tosea herecgegecdeac hama ngic yeneng yeac kpara Dzekaraia, mamaac wase megecdeac degec.

<sup>60</sup> Ifi degec nonggea Erisabetengo kpetarima deec, “Yeaç kpara Yohane kpacbesonga.”

<sup>61</sup> Ifi deu yeneng degec, “Geac arengfocga yenearunac kpac ifia mong mi kpacgec fede.”

<sup>62</sup> Ifi dema yeni maringo faka amma medac kpara merac kpacnide, imocac mama kpesimigec.

<sup>63</sup> Kpesimigec Dzekariango kibi oho ohoac tafe, imocac kpesiyemmeu migec yofi ohoec, “Medac yeac kpara Yohane.” Ifi ohou yeni sasawango kerectegec anggec.

<sup>64</sup> Nga naso imohaingoc Dzekariaac enara anggeu nedzaranga heimerenu ye monggoc yoacdede amma Anutu dengerema kefec.

<sup>65</sup> Anu amafora yeni sasawango kengec anggec nga ngicngac Yudaia sifec bangectoau keçgec, yeni faka fingerec, imocac denegeng amma keçgec.

<sup>66</sup> Nga ye Kebuac kucngo sabacgoc kefec, imocac amma ngicngac siduc negenggec, yeneng yoac imoc negen negenginau faima yofi negemma kpesiemegec, “Sabac imocngo keçma dafi ambe-sande?”

<sup>67</sup> Anu Tiri Asungo sabacac mama Dzekariaaru wakeu, yeng kpefingyoac yofi deec,

68 “Kebu Israeac Anutu kenehebisina. Yeng ngicngacfora nenannu hama witicfunac bic yungec-nunuec.

69-70 Amma ye bicngoc yombong profete yeneac enacfu yoac faiu degecmoc, imoc modacma kingangngiha Dawidi, yeac fingeceaheunacngo ngic mong ebicfunac yungecnunuuu komoc kpenide, ye meficgenemmec.

71 Yeng ngabafocnina kecdae nga ubango ukununuandae, yeneac mariunac mesinunuudeac negenec.

72-73 Nga Anutungo kisicnina Abrahanggoc yoac deserima deec, imoc negensima dzadzahac kpataninga modacma kisicfocnina wosoefac ayemmema

74 ngabafocnina yeneac mariunac mesinunuu kecma kengeha kpac eweheimima kecnide.

75 Kecni kekecnasonina fedesoc, imohai yeac kicfu kpataning nga dindingac kecnideac ifi anemmec.

76 Anu sabacna gennoc waraima Kebuac sing mengerema singa heitumeinadeac amma Engenatoa yeac profete, ifinoc kpacgugecde.

77 Ge yeac ngicngacfora kopocsicngina kpac anudeac kpouyemmenade nga yeni ebicfunac mesi mesi nga komoc kpegecdeac sing, imoc naric negentegecgecde.

78 Nga Anutuninango songo nga wosoefac engena yombong anemmekecdeac ifi fingerude. Yeac songotoayaac kuc imoc wenac isoc erema nenanggaru mama ngicngac

79 kundung manau nga homecac nokumucfu kecdae, yeni mekperagiyunuu nenang ruaec



sinnu kennideac hanianina garenggema sing imoc edzacnunuude.”

<sup>80</sup> Anu sabac ye sebiugeng nga asuu yadiseri amma bangec kisiu kecma Israe ngicngac yeneac kicfu finge te gerudeac nasoac tomai kefec.

## 2

<sup>1-2</sup> Kwiriniungo Siria bangecac gawana kefec, naso imohai Roma bangecac ngictau Sisa Agustongo bangeha bangeha kpacarenggina mengeregecdeac yoc faiu kendarec. Nga osokporeng ua ifia warac mi feec.

<sup>3</sup> Ifi anu ngicngac sasawango kpacarenggina mengeregecdeac taonggina fekenec, imocacsoc kendagec.

<sup>4</sup> Yosefe ye Dawidiac kiscifunac, imocac amma yeng Gariraia prowinsiunac erema Nadzarete wama Yudaia prowinsiu Dawidiac taongbisis kpara Betereheng, ihai kenec.

<sup>5</sup> Nga enembingeha Maria ye hereagoc anu yegoc yerahafoc kpacngira kpacarennu ohogecdeac kenoc.

<sup>6</sup> Yeri ihai kecmaec sabacac finge c finge naso haec.

<sup>7</sup> Anu yeri amatatacfu titinga mong mi feecac yeri ngadeau tacmaec morocmedacngira fingeru Mariango sangohoma ramaburumaka otou ihai faiu keema feec.

<sup>8</sup> Anu toforecfu ramagareng goa yeni Betereheng ama wegenacfu ramafocngina garengyunuma kecgec.

9 Kecmagec Kebuac angero mongngo finge-cyemmeu Kebuac kibikperagitoayango mekper-agiyunuu yeni kengec ebiria anggec.

10-11 Ifi anggec yeng edeyunuec, “Ngeni kengec mi anggec. Imoc yofiac, yaguc yombong ngeniac amma Dawidiac taonnu Messia Kebungina finge-dac, ye ebicnginaunac mesingunuude. Nga ng-icngac sasawa yeac amma ebiriangoc sogaigecde, ni siduc gombang imoc dekperagingemmeduae.

12 Sabac ye merac imoc negenggecdeac ma yomoc ngenmebade, ngeni kemma ramaburumaka otou sabac mong kporucngo birac biranggea feu meficgegecde.”

13 Ye ifi demanu imohaingoc kurumenggac angerohabu kuneng, yeneng finge-cma yegoc namma Anutu dengerema yofi degec,

14 “Anutu ohec, wi kurumennu febeso nga bangecfu ruae finge-beso. Anutungo ngicngac wosoefac ayemmede.”

15 Ifi dema angero yeni kurumennu dzigenema enggec ramagareng yeni yenaocngoc denegeng amma degec, “Betereheng taonnu faka fingeru Kebungo edenunudac, imoc bic kemma henni.”

16 Ifi dema yeni bic kemma Maria nga Yosefe amma sabac oto manau feec, yeni meficyunuma yenenggec.

17 Yenemma angerongo sabac yeac yoac deec-moc, imoc edeyunugec negendacgec.

18 Nga ramagareng yeneng siduc anggec nga ng-icngac imoc negenggec, yeni kerectegec andacgec.

19 Mariango ine faka finge-chaec, imoc hereau faima negensima kefec.

<sup>20</sup> Nga angerongo yoac ramagareng edeyunuec, yeni imoc sasawa fora hemma negemma dzigenema Anutu afec afehe kenggec.

<sup>21</sup> Uameme 8 wisickeu sabac sebi tosea herecgegecdeac nasoya hau yeni kpara Yesu kpacgec. Kpac imoc ye nonggeango mi kpenanggemanu angerongo bic kparec.

<sup>22</sup> Kecma Moseac dedeseriyoac modacma dzuac dzuacnasoac mitikibiu oho ohoya nande, nasongina imoc wisickeu yeni sabacngo Kebuac kicfu fingerudeac Yerusarennu meenoc.

<sup>23</sup> Kebuac dedeseriyoacfu yoac yofi oho ohoya fede, “Waracmedac fingeckecgecdesoc yeni Kebuac kpataning areng.”

<sup>24</sup> Nga sese faibesonga, imoc kebesac yohockang me gomoc gomocmedaha yohockang faibesonga, imoc Kebuac dedeseriyoacfu fede nga yeri imoc modacma mekenoc. (*Makekeng 13:1-2,10-13; Sesememe 12:1-8*)

<sup>25</sup> Naso imohai ngic mong Yerusarennu kefec, kpara Simeong. Ye ngic dindingac amma Anutu eweheimima Tiri Asugoc kefec. Amma ye Israengic yenearu memeseri fingerudeac tomai anec.

<sup>26</sup> Nga Asungo warac yofi deficgema edeec, “Ge mi homemana Anutuac Messia fingeru hennade.”

<sup>27</sup> Nga Yesuac nonggomama yereng dedeseriyoac feec, imoc modacma sabacngira Anutuac womonnu meenoc. Meenec Asungo Simeong bic wangeru womong manau emma

<sup>28</sup> sabac menamma Anutu dengerema yofi deec,

<sup>29-30</sup> “Kebu minginna, ni wanacngicga kicnango

Memengerecga hembadeac denec, imoc bic hend-  
uaac ruaegoc kekecna mewegenena kembade.

<sup>31</sup> Ge ngicngac sasawa yeneac kicfu sing imoc  
bic mengeredang.

<sup>32</sup> Nga yeng bangeha bangeha ngicngac ge mi  
nengensinggudae, yeni mekperagiyunuma kper-  
agingina anude amma ye israengicngacfocga ye-  
neac kibikperagitoa.”

<sup>33</sup> Ifi deu sabac nonggomama yeri yeac yoac  
imoc negemma kerectegec anoc.

<sup>34</sup> Nga Simeongngo kenecyunuma sabac  
nonggea Maria yofi edeec, “Negenna, Israengic  
homacngo medac yomocac amma mayunuude  
nga homacngo yeac amma yacma nanggecde,  
ifi fingerudeac Anutungo meisinggeec. Nga  
ngic homac yeni ye hemma yeac ngaba amma  
deendema ammigeccde.

<sup>35</sup> Ammigecc geac ubaherega ifingoc dzikacac  
beangngo herecgeude. Ifi anu ngicngac homac  
yeneac negen negeng sufuma feec, imoc didiu  
fingerude.”

<sup>36</sup> Anu profete ngac mong kpara Hanna, ye ifin-  
goc womonnu kefec. Ye Fanuereac naroang Aseac  
kisicfunac. Amma ye ngic mema yegoc kifa 7  
kecmanu ewea homeec.

<sup>37</sup> Homeu ye hodzec kecmanu kifaya 84 anec.  
Amma yeng womong mi wawa hadzing toforec  
yaka segekecma Anutu numumikefec.

<sup>38</sup> Kecma naso imohaingoc yenigoc wegena  
namma Anutu dengereec. Dengerema  
ngic Yerusarenggac tembuckekecngina  
fingerudeac tomai kecdacgec, yeni sabacac siduc  
dekperagiyemmeec.

<sup>39</sup> Yosefe nga Maria yeri Kebuac dedeseriyoacngo dede, imoc sasawa andarec wisickeu Gari-raia prowinsiu dzigenema Nadzarete amanginau kemma kecgec.

<sup>40</sup> Kecgec medacngo yadiu Anutuac ubangerecngo yearu feu yeng kuc nga negen negentegec wake wakea meec.

<sup>41</sup> Yesuac nonggomama yeri makekenggac hombang henecdeac kifasoc Yerusareng taonnu engkefoc.

<sup>42</sup> Amma yeni hombanggac faka modacma Yesungo kifaya 12 ammanu yenhafoc hombanggac kenggec.

<sup>43</sup> Kemma kecmagec hombang nasu wisickeu dzigene hagec Yesungo Yerusarennu tarec. Taru nonggomama yereng imoc mi negemma hama

<sup>44</sup> yofi negenoc, “Ye habu yenigoc sinnu kecde.” Ifi negemma yeri uameme mocgu sinnu engkenggec wisickeu Yesu hoforoc. Hofocma tosofocngina nga arengfocngina yenearu yerecgec

<sup>45</sup> mong mi meficgeocac monggoc dzigenema Yerusarennu meficgeecdeac kenoc.

<sup>46</sup> Uameme harebec wisickeu Anutuac womong manau emma Yesu meficgeoc. Meficgeec yeng kpoukpou yeneac botucfu womonnu tacma negengyemmema dekpesi ayemmec.

<sup>47</sup> Amma Yesungo negen negenggoc yombong ngic sasawa yoacngina merenecac yeni kpido-homa imoc wiac engena ande, ifi negenggoc.

<sup>48</sup> Nga nonggomama yereng ye hemma kpido-homa nonggeango yofi edeac, “Medac, ge nocac faka ifia anecmenec? Manggagoc nereng negengyohoc amma hofocgukecdic.”

49 Ifi deu yeng edeyuruec, “Ngeri nocac hofocnudape? Mannango ua mekecde, ua imoc mebadeac denenec, imoc mi negendape me?”

50 Ifi deu yeri yoac imocac obohooc.

51 Nga ye nonggomama yerigoc dzigenema Nadzarete taonnu kemma imohai enacngira tofohoma kefec. Nga nonggeango faka sasawa fingerec, imoc negen negengau faiu feec.

52 Nga Yesungo negen negeng nga kifayaac arennu yadiseri anu Anutu nga ngic yeni yena-hafoc hendzidziegec.

### 3

1 Ngictau Sisa Tiberiongo kifa 15 tatahau bic tackefec. Nga Pontio Piratongo Yudaia bangecac gawana kefec. Kecmanu Herodengo Gariraia bangecac gareng anec nga munea Firipongo Ituraia nga Trakoniti bangecac gareng anec amma Risaningo Abireneac gareng, ifingoc kefec.

2 Ifi kecmagec Hannas nga Kaifa yereng womong garengtoa kefoc. Naso imohaingoc Dzekariaac medac Yohanengo bangec kisiu kefu Anutuac yoacngo yearu haec.

3 Yohanengo Yodang doku noboc noboc bangec fekende, imohai yerecema ngicngac yofi dekperagiyemmeec, “Ngeni kopocsicngina kpac anudeac ubangina dzigeneu mitidoku nadzicbisia.”

4 Profete Yesaiango yoac imoc deec, yeac kibiu yofi oho ohoya fede,

“Bangec kisiu kpakpac mong yofi fingecde, ‘Ngeni Kebuac sing wisima singa heitumegec.

<sup>5</sup> Yeni kperemeng sasawa semegecde nga tikifagang sasawa imoc heitumegecde amma sing gbaring gbaring mengeregec dindingac anude nga sing kopocsiragoc heisorongaigec

<sup>6</sup> Anutungo ngicngac manganaunac mesinunuude, imoc ngiha ngihango hendacgecde.’”  
(*Yesaia 40:3-5*)

<sup>7</sup> Ifi anu ngicngac homacngo Yohanearu kenggec. Kemma doku nadzicyemmeudeac edegec Yohanengo yofi edeyunuec, “Boidzocac gboricfora, Anutuarunac turunga habeso ande, ngeni imohacnac woragecdeac sing fede, merang goroyoac imoc edengunuec?

<sup>8</sup> Imocac ngeni doku nadzicma ubamerenggac siricfu fora meficgebisia. Nga ngeni yofinenggac ngenanggac yofi mi negengemebisia, ‘Abrahang ye bangecnina.’ Anutungo hoc yomoc yenearu faka meu yenearu Abrahanggac bangecfora naric fingegecde.\*

<sup>9</sup> Naka ye bic ic haniau tacdeac ic goa fora gombunga mi anggecde, imoc sasawa heiu kpeu gerecfu ukuyunuude.”

<sup>10</sup> Ifi deu ngicngac yeneng kpesimigec, “Ifi anu neni dafi annide?”

<sup>11</sup> Ifi degec yofi merengyemmeec, “Ngc mongngo ngakpia yohockang mekecde, ye mong hesima ngakpia kpac kecde, ye meficgebese. Nga nenesemengagoc kecde, yeng faka imocngoc ambeso.”

---

\* **3:8:** Abrahanggac bangecfora sasawango kekecseri megecde, israengic yeneng ifi negensinggegec.

<sup>12</sup> Nga takesimeme goa yeneng ifingoc hama doku nadzicyemmeudeac hama degec, “Kpoukpou, neni dafi annide?”

<sup>13</sup> ifi degec Yohanengo edeyunuec, “Ngeni hiedzo megecdeac dengemmegec, imoc mi ferahema sirihausac mebisia.”

<sup>14</sup> Nga wasaingic goa yeneng ifingoc kpesimigec, “Anu neni dafi annide?” Ifi degec deec, “Ngeni godzufaka me ikocfu amma degbedicfu monggarunac hiedzo mi mebisia. Ngeni uanginaac bummekecdae, hiedzo imocsac fengemebesoso.”

<sup>15</sup> Anu ngicngac yeni Messiaac tomai kecgecac amma ubaherenginau negenggec, “Yohane yenoc Messia gedang.”

<sup>16</sup> Ifi negenggecac Yohanengo yofi merengyem-meec, “Ni doku nadzicngemmeduae nga ngicngadenau hade, yeng ine Tiri Asu nga gerec-goc nadzicngemmeude. Nga yeac kucngo neac kuc ferahade, ni ifiango yeac hanitabea witiha yungecbea naric mi ngereeude.

<sup>17</sup> Ye meic meicke saraha mariaua mehama witseuhagoc meic meicke sobengau feu, imoc fima seuha meickema fora mekpedzuc amma ameau faiude. Faima seuha wanggema gerec pisicpisickea kpac, imohai ukuu dzeude.”

<sup>18</sup> Yohanengo yoac siriha homac dema ngicngac dederecge ayemmema siduc gombung edeyunukefec.

<sup>19</sup> Anu ngictau Herodengo ine muneaac ngac kpara Herodia hamangec mema faka mangana goa homac angkefecac Yohanengo faka mangana imocac nonoyoac ededarec.



<sup>20</sup> Edeu Herodengo yoara negemma monggoc Yohaneac ngaba amma witicamau faiec.

<sup>21</sup> Ngicngac sasawango mitidoku nadzicmagec Yesungo ifingoc mitidoku nadzirec. Nadzicma numuma nammanu kurumeng anggeu

<sup>22</sup> Tiri Asungo kebesacac siric amma yearu maec. Mau kurumennunac enacudumeng mong yofi fingerec, “Ge songomedacna, ni gengsongo anggengkecduae.”

<sup>23</sup> Yesungo kifaya 30 ammanu uaya hanaheec. Nga ngicngac yeneng yofi negenggec, ye Yosefeac medac. Nga Yosefe ye Heriac medac

<sup>24</sup> nga Heri ye Matataac medac. Matata ye Rewiac medac nga Rewi ye Merikiac medac. Meriki ye Yanaiac medac nga Yanai ye Yosefeac medac.

<sup>25</sup> Yosefe ye Matatiaac medac nga Matatia ye Amosiac medac. Amosi ye Nahungac medac nga Nahung ye Esiriac medac. Esiri ye Nagaiac medac

<sup>26</sup> nga Nagai ye Mahataac medac. Mahata ye Matatiaac medac nga Matatia ye Semeinggac medac. Semeing ye Yosekeac medac nga Yoseke ye Yudaac medac.

<sup>27</sup> Yuda ye Yohananggac medac nga Yohanang ye Resaac medac. Resa ye Dzorobabeac medac nga Dzorobabe ye Saratiereac medac. Saratiere ye Neriac medac

<sup>28</sup> nga Neri ye Merikiac medac. Meriki ye Adiac medac nga Adi ye Kosanggac medac. Kosang ye Erimadangac medac nga Erimadang ye Eriec medac.

<sup>29</sup> Eri ye Yesouac medac nga Yesou ye Eriedzeac medac. Eriedze ye Yoringgac medac nga Yoring ye

Matataac medac. Matata ye Rewiac medac

<sup>30</sup> nga Rewi ye Simeonggac medac. Simeong ye Yudaac medac nga Yuda ye Yosefeac medac. Yosefe ye Yonanggac medac nga Yonang ye Eriakinggac medac.

<sup>31</sup> Eriaking ye Mereaac medac nga Merea ye Menaac medac. Mena ye Matataac medac nga Matata ye Natanggac medac. Natang ye Dawidiac medac

<sup>32</sup> nga Dawidi ye Isaiac medac. Isai ye Obedeac medac nga Obede ye Boasiac medac. Boasi ye Saraac medac nga Sara ye Nasonggac medac.

<sup>33</sup> Nasong ye Aminadaac medac nga Aminada ye Adaminggac medac. Adaming ye Araniac medac nga Arani ye Hesoronggac medac. Hesorong ye Pereseac medac nga Perese ye Yudaac medac.

<sup>34</sup> Yuda ye Yakoboac medac nga Yakobo ye Isakaac medac. Isaka ye Abrahanggac medac nga Abrahang ye Taraac medac. Tara ye Nahoreac medac

<sup>35</sup> nga Nahore ye Seruguac medac. Serugu ye Ragauac medac nga Ragau ye Peregeac medac. Perege ye Ebereac medac nga Ebere ye Seraac medac.

<sup>36</sup> Sera ye Kenanggac medac nga Kenang ye Arapakisaac medac. Arapakisa ye Senggac medac nga Seng ye Noaac medac. Noa ye Rametac medac,

<sup>37</sup> nga Ramec ye Metuseraac medac. Metusera ye Enokoac medac nga Enoko ye Yaredeac medac. Yarede ye Maharareac medac nga Maharare ye Kenanggac medac.

<sup>38</sup> Kenang ye Enosiac medac nga Enosi ye Seteac medac. Setengo Adanggac medac nga Adang yeng

ine Anutuac medac.

## 4

<sup>1</sup> Anu Tiri Asungo Yesu mewakeu Yodang dokuunac dzigene eremanu yeng bangec kisiu wangeru kenoc.

<sup>2</sup> Yesungo ihai kemma kecmanu uameme 40ac manau mangana minginango ye tobanggeec. Tobanggemanu imohai Yesungo yakaya kpac kecmanu uameme 40 wisickeu hereaac homeec.

<sup>3</sup> Hereaac homema kecmanu mangana minginango edeec, “Ge Anutuac medac kecnecfu hoc yomoc dena imoc ic sogong anu.”

<sup>4</sup> Ifi deu Yesungo meremmiec, “Yoac yofi oho ohoya fede,  
‘Ngicngo ic sogonggacsac mi kefude, kpac.’”  
(*Dedeseri 8:3*)

<sup>5</sup> Ifi deu yeng Yesu bangecbuma monnu wangep enu piratac isoc fingeru bangeha bangeha gawamangnginagoc edzahema

<sup>6</sup> deec, “Bangeha bangeha yomocac kibikperagia nga imoc garenggebadeac kuc bic nenggec. Nga ni imoc ngic mong me mong mibadeac kuc fenende.

<sup>7</sup> Imocac ge eweheinennadeu ni imoc sasawa waba geac andarude.”

<sup>8</sup> Ifi deu Yesungo yofi meremmiec, “Yoac yofi oho ohoya fede,  
‘Ge Kebu Anutuga mocgu eweheimima kingang kpemibesena.’”  
(*Dedeseri 6:13*)

<sup>9</sup> Ifi deu yeng Yesu monggoc wangecma Yerusarennu kemma Anutuac womong imocac oda herea wi yombong nande, imocac bumau faiu

nanu edeec, “Ge Anutuac Medac fora kecnecfu geanggaoc yomohacnac yuma kemena.

<sup>10</sup> Yoac yofi oho ohoya fede,

‘Ye angerofora uayoac yemmeu yeneng ge sing sawa kengkecnec, imohai garenggugecde.’

<sup>11</sup> amma

‘Ge haniga hocngo heibacac yeneng maringina witiau faiguma sesehegugecde.’ ” *(Mitiyegec 91:1,12)*

<sup>12</sup> Ifi deu Yesungo deec, “Yoac yofi dedea fede,

‘Ge Kebu Anutuga faitobannu mi faibesena.’ ” *(Dedeseri 6:16)*

<sup>13</sup> Ifi deu mangana minginango faitobang ammidaru wisickeu wama kemma naso monggac tomái kefec.

<sup>14</sup> Anu Tiri Asungo Yesuaru wakema feu ye Gari-raia bangecfu monggoc dzigeneu bangec fekende, imocac ngicngac sasawango siduha negendagec.

<sup>15</sup> Nga yeng kpekpeturang amanginau emma kpouyemmeu ngicngac sasawango dengeregec.

<sup>16</sup> Anu Yesungo yadi yadibangeha Nadzarete, imohai kemma kpekpeturang amau engande, faka imoc modacma ihai enec. Emma mitikibi osoudeac nanu

<sup>17</sup> yeni profete Yesaiiac kibi kpou kpouya migec ye imoc yungecma kibi yuac yofi fec, imoc meficgeec.

<sup>18</sup> “Kebuc Asungo nigoc kecde nga neng ngicngac makpekpea siduc gombang edeyunubadeac Kebungo dzimbonga nadzicnenec. Ngic witicfu kecdae, yeni witicngina kpac anude nga kicpiscngo kicfifi anggecde, imoc edeyunubadeac

yeng suenuec. Suenuu hama ebigoc  
kecdae, yeni ebigina meickema  
wangecyunubade.

<sup>19</sup> Nga Kebuarunac naso gombunga hangem-  
meude, imoc ifingoc dekperagibade.”

(Yesaia 61:1-2)

<sup>20</sup> Yesungo kibi imoc monggoc kpouma kibigareng  
miec. Mima mataru kpekpeturang amau ngicn-  
gac tacgec, yeni kicgina yearu sasawa fidagec.

<sup>21</sup> Figece yeng yofi edeyunuec, “Yoaac mitikibiu os-  
oba negendau, imocac fora yaguc hafoangoc fin-  
gecngemmede.”

<sup>22</sup> Nga yeac enacfunac yoaac dedea imocngo  
wosoefac nga kuhagoc anecac ngicngac  
sasawango yeac negenggec naric anu kerectegec  
amma yeac kpesiemegec, “Ngic yomoc ye  
Yosefeac medacngo ifi dede.”

<sup>23</sup> Ifi degec Yesungo yofi edeyunuec, “ ‘Dota,  
ge geanggaoc mengereemena.’ Yoaac heihei imoc  
fede nga ngeni imoc bic edenubeso andae. Amma  
monggoc yofi, ‘Ge Kafanaung taonnu ua mena  
siducga negengandimbe, imoc yei bangecgau ifin-  
goc mena henni.’ ”

<sup>24</sup> Dema monggoc torokpema deec, “Foracngoc,  
profete mong ye yengena bangecfu kenu ngicngac  
yeneng naric mi hoanggegecde, imoc edengunud-  
uae.

<sup>25</sup> Eria bic kefec, naso imohai Israe bangecfu  
ngac hodzec homacngo kecgec. Kecmagec kuru-  
meng nagu heiu kia mi kpeec, kifa harebec nga afo  
6 bangec imohai boditoa fingerec.

<sup>26</sup> Fingeru Anutungo Eria sueu Israe ngac ye-  
nearu mong mi kenec. Nga ye Sidong bangecac

Sarepac taonnu ngac hodzec mong kefec, yearu sueec.

<sup>27</sup> Nga profete Erisango Israe bangecfu kefec, naso imohai ngicngac homacngo kukuserigoc kecgec, yenearunac mongngo mi ngereec, kpac. Nga Siria bangecfunac ngic mong kpara Naimang, yengsac ine ngereec.”

<sup>28</sup> Ifi deu ngicngac sasawa kpekpeturang amau tacgec, yeni imoc negemma herengina buu

<sup>29</sup> yacma Yesu igockema meickema taong ngadeau kemegec. Kemema taongngina tikiu tarec ihai hofe mong nanec, imohai kemma ukugec kemeudeac negemma wangecma kenggec.

<sup>30</sup> Kenggec, yeng ine ngicngac botucnginau ned-ereyunuma kenec.

<sup>31</sup> Yesungo Gariraia bangecac taong mong kpara Kafanaung, ihai kemema sabata nasou ngicngac Anutuac yoac kpouyemmeec.

<sup>32</sup> Nga yeac kpoukpoungo ngicngac uakibi mekecdae, yeneac siricfu kuhagoc yombong ngicngac yeneng imoc negenggec engena anec.

<sup>33</sup> Amma kpekpeturang amau ngic mong yafing seuhagoc kefec, yeng yoac kuhagoc kpacma deec,

<sup>34</sup> “Ah, Yesu Nadzaretenc, neneac wiac imoc geac mi ande. Ge memanganenununadeac hanec me? Gensiduaenoc, ge Anutuac kpetiac ngic.”

<sup>35</sup> Ifi deu Yesungo yafing yoac seria ammima yofi edeec, “Ge waickema ngicfunac erema kenna!” Ifi deu yafing ye ngic kpefaheu botucnginau makpeu yearunac erema kenec. Nga ye ngic imoc mong mi memanganec.

<sup>36</sup> Ngicngac sasawango imoc hemma kerectegec amma denegeng amma degec, “Ye noc yoac mekecde? Ngic yomoc ye kuc mimia nga kuhagoc yombong, yeng asu seuhagoc edeyunuu erema kendae.”

<sup>37</sup> Ifi fingeru Yesuac siducngo bangec imocac tegia noboc noboc amasoc kendaru negenggec.

<sup>38</sup> Yesungo kpekpaturang ama wama Simong-gac amau kenec. Nga Simong sefena sebigerec-toa ammiu feu Yesungo sefena mengereudeac edegec.

<sup>39</sup> Edegec Yesungo namma ngac feu hemma sebigerec yoac seria edema kpetarimiu sebigerec-ngo ngac wama meickeec. Meickeu ngac ye naso imohaingoc yacma yenenggareng anec.

<sup>40</sup> Anu wenackiwa keme kemeac ngicngac sasawango ogofocngina hafei hania hania ayem-meec, yeni meyunuma Yesuaru hagec. Hagec Yesungo ngicngac hafeinginagoc sasawa maria witinginau faima mengereyunudarec.

<sup>41</sup> Mengereyunuu yafing nga hadehade ifingoc ngicngac homac yenearunac erema yofi kpacgec, “Ge Anutuac Medac.” Nga ye Messia, imoc nenggecac yeneng yoac imoc mi degecdeac dera-cyunuec.

<sup>42</sup> Wereckengau Yesungo taong wama bangec botuc mong ngiha kpacfu kenu ngicngac yeneng ye hofocgec. Hofocma meficgema yeng yenigoc kefudeac negemma ye monnu mi kembeso degec.

<sup>43</sup> Ifi degec ine edeyunuec, “Taong goa fekendae, ni imohai ifingoc kemma Anutuac eucererenggac siduc gombang dekperagiyemmebesare. Anu-tungo imocacnoc suenuc.”

44 Ifi dema Yudaia bangecfu kpekpeturang amangina fekenec, imohai Anutuac yoac dekpou ayemmema kefec.

## 5

<sup>1</sup> Naso monnu Yesungo Genesarete dzohong tegiau nammanu ngicngac yeneng Anutuac yoac negenggecdeac hama igocemema oronggegec botucnginau nanec.

<sup>2</sup> Namma kic fima henu gomba yohockang dzohong tegiau taroc. Nga kondungyang memengic yeneng gombangina faigec taru ufcngina dzuacma nanggec.

<sup>3</sup> Nanggec Yesungo gomba mong, Simonggac gomba, imohai emma tacma Simong edeu yeng gomba kopianec kpesiu dzohonnu kenu ngicngac edekpou ayemmeec.

<sup>4</sup> Wisickeu Simong yofi edeec, “Kondungyang mebesonga dzohonnu doku keme kemea fede, ngeni ihai kemma ufcngina ukuma kondungyang megec.”

<sup>5</sup> Ifi deu Simongngo meremmiec, “Kunenna, neni tofocnac yomohai hafoanoc uatoa mema kondungyang mong mi meding nga geng denecac ine kemma ufc ukubade.”

<sup>6</sup> Ifi deu yeni ufcngina ihai ukuma kondungyang homac yombong megecac ufcngina wakema barackebesonga anec.

<sup>7</sup> Ifi anu yeni ogofocngina gomba monnu tacgec, yeni marikarac heiyemmegec hama meficyunugec. Meficyunuma kondungyang gomba yohockang mewakegecac gomba yereng kondunnu kemebesonga anoc.



<sup>8</sup> Simong Petorongo faka imoc hemma Yesuac haniu makpema fafoc heimima deec, “Kebu, ni ngic kopocsicnagoc anduaeac wanuma kenna.”

<sup>9</sup> Simong nga ngic yegoc kecdagec, yeneng kondungyang homac yombong megecac amma kerectegec anggecac ifi deec.

<sup>10</sup> Nga Sebedaioc medahora, Yakobo nga Yohane, yeri Simonggoc kondungyang mema kecma ifingoc imoc hemma negenec wiac engena yombong anec. Nga Yesungo Simong edeec, “Ge mi kengecguu. Ge kondungyang meme nga yaguc ngicmeme annade.”

<sup>11</sup> Ifi deu yeni gombangina mema tegiau faima wiac sasawa wama Yesu modagec.

<sup>12</sup> Anu Yesungo taong monnu kecmanu ngic mong kukuseringo sebia semedaru manganeyombonggeec, yeng ihai kecma Yesu hemma makpema kiwa bangecfu hetutuckema kpacsambic ammima deec, “Kebu, ge negenna naric anu medzuacnubang.”

<sup>13</sup> Ifi deu Yesungo maria sinema kpeserema deec, “Ge ngereenadeac songona fede.” Ifi deu imohaingoc kukuseringo ngic imoc waec.

<sup>14</sup> Wau Yesungo derahema deec, “Sebigau faka fingeacdac, imocac ngic mong mi edebesena. Ge womong gareng yearu kemma sebiga edzahena. Amma Mosengo seseac deec, imocac sirihau sese faina ngicngac yeneng sesega imoc hemma negentegecgecde.”

<sup>15</sup> Nga Yesuac siduc, imoc ine kuneng yombong yadima kenu ngicngac habutoa homac yeneng yeac yoac negenggecde nga yeng hafeingina men-

gereudeac hagec.

<sup>16</sup> Ifi anggec Yesungo naso homac kperecge tegecma bangec goa ngiha kpacfu kemma numukefec.

<sup>17</sup> Kecma naso monnu Yesungo Anutuac yoc edekpou ayemmanu farisaio nga dedeseriyoacac kpoukpoungic goa Gariraia nga Yudaia amabisic sasawa amma Yerusarennac hama tacgec. Nga hafei mengec mengereac kuc Kebuarunac, imocngo Yesuaru feec.

<sup>18</sup> Ifi femanu ngic goango hama ngic mong hanimaria homemea dzakeu faima tofohoma ama manau Yesuac kicfu faigecdeac negemma mekenggec.

<sup>19</sup> Mekenggec ngicngac homacngo hedzickema nanggecac yeni Yesuac kicfu faigecdeac sing hofocma ngic imoc amabubuyau tofoho emma ama bubuya hesarima ihacsing ngic botucnginau Yesuac hoannu dzakeagoc faigec kemeec.

<sup>20</sup> Kemeu Yesungo negen negensinggina hemma yofi deec, “Ngc, kopocsicga imoc bic wawaya.”

<sup>21</sup> Ifi deu mitiac negen negengngic nga farisaio yeni yenaocngoc yofi negenggec, “Ngc imoc noc ngicngo Anutu emmide? Anutu mocgungo kopocsic naric waude.”

<sup>22</sup> Ifi negenggec Yesungo wiac ubanginau negensigec, imoc hemma yofi edeyunuec, “Ngeni nocac ubanginau ifi negensidae?”

<sup>23</sup> Yoc damocngo deni efea ande, ‘Kopocsicga kpac ande.’ me yofi, ‘Ge yacma kenna.’

<sup>24</sup> Ngicac Medac ye bangecfu kopocsic wawaac uayoac nga kuc femide, ngeni imoc

negenggecdeac amma yofi deba.” Ye ifi dema ngic puringgac yofi deec, “Ni edeguduae, ge yacma dzakega mema amagau kenna.”

<sup>25</sup> Ifi deu yeng imohaingoc ngicngac sasawa yeneac kicfu yacma fefea feande, imoc mema Anutu dengerema ameau kenec.

<sup>26</sup> Kenu ngicngac sasawango homac yombong kpidohoma kerectegec amma Anutu dengeredagcec. Nga kengecngo mewakeyunuu degcec, “Neni faka morora mi hengennina yaguc kicinango hending.”

<sup>27</sup> Anu Yesungo imohacnac mama kemma takesimeme ngic mong kpara Rewi, ye takesimeme amau tacmanu hemma yofi edecec, “Ge hama ni modacnuna.”

<sup>28</sup> Ifi deu Rewingo yacma wiac sasawa wadacma Yesu modarec.

<sup>29</sup> Nga Rewi ye Yesuac amma ameau yaka kuneng ohou takesimeme nga ngicngac homacngo yenigoc tacma yaka negec.

<sup>30</sup> Ifi anggec farisaio nga miti negen negengngicfocngina yeneng negenggec naric mi anu Yesu medacfora yeneac yoackpekpengina kpema degcec, “Ngeni nocac takesimeme nga manganameme yenigoc nenedoku nedae?”

<sup>31</sup> Ifi degcec Yesungo yofi merengyemmeec, “Ngicngac sebingina hafeia kpac kecandae, yeni dotaac mi ayemmekecde. Hafeinginagoc, yeneng ine dotaac ayemmekecde.

<sup>32</sup> Ni ngicngac dindingac kpacyunubadeac mi mayai, kpac. Ni ine manganameme yeni ubangina merenggecdeac kpacyunubesonga mayai.”

<sup>33</sup> Ngicngac goa yeneng Yesu kpesimigec, “Yohaneac medacfora nga farisaio yeneac medacfocngina yeni naso homac yakasege kecma nunumu ua meandae. Nga geac medacfocga yeneng ine nenedoku nekecdae.”

<sup>34</sup> Ifi degec Yesungo yofi merengyemmeec, “Memeturang ngicngo ogofora yenigoc kecma yakasege anggecdeac naric mi deude.

<sup>35</sup> Kecma naso monnu memeturanggac ngic yeneac nearunac meickegecde, naso imohai ine yakasege anggecde.”

<sup>36</sup> Yesungo torokpema yoac mong heima yofi edeyunuec, “Mongngo kporuc gboriaunac sintaha herecgema mema eseau naric mi fama kpebiude. Ifi anudeu kporuc gboria manganeude amma gboria nga esea kpeturangyururu siriha naric mi fingerude.

<sup>37</sup> Nga ngic mongngo waing gboria bokong yangseberango memea eseau naric mi kpeu kemeude, kpac. Ifi anudeu waing gboriango bokong esea imoc tindziru manganeu dokuya maude.

<sup>38</sup> Imocac waing gboriango bokong gboriau kpeni kemeu naric ande.

<sup>39</sup> Amma ngic mongngo waing esea bic neec, yeng waing gboria neudeac songo naric mi negenude, kpac. Ye yofisac deude, ‘Waing esea imoc gombunga yombong.’ ”

## 6

<sup>1</sup> Yesungo sabata naso monnu wit uausing kemmanu medacfora yeneng wit fora merecgema sebera kpetima asahema negec

<sup>2</sup> farisaio goango yenemma kpesiyemmegec, “Ngeni sabata nasou faka mi angana imoc nocac andae?”

<sup>3</sup> Kpesiyemmegec Yesungo yofi merengyem-meec, “Dawidingo uamedacforagoc herenginaac homema faka anggec, ngeni imoc mi osonegeng angandae gedang.

<sup>4</sup> Ye Anutuac womonnu emma ic sogong Anutuac sese faifaia, imoc mema yengena nema uamedacfora ifingoc yemmeec. Nga ic sogong imoc womong gareng yenengsac naric neandae, ngictehec yeneng kpac.” *(1 Samue 21:1-6)*

<sup>5</sup> Ifi dema yofi edeyunuec, “Ngicac Medac ye sabataac Kebu.”

<sup>6</sup> Sabata naso monggac Yesungo kpekpeturang amau emma Anutuac yocac kpouyemmeec, imohai ngic mong marifoia homemeango yenigoc tarec.

<sup>7</sup> Nga Yesungo sabata nasou hafeigoc memengerecua mong meu yeni haniaya mong meficgema yoacfu faigecdeac miti negen negengngic nga farisaio, yeni garemmema nanggec.

<sup>8</sup> Yesungo ine negen negengngina hemma ngic yeac yofi deec, “Ge yacma erahama botucninau nanna.” Ifi deu ngic ye yacma ekemma botucnginau nammanu

<sup>9</sup> Yesungo yofi edeyunuec, “Wiac mong kpesingemmeba, sabatanasou damocngo angana ande? Faka gombunga me faka mangana ayemmebesonga amma homebeso andae, agengngina tigeceac dede me goa memanganeyunuideac dede?”

10 Ye ifi dema kiwa fikengfiha amma yenen-dacma ngic yeac deec, “Mariga sinena.” Ifi deu ngic ye maria sineu maria ngereeu

11 yeni herebutoa yombong negemma yenaocn-goc Yesu dafi ammigeceac denegeng anggec.

12 Yesungo naso imohai numuudeac tikiu emma tofocnac hafoa Anutu numumima kecmanu

13 ama wereckenu medac kpacyunuu kenggec medac 12 meisingyunuma aposoro kpac imoc yemmeec. Nga aposoro yeneac kpacngina yofi:

14 Simonggac kpara mong Petoro kparec nga yeac munea Anderea, Yakobo nga Yohane, Firipo nga Batoromaio.

15 Mataiao nga Toma amma Arifaioac medac Yakobo nga Simong, yeac kpara mong Dzerote.

16 Amma Yuda, Yakoboac medac nga Yuda Kar-ioto taonnunac, yeng kecma Yesu kerereu megec.

17 Anu Yesungo tikiunac medacfora 12 yenigoc mama bangec tumia monnu medacfora homac yenigoc nanec. Nanu ngicngac habu kunengngo Yudaia bangec noboc noboc nga Yerusarennac amma Tiro nga Sidonggac kondunnu amabangec fekende, imohacnacngo hagec.

18 Hama Yesuac yoac negenggecde nga yeng hafeingina mengereudeac hagec. Amma ngicn-gac asu seuhagoc hama yeneng ifingoc ngeregec.

19 Nga kucngo yearunac yenearu kemma ngicn-gac sasawa mengereyunuecac yeni sasawango ye kpeseregecdeac negenggec.

20 Ifi anggec Yesungo kiwa medacfora yenearu fima deec, “Ngicngac wanac kecdae, ngeni kenec-nginagoc, nocac Anutuac eucerereng imocnoc ngeneac.

<sup>21</sup> Nga ngicngac yaguc herenginaac homedae, ngeni kenecnginagoc, ngeni yaka nema gebecgunuude. Amma kiac ubahodungoc yaguc kecdae, ngeneng kenecnginagoc, ngenennoc kecma dzomoregecde.

<sup>22</sup> Nga ngicngac yeneng Ngicac Medacac amma ngeni ubango ukungunuma demanganungunuma ngadeau faingunuma kpac mangana kpacngunugecde, imoc ngeni kenecnginagoc.

<sup>23</sup> Ngeni naso deduaemoc, imohai ubangerec negemma yuengyuma amma sogaibisia, nocac kurumennu bungngina kuneng tomaingina fede. Nga ngic yeneac bangecfocnginango warac profete faka imocngoc profete ayemmegec.

<sup>24</sup> Ngicngac dzofinacgoc kecdae, ngeni sowecnginagoc, nocac ngeni wiacngina songeagoc hafoa bic megec wisickeec.

<sup>25</sup> Nga ngicngac semeng negebec yaguc angkecdae, ngeni sowecnginagoc. Ngeni kecma herenginaac homegecde. Nga yaguc dzomocgoc kecdae, ngeni sowecnginagoc. Ngeni kecma ubamangang negemma kiacgecde.

<sup>26</sup> Amma ngicngacngo dengerengunukecdae, ngeneac deduae, ngeni sowecnginagoc, nocac yeneac bangecfocnginango warac profete ikoha ifingoc dengereyunukecgec.

<sup>27</sup> Ngicngac yoacnaac kedzac kpeandae, ngeni ine yofi edengunuduae, ngeni ngabafocngina heresongogoc hoangyunubisia amma ngic ubango ukungunuandae, yeni faka gombunga ayemmebisia.

<sup>28</sup> Nga ngic sowecyoac edengunuandae, ngeni

yeni kenecyunubisia amma memanganen-gunuandae, ngeni yeneac numubisia.

<sup>29</sup> Nga ngic mongngo munggungga noboc kpeudeu ge munggungga noboha ifingoc wamibesena nga mongngo ngakpiga witiau meudeu ngakpiga mana ifingoc wana mebeso.

<sup>30</sup> Nga ngic yeneng gearunac wiac monggac derecgeandae, ge wiac imoc yemmebesena amma mongngo geangga wiac wangecguu monggoc meremma genudeac mi hatahemibesena.

<sup>31</sup> Ngic yeneng noc faka angemmegecdeac negensiandae, ngeni faka siriha imocngoc ayemmebisia.

<sup>32</sup> Nga ngic goa yeneng ngeneac songo negenggec ngeneng yeneac songo negenggecdeu ngeneac ubangerecyoac homac mi debesonga. Kopocsicmeme ngic yeneng ifingoc ngic damoc yeneac songo negengandae, yeneac songo negenggecde.

<sup>33</sup> Nga ngicngac goa faka gombunga angemmekecgec ngeni faka gombunga ayemmegecdeu ngeneac ubangerecyoac homac mi debesonga. Kopocsicmeme ngic yeni imoc ifingoc angandae.

<sup>34</sup> Anu ngic ngenearu turung anggec ngeni turunga ifiangoc kpoungemmegecdeac negensigecdeu ngeneac ubangerecyoac homac mi debesonga. Ngic kopocsicnginagoc yeni ifingoc manganameme ogofocngina wiacngina turungagoc yemmeandae.

<sup>35</sup> Anu ngeni ine ngabafocngina heregoc yeneac songo negemma faka gombunga ayemmebisia. Amma ngeni turungngina wagec yenearu febeso nga kpougecdeac mi negembisia. Ngeni ifi



anggedeu faka gombungaac bungngina kuneng feude nga ngeneng Mangngina Anutu Engenatoa yeac nambaracfora anggede. Yeng ngicngac ihoc bahoha nga kichodungnginagoc nga ngic mangana faka gombunga ayemmeude.

<sup>36</sup> Mangnginango ngicngac wosoefac ayemmekece, ngeneng ifi isocngoc wosoefac ayemmebisia.”

<sup>37</sup> “Ge ngicngac mi demanganeyunubesena, yoac imoc modacnadeu ngic yeneng ifingoc mi demanganegugece. Amma ge ngicngac mi isingyununa nga mi desiyunubesena, yoac imoc modacnadeu ngic yeneng ifingoc mi isinggugece nga mi desigugece. Nga ngicngac kopocsingina wana. Ifi anna yeni ifingoc geac kopocsic wagece.

<sup>38</sup> Ngeni wiacngina ngicngac naric yemmebisia, ifi anggedeu, Kebungo wiacngina turunggeu kemeu kpemindzaiude. Amma monggoc kpakeu wakema kpetinggeu noboha tabunginau mau megece. Nocac ngeni wiac kpetengina isinggema ngicngac yemmeandae, kpete siriha ifiangoc yeni isinggema turung kpoungemmegece.”

<sup>39</sup> Yesungo monggoc yoac heima yofi edeyunuec, “Ngc kicpisc mongngo kicpisc ogea mong naric mi wangerude, yeri ifi amma yerahafoc tennu kemeecde.

<sup>40</sup> Nga negen negengmeme medac mongngo kpoukpouyaac engena mi anude. Kpoukpoungo medacfora hafoangoc kpouyemmedaru wisickeu yeni yeac siric andacgece.

<sup>41</sup> Anu ge tosogaac kicfu gochisic mong tacde-moc, imoc hemma geangga kicfu ic kebanga fede, imoc ine mi negensianec, faka imoc naric mi ande.

<sup>42</sup> Ifi amma ogogaac yofi mi debesena, 'Toso, ge negemmana kicgau gochisic tacde, imoc meick-badeac negenduae.' Ikocngic, geangga kicfu ic kebanga kuneng fede mi hemma imoc naric mi annade. Ge geangga kicfunac ic kebanga meick-emaguc ogogaac kicfu gochisic tacde, imoc hen-tegema naric meickenade.

<sup>43</sup> Ic mong gombungau fora mangana naric mi fingerude nga ic manganau fora gombunga naric mi fingerude.

<sup>44</sup> Ic sasawa yeni foranginango haniangina mekperagigecde. Ge witic waeyagoc, imohac-nac fig icac fora naric mi mesinade nga waing-gac fora imoc fareng nga gberafecfunac naric mi mesinade.

<sup>45</sup> Wiac gombunga ngic gombungaac ubato-hong gombungaunac ereude. Nga ngic mangana yeac tohong manganaunac wiac mangana ereude. Wiac ngic ubahereau wakema fede, enarango imocnoc dekperagiude.

<sup>46</sup> Ngeni nocac Kebuna Kebuna kpacnuandae nga yoacna wama mi modacnugecde?

<sup>47</sup> Ngic mong ye hama yoacna negemma imoc modacma uaya ifingoc meudeu, ye ngic dafia, imoc edzacngunubade.

<sup>48</sup> Ngic mong ye ama meudeac dema bangec usuu peperandzi fingeru imocac witiau wotunga ukuu kemeec, ngic imoc ye isoc. Ye ama seria

meeac kia tunggbaungtoango hama ama imoc memanganeudeacsoc mi anec.

<sup>49</sup> Nga ngicngac goa yoacna negemma uaya mi meandae, yeni ngic mong ye ama meudeac dema wotunga bangec pereckeau ukuu kemeude, ye isoc. Kia kpeu doku yadima ama imoc kpeu ama imocngo bic barackema mama kpedzamedarec.”

## 7

<sup>1</sup> Yesungo yoac imoc sasawa ngicngac edeyunudaru negenggec wisickeu Kafanaung taonnu kenec.

<sup>2</sup> Kemma ihai wasai gareng monggac wanacngic ye homebesonga amma feec. Amma ye ngic gombungango mingina yeac ewea heimiane.\*

<sup>3-4</sup> Nga wasai garengngo Yesuac siduc negemma yudangic enarafocngina goa Yesuaru sueyunuu kemma ngombonggema degec, “Ge wasai garenggac wanacngic mong mengerenadeac hana. Wasai gareng ye ngic gombunga, ye naric meficgena.

<sup>5</sup> Ye israengic nenanggac songea negengande nga yeng kiwa amma kpekpeturang amanina meec.”

<sup>6-7</sup> Edegec Yesungo yenigoc kemma ama mewegenemanu wasai garengngo ogofora goa sueyunuu yofi edegecdeac kenggec, “Kunenna, nasoga homac mi wana. Ge noc gombunnaac amawarocnau erenade, ni ifiango gearu naric mi habade, imocac ge ihai namma yoac dena medacna ngereeu.

---

\* **7:2:** Wasai gareng yomoc yeac bageau wasaingic 100 isoc kecgec. Wasaingic garengnginagoc yeni israengic kpac, yeni bangec monnunac.

<sup>8</sup> Imoc yofi, ni ifingoc ngic kucnginagoc yeneac bageu kecbadeac fainugec. Amma neac bageu wasaifocna kecandae. Nga monggac kenna deba kenude nga monggac hana deba haude. Amma wanacngicnaac yomoc mena deba meudenoc.”

<sup>9</sup> Ifi deu Yesungo imoc negemma kerectegec amma dzigenema habu modacgec, yeni yofi edeyunuec, “Ni wiac mong edengunuba negenggec, Israe bangecfu negen negensingngina kuhagoc yofia mong mi henai.”

<sup>10</sup> Nga ngic sueyunuyunuya, yeni garenggac amau dzigenema kemma henggec wanacngiha ye hafeia kpac anec.

<sup>11</sup> Anu Yesungo taong mong kpara Naing, ihai kenu medacfora nga ngicngac homacngo ye modacgec.

<sup>12</sup> Kemma taongodaac nagutoayau kensikemanu ngic yeni medac mong homeec, yeac farenga tofohoma magec. Medac imoc ye ngac hodzec monggac medaha mocgusac anu ngicngac habu homacngo ye modacma taonnunac magec.

<sup>13</sup> Ifi magec Kebungo ngac imoc hemma ubea manganeu deec, “Ge mi kiacna.”

<sup>14</sup> Ifi dema kemma katapa imoc kpesereu ngic tofohogec, yeni wama nanggec Yesungo deec, “Medac, ni edeguduae, ge yacna.”

<sup>15</sup> Ifi deu homemeango yacma yoc deec. Nga Yesungo medac imoc nonggea monggoc miec.

<sup>16</sup> Nga ngicngac yeneng imoc hemma kpidohoma homac kengecyunuu Anutu dengerema degec, “Profete kuneng mongngo nenannu fingecma kecde nga Anutungo ngicngacfora nenang

yugucnunuma kecde.”

<sup>17</sup> Siduc imocngo Yudaia bangecfu nga bangec goa nobohau tacdae, ihai kenu sasawango yoac imoc negengcec.

<sup>18-19</sup> Yohaneac medacfora yeneng kemma siduc imoc ammigece Yohanengo medahora yohockang kpacyuruu haec yeri Kebuaru kemma yofi dema kpesimiecdeac sueyuruec, “Hanemmeudeac dedea, imoc ge me neni ngic monggac tomai kecbisina?”

<sup>20</sup> Ifi dema sueyuruu yeri Yesuaru kensikema yofi dema kpesimiec, “Hanemmeudeac dedea, imoc ge me neni ngic monggac tomai kecbisina? Yohane dokunadzicngo imoc kpesigendedeac suenurude.”

<sup>21</sup> Sueyuruec, naso imohaingoc Yesungo ngicngac homac hafeinginagoc nga kucmama amma asu manganagoc mengereyunuec amma kicpisc homac mengereyunuu kicfifi angcec.

<sup>22</sup> Nga ngihoc yereng ifi edeec Yesungo deec, “Ngeri kemma wiac hennegeng andaoc, imocac siduc Yohane ammibesera. Ngic kicpisc yeni kicfifi andae nga hanimangang yeni sing kendae amma kukuseringinagoc yeni sebingina ngereede. Nga kedzacfong yeni yoac negendae amma homemea, yeneng gboridae nga ngicngac makpekpea yeneng siduc gombung negendae.

<sup>23</sup> Nga mongngo neac amma negemmangang mi angande, ye kenehagoc.”

<sup>24</sup> Anu Yohaneac medahora kemmaec Yesungo yeac yofi dema habu edeyunuec, “Ngeni bangec kisiu noc wiac henggecdeac kengcec? Komba

mong firangngo kpeu kockpac anu, imoc henggecdeac kenggec me?

<sup>25</sup> Imoc kpac anu noc wiac hembesonga kenggec? Ngic mong wambaya kibiagoc me? Negenggec, ngic wambangina kibia gombunga gombunga heiandae nga bangecac songotoagoc kecandae, yeni ngictau amau kecandae.

<sup>26</sup> Ngeni profete mong hembesonga kenggec me? Yeng profete goa sasawa feracyunude, ifinoc deduae.

<sup>27</sup> Yeacnoc yofi oho ohoya fede,  
‘Negenec, ni enacdedena sueba yennoc waraigemma singga mengeregenude.’  
(*Marekai 3:1*)

<sup>28</sup> Ni yofi deba negenggec, ngic ngacfunac fingecgec, yeneahunac mongngo Yohane naric mi ferahaec. Anu Anutuac eucererenggac manau mamea,<sup>†</sup> yeng ine Yohaneac engena.”

<sup>29</sup> Ngicngac sasawa nga takesimemengic momoc, yeni imoc negemma yofi negenggec, Anutu ye yoac fora nga dindigacac mingina, ifi dema Yohanearu kemma mitidoku nadzicgec.

<sup>30</sup> Nga Farisaio amma dedeseriyoacac negen negengngic yeni ine Anutungo sing deymmeec, imoc ngadehema Yohanearu mitidoku mong mi nadzicgec.

<sup>31</sup> Anu Yesungo yofi deec, “Ngcngac yofinenggac kecdae, ngeneac fakangina yofi.

<sup>32</sup> Ngeni nambarac sobenu takecdae isoc. Yeni tacma yenaocngoc yofi dema kpacemeandae,

---

<sup>†</sup> **7:28:** Yesungo yengena negemma Anutuac eucererenggac manau mamea deec.

‘Neni kungac fifini ngeni nocac yegec mi fededau nga ubahodung yegec heini nocac mi kiacdau?’

<sup>33</sup> Yohane dokunadzicngo hama ic sogong nga waing mong mi neec, imohai ngeni yofi degec, ‘Ye yafingagoc.’

<sup>34</sup> Nga Ngicac Medac ye hama nenedoku ne-ande, imohai yofi deandae, ‘Henggec, ye nenedoku efea mi nekecde nga takesimeme nga manganameme yeneac tosongina.’

<sup>35</sup> Nga Anutuac negen negentegec imoc gombunga ande imocac nambaracfora yeneac fakanginau ireckeude.”

<sup>36</sup> Farisaio mong kpara Simong ye Yesugoc yaka neudeac ameau heitaiu yeac amau emma taroc.

<sup>37</sup> Tarec manganamemengac mongngo taong imohai kefec, ye yoac yofi degec negenec, “Yesungo Simonggac amau tacde.” ifi degec negemma kirung mong arabastro hocngo memea kerecdokuyagoc homuna gombunga, imoc mekenec.

<sup>38</sup> Mekemma Yesuac ngadeaugeng haniau namma kiaru kickumiango mama Yesuac hani heiu urucsusiango imoc mekerenggema hania titikokoc ammima kerecdoku homuna gombunga imocngo hania nadzicmiec.

<sup>39</sup> Nadzicmiu farisaio Yesu heitaiec, yeng imoc hemma yengenaocngoc yofi negenec, “Ngac hadac ye manganamemengac. Nga ngic yomocngo profete fora ambac dede ye dafugeng kpeserema faka yomoc ande, imoc negemmibac.”

<sup>40</sup> Ifi negenu Yesungo yofi edeec, “Simong, ni yoac mong edegubeso negenduae.” ifi deu deec, “Oc, kpoukpou dena.”

41 Ifi deu yofi edeec, “Ngic yohockang yeri dzogareng mong yearunac turung anoc, mongngo 500 denari nga mongngo 50.

42 Amma yeri turung imoc kpoumiecdeac osima kefecac turungngira waec. Wau yerearunac damocngo dzogarenggac songo homac negenude?”

43 Kpesimiu Simongngo merenec, “Dzo homac wamiec yeng, ifi negenduae.” deu Yesungo deec, “Negenggosi amma yoac dindingac denec.”

44 Anu yeng ngac yearu dzigenema Simong yofi edeec, “Ge ngac yomoc henna. Ni amagau ereba ge haninaac doku mong mi nendang, yeng ine kickumiango hanina dzuacma yengena orucusiango hanina mekerenggedac.

45 Nga amagau haba geng ubangerecac titikokoc mong mi anendang nga yeng hadua, imohacnacngoc haninau titikokoc anendac.

46 Nga geng orucna kerecdokungo mong mi nadzicnendang nga yeng hanina kerecdoku homunagocngo nadzicnendac.

47 Imocac edeguba negenna, ye heresongoya hafoangoc edzacnudacac kopocsiha hafoangoc ifingoc wamiba kpac andacde. Mong ye kopocsiha kapianec wawaya, ye ine songo kapianecsac femide.”

48 Ifi dema ngac yofi edeec, “Kopocsicga imoc bic wawaya.”

49 Ifi deu ngicngac goa tatacfu tacgec, yeni yenaocngoc denegeng amma degec, “Yomoc merac ngic? Ye kopocsic ifingoc wayemmede.”

50 Nga Yesungo ngacac yofi deec, “Ge ruaegoc



kenna. Negen negensingango ebicfunac mesigudac.”

## 8

<sup>1</sup> Yesungo taong nga amabiscifu yerecge kemma Anutuac eucererenggac siduc gombang edeyunukefec. Ifi kenu medacfora 12

<sup>2-3</sup> nga warac ngac goa asu mangana nga hafeingnagoc mengereyunuec, yeneng yegoc momoc kengkecmagec dzofinacnginango meficyunugec. Ngac homac ifi anggec yenearunac mong kpara Maria kpara mong Madara, Yesungo warac yearunac hadehade 7 kporacmiec. Nga mong Yoana, ye Herodeac gareng Kusaac enema amma mong kpara Susana.

<sup>4</sup> Ngicngac homac yeni taong tackenecsoc, imohacnacngoc Yesuaru hama habu kuneng anggec yeng yovac mong heima yofi edeyunuec,

<sup>5</sup> “Gbome kpegi kpegingic mongngo gbome kpegiudeac uau kenec. Kemma gbome kpegiu gbome goango mama sinnu heiu ngic yeneng witiau tigece nga neng yeneng hama nedacgec.

<sup>6</sup> Nga goa harongannu heima nemonggema ereu bangec dokuya kpac anecac sokuema homeec.

<sup>7</sup> Amma gbomea goa haseng manau heiu haseng nga gbomea yerahafocngoc yadieci hasengngoc imoc heihomeec.

<sup>8</sup> Nga gbome goango bangec gombangau heima kpea nemonggema fora 100 sasawa fingececi.” Ifi dema kunengngoc yofi kpacma edeyunuec, “Kedzahagoc yeng yovac yomoc negembeso.”

9 Anu medacfora yeneng yoac heiheiac hania, imocac kpesimigec

10 yofi merengyemmeec, “Anutuac eucerereng-gac negen negeng sufu sufuya, imoc ngeneng negentegegecdeac bic ngemmengemnea. Amma goa yeni kicngina fikecma mi henggecde nga kedzacnginango negengkecma naric mi negentegegecde, imocac yoac heiheiausing yoac sasawa yemmeyemnea.” *(Yesaia 6:9)*

11 “Yoac heiheiac hania imoc yofi, gbome imoc Anutuac yoac.

12 Nga gbome sinnu heiec, imoc ngicngac goa yeni yoara negenggec. Nga mangana minginango hama yoac imoc ubanginaunac meickeu yeni negensingebesobohoma komoc mi kpegecde.

13 Gbome harongannu heiec, imoc ngic goango Anutuac yoac negemma heresongogoc bic hoanggegecde nga yoacngo ubanginau godea mong mi meecac naso wegenanecsac taru faitobannaso hau yeni wagecde.

14 Nga gbome hasennu heiec, imoc ngic goango Anutuac yoac negenggec, yeni kekecnginaac negengyohoc nga dzofinacac faitobang amma bangecac kekec hensongo angkecgec, imocngo yoac heihomeu fora mangana amma kpac angkecde.”

15 “Anu gbome bangec kerehagocfu heiec, imoc ngic goa yeneng Anutuac yoac negemma ubaherenginau faima sing dindingac nga gombunga mekecgecde. Mekecma seserigoc kecma fora meficgegecde.”

16 “Ngic mongngo kifa kpedzereckema tera bageau faima mi kperahaude nga fefe bageau faiu mi tarude. Imoc kpac, ye kifa tatahau faiu tacma ngicngac amau eregecde, yeneng kperagi hendacgecde.

17 Imoc yofiac, wiac sasawa sufu sufuya fede, imoc didiu fingectegerude nga wiac seme semea fede, imoc kecma kperagiau fingectegerude. Imoc sufu sufu mi kengkefude.

18 Ngic mong ye wiac goa femide, ye wiac mong-goc migece nga mong ye wiac mong mi femide, yearunac wiac fenende dema negende, imoc ifin-goc wangecgec eng kefude. Imocac amma ngeni yoac negendae, imoc henghomema negemma kecbisia.”

19 Anu Yesuac nonggo munafora yeneng yearu kenggec ngicngac homacngo hedzickegecac amma naric mi henggec.

20 Ifi anggec goa yeneng Yesuaru yofi degec enec, “Nonggo munafocga yeni hama genggecdeac ngadeau nandae.”

21 Ifi degec Yesungo deec, “ngicngac Anutuac yoac negemma modackecdae, yeneng nonggo munafocna andae.”

22 Naso monnu Yesungo medacfora yenigoc gombau emma yofi edeyunuec, “Nenang dzohong noboc kenni.” Ifi deu kemmagec

23 Yesungo gau feu kia firangtoango hama dzohongtoa kpeu dokungo gomba mewakebeso anu yeni kemebeso anggec.

24 Amma medac yeneng Yesuaru kemma midima degec, “Kunennina, Kunennina, neni kemebesonga andimbe.” Ifi degec Yesungo

yacma firang nga dokuac siritembong dekpitari ayecmeu firang kpac anu dzohongngo ning kpema feec.

<sup>25</sup> Feu medacfora yeneac deec, “Ngeni negen negensingngina kpac, ifi isoc ande.” Ifi deu medac yeni kengecyunuu kerectegec amma yenaocngoc denegeng amma degec, “Ye noc ngic? Yeng firang nga dzohong yoc edeyurru yeac enac tofohodape.”

<sup>26</sup> Yesu nga medacfora yeni dzohong ferecgema Gerasene bangecfu kenggec. Bangec imoc Gari-raia dzohong noboc.

<sup>27</sup> Kensikema Yesungo gombaunac mama taong imocac ngic mong hadehadeforagoc meficgeec. Ngic imoc ye naso herea bic senggang kecma amau ngisitataha kpac kicsereu kecande.

<sup>28</sup> Ngic imocngo Yesu hemma seriangoc arohoma Yesuac hoannu makpema yofi kparec, “Yesu Anutu engenatoaac Medac, neac wiac imoc geac mi ande. Ni desambic anggendumae, ge kpendzennu mi fainubesena.”

<sup>29</sup> Nga Yesungo asu seuhagoc yearunac kporaru erema kenudeac bic edeec, imocac ifi deec. Asu seuhagoc imocngo naso herea ammiu ngic yeneng mema sengngo hanimaria kpema garenggegec. Nga ye seng kperecedacma asu seuhagocngo wangecma bangec kisiu kengkefec.

<sup>30</sup> Nga Yesungo kpesimiec, “Ge kpacga merac?” Kpesimiu deec, “Habutoa.” Hadehade homacngo yeac hereu kemema kegecac amma yeng ifi deec.

<sup>31</sup> Nga hadehade yeneng Yesu desambic am-migec, “Ge hofeu suenununa mi kemeni.”

<sup>32</sup> Nga bangec imohai berechabu kunengngo fagannu surukpema kecgec. Anu yeni kporacyunuu berecfu kemegecdeac desambic ammigece yeng ifi anggecdeac negengyemmeec.

<sup>33</sup> Negengyemmeu yeni ngicfunac erema berec habu yenearu kemegec berec yeneng fagannunac nedzima dzohonnu kemema doku nema home-dacgec.

<sup>34</sup> Homedacgec berecgareng yeneng faka fingerec, imoc hemma kengec worama siduc deyadigece taonnu nga bedzou kenec.

<sup>35</sup> Kenu ngicngac yeneng imoc negemma faka fingerec, imoc henggecdeac Yesuaru hagec. Hama ngic hadehadeagoc kefec, ye henggec. Yeng negentegecma wamba heima Yesuac haniu tarec. Ifi taru yeni hemma kengecyunuec.

<sup>36</sup> Nga ngic hadehadeforagoc kefecngo dafiu ngereedac, imoc ngic kicnginango faka fingeru henggec, yeneng siduc ayemmegec.

<sup>37</sup> Ayemmegec gerasenengic yeneac amabangec, imocac ngicngac sasawango kengec homac yunuecac amma Yesungo wayunuudeac edegec. Edegec Yesungo dzigenema kenudeac gombau enec.

<sup>38</sup> Enu ngic hadehade kporacmiec, yeng Yesugoc kenudeac derecgeu Yesungo ine suema yofi edeec,

<sup>39</sup> “Ge amagau dzigene kemma Anutungo fakatoa anggendac, imoc dekperagibesena.” Ifi deu ngic ye kemma Yesungo yearu fakatoa meec, imoc taong hafoangoc dekperagiyemmedarec.

<sup>40</sup> Yesungo dzohong noboc kensikemanu ngicngac yeneng ye heitaigec. Yeni sasawango yeac tomai kecgec.

<sup>41-42</sup> Nga kpekpeturang amaac gareng mong kpara Yairo, yeng haec. Ye naroanga mocgusac, kifaya 12 ammanu homebesonga anecac amma ngic ye hama Yesuac haniau makpema ameau kenudeac desambic ammiac. Ammiu yeni kemmagec ngicngac habutoango noboc noboc hedzickegec.

<sup>43</sup> Anu ngac mong ye sacherec amma kecmanu kifaya 12 anu ye dzofinaha sasawa dota hania hania yemmeu mongngo ye mengereudeac sing mi meficgeec.

<sup>44</sup> Ngac imoc ye habu yeneac botucfu Yesuac ngadeausing kemma ngakpiherehaac witic susia kpesereu sawa bic gbanggeec.

<sup>45</sup> Gbanggeu Yesungo kpesiec, “Merang kpeserenudac?” Ifi deu yeneng degec, “Imoc mi negendimbe.” nga Petorongo edeac, “Kebu, ngicngac homacngo orongguma hedzicgudae.”

<sup>46</sup> Ifi deu Yesungo yofi deec, “Mongngo kpeserenudac, kuc wanuma monggaru kenu negendua.”

<sup>47</sup> Ifi deu ngac ye yofi negenec, “Ye bic meficgedac.” Ifi negemma sufu sufu worabeso osima dzonoma fedeu hama Yesuac haniau makpeec. Amma ye Yesu kpeseredac nga dafiu ngerec ngeree bic yombong fingecmidac, ngicngac yeneac kicfu imoc dekperagidarec.

<sup>48</sup> Dedaru Yesungo yofi edeac, “Naroanna, ge ru-aegoc kenna. Negen negensinggango mengeregudac.”

<sup>49</sup> Amma ye yoac denammanungoc kpebung gareng, yeac amaunac yoac yofi haec, “Naroangga

bic homedac, ge kpoukpou monggoc ebic mi mina.”

<sup>50</sup> Ifi degec Yesungo imoc negemma Yairo edeec, “Ge mi kengecguu eng negensinggena. Ye kekec monggoc meficgeude.”

<sup>51</sup> Yesungo ifi dema amau kensikema ngic mongngo amau mi enudeac kpetarima Petoro nga Yohane amma Yakobo nga naroanggac nonggomama, yenigocsac enudeac deec.

<sup>52</sup> Dema ngicngac hafaogoc yeni naroanggac kiacsonggong anggec yofi edeyunuec, “Ngeni kiac wagec, naroang ye mi homedac, ye gau fede.”

<sup>53</sup> ifi deu yeni dzomoremigec. Naroang ye bic homedac, ifi negenggec.

<sup>54</sup> Nga ye ine naroanggac mariaua mema kpacma deec, “Naroang, ge yacna.”

<sup>55</sup> Ifi deu asuya monggoc kpoduu imohaingoc yacma taru Yesungo yaka migecdeac edeyunuec.

<sup>56</sup> Nga nonggomama yereng kerecgec anec Yesungo ine ngic mong mi edeyunuecdeac kpae heiyemerec.

## 9

<sup>1</sup> Yesungo medacfora 12 kpacyunuu hadacgec hadehade nga yafing sasawa kporacyunugecdeac nga hafei hania hania mengeregecdeac uayoac nga kuc yemmeec.

<sup>2</sup> Yemmema Anutuac eucerereng dekperagigecdeac nga hafeigoc mengereyunugecdeac sueyunuma

<sup>3</sup> yofi edeyunuec, “Ngeni singgac mefic mong mi mekembisia, hie nga yaka amma yasu nga

dzo mong mi mebisia nga ngakpi yohockang mi mekembisia.

<sup>4</sup> Nga ama monnu kensikegec, ngic yeneng ama heingemmegec ngeni ama imohai tacyac angkecgec wisickeu taong monnu kembisia.

<sup>5</sup> Nga taong mong imocac ngicngac yeneng mi hoangngunugecdeu ngeni taong imoc wama haninginaunac yube kpegec mau yeni imoc henggec faka imocngo manganangina edzacyunubeso.”

<sup>6</sup> Ifi deu yeni amea amea kemma siduc gombang dekperagikecma hafeinginagoc mengereyunugec.

<sup>7</sup> Ifi anu Gariraia bangecac gawanatoa kpara Herode, yeng wiac sasawa fingerec, imocac siduc negenu obohoec. Nocac ngic goa yeneng yofi degec, “Yohane dokunadzicngo homecfunac gborima yacma kecde.”

<sup>8</sup> Ifi degec goango yofi degec, “Eriango fingecma kecde.” nga goa yeneng degec, “Profete bicngoc yombong kecgec, yenearunac mongngo hadac.”

<sup>9</sup> Nga Herodengo deec, “Neng Yohane ubea bic kperecgeai nga yomoc ine merac ngicac siduc negengkecduae.” Dema Yesu henudeac kicfifi kefec.

<sup>10</sup> Anu aposoro yeni dzigenema ua megec, imocac siduc Yesu ammidacgec. Ammigece yeng meyunuma meickema tembuha tachesonga taong mong kpara Betsaida, imohaigeng kenggec.

<sup>11</sup> Kenggec habutoa yeneng imoc negemma ye modacgec. Modacgec, yeng hoangyunuma Anutuac eucerereng dekperagiyemmema ngerec ngereec ayemmeec, yeni mengereyunuec.



12 Ama marai anu medacfora 12 yeneng Yesuaru hama degec, “Bangec yomoc ngiha kpacfu kecmiina ama marai andeac habu sueyununa amabangec tackende, imohai kemma yaka meficge nema imohai febisia.”

13 Ifi degec deec, “Ngeneng yaka yemmegec negec.” Ifi deu merenggec, “Neni ic sogong marimong nga kondungyang yohockangsac mekecdimbe. Neni yaka mong mi bummebing dede habu sasawa yeneacsoc naric mi ambac.”

14 Ngic imoc yeneac kpetengina 5 tauseng, ifi isocngo kecgecac amma ifi degec Yesungo medacfora yofi edeyunuec, “Ngeni ngicngac edeyunugec, yeni 50 habusoc ifi kpedzucnema tackenggec.”

15 Ifi deu medac yeneng ngicngac ifi anggecdeac edeyunugec sasawango matacgec.

16 Matacgec Yesungo ic sogong marimong nga kondungyang yohockang, imoc mema kiwa kuru-mennu fiu enu kenehema mendzirec. Mendzicma ngicngac mederema yemmegecdeac medacfora yemmeu

17 yeneng imoc mederema ngicngac yemmegec. Yemmegec ngicngac sasawango negebec amma yaka tosea neti anggec, imoc kpedzucnegec ke-mema sakac 12 wakeec.

18 Yesungo naso monnu yengenaocngoc nu-muudeac kecmanu medacfora yegoc kecgec yeni kpesiyemmeec, “Ngicngac yeni neac merac dean-dae?”

19 Ifi deu degec, “Goango Yohane dokunadzic nga goango Eria amma goa yeneng ine profete mong esea, yeng gborima kecede deandae.”

20 Ifi degec deec, “Nga ngeni ngenaoc ine neac merac deandae?” Ifi deu Petorongo deec, “Ge Anutuac Messia.”

21 Ifi deu, yeni yoac imoc ngic mong mi edeyunugecdeac deracyunuec.

22 Nga Yesungo yofi deec, “Ngicac Medac ye kpendzeng homac kpebeso. Yudangic enarafoc-ngina nga womong gareng enara amma mitiac negen negengngic yeneng ye ubango wama kpegec homebeso. Homeu uameme harebec ammanu monggoc gborima yacheso.”

23 Yesungo habu sasawa yofi edeyunuec, “Ngic mong ye ni modacnubeso negendeu ye yengena ubasebiaac songo memama wenacsoc mariponga miacma tofohoma modacnubeso.

24 Ngic mong ye yengena kekeha segereudeac negemma uaya mekecde, ye kekeha sufumiude. Nga mong ye neac amma kekeha waude, ye ine kekeha fingeelmiude.

25 Imoc yofiac, ngic mong ye bangecac wiac sasawa mefigema mekecde, ye ine kekeha sufumidarude nga yengena memanganeemeu kekeha imoc fora kpac anude.

26 Nga ngic mongngo neac negenu gameagoc ande amma neac yoacnaac negenu gameagoc anude, yeac siduc yofi, Ngicac Medac ye Ma-maac nga angeroforaac amma yengena kibikper-agitoagoc haude, naso imohai yeng ngic imoc yeac ifingoc negenu gameagoc anude.

27 Nga ngic yomoc nandae, ngeneearunac goa yeni mi homemagec Anutuac eucerereng hau henggecde, imoc forangoc edengunuduae.”

<sup>28</sup> Anu yoac imoc deec, imocac sonda mocgu isoc wisickemanu Yesungo Petoro nga Yakobo amma Yohane meyunuu numugecdeac tikiu enggec.

<sup>29</sup> Emma numumanu kicmesuya heimerenu sir-  
iha mong anu wambaya kperagima kongac kopo-  
rarac yombong anec.

<sup>30</sup> Ifi ammanu imohaingoc ngic yohockang,  
Mose nga Eria yereng fingecma yegoc denegeng  
anoc.

<sup>31</sup> Yeri kibikperagitoangiragocngo fingecma  
Yesungo Yerusarennu kemma kekeha mesima  
wayunuma enudeac denegeng anggec.

<sup>32</sup> Nga Petoro ogohoragoc, yeni gautoa fegec.  
Fegecfunac gborima yacma Yesuac kibikperagi-  
toa nga ngic yohockang yegoc nanec yenenggec.

<sup>33</sup> Nga ngic yohockang yeri Yesu wama kem-  
maec Petorongo Yesu edeac, “Kunenna, yei kecni  
songea andeac bedzo bedzo harebec meni, geac  
mong, Moseac mong nga Eriaac mong.” Ye wiac  
imoc mi negentegecma eng ifi deec.

<sup>34</sup> Yoac denammanu hoeng mongngo fingecma  
mama semeyunuu kengec amma hoeng manau  
kemmagec

<sup>35</sup> hoeng manaunac ubaudumeng mong yofi  
kpacma deec, “Yomoc neac Meisingmedacna,  
ngeni yeac yoac negembisia.”

<sup>36</sup> Ubaudumeng imoc kpac anu yeni kic fima  
Yesu tembuha nanu henggec. Hemma medac yeni  
yoacngina waickema nanggec. Nga naso imohai  
wiac henggec, imocac ngic mong mi edegec.

<sup>37</sup> Wereckengau Yesungo medacfora harebec  
yenigoc tikiunac kememagec ngicngac habu  
kunengngo meficgegec.

<sup>38</sup> Anu habu yeneac botucfunac ngic mongngo Yesuac kpacma derecgema deec, “Kpoukpou, ge hama medacna henna, ye medacna mocgusac.

<sup>39</sup> Hadehade mongngo medac mendanggeu ye arohou asu manganango mema kpekpefac am-mima sebia mekuc kpekutung meu enaraunac sofororoc ereande. Asu imocngo medac mi wama naso homac memanganeyombonggeande.

<sup>40</sup> Nga medacfocga yeneng kporacmigeacdeac edeyunuba yeni kporacbibema wadau.”

<sup>41</sup> Ifi deu Yesungo yofi deec, “Ngicngac areng yomoc ngeni negen negensingina kpac amma fakangina sicsauha. Naso herea ngenigoc monggoc tachadeac modzona tide. Ge medacga nearu mehana.”

<sup>42</sup> Ifi deu medac ye wegena kemmanu asu seuhagocngo medac kpefaheu bangecfu makpeu yeac sebia mekuc kpekutung meu Yesungo asu seuhagoc yoac seria ammima medac mengerema mama monggoc miec.

<sup>43</sup> Miu ngicngac yeneng Anutuac kuctoa imoc hemma kerectegec amma negenggec wiac engena anec. Amma yeni Yesuac ua sasawa hemma kerectegec anggec. Ifi ammagec yeng medacfora yofi edeyunuec,

<sup>44</sup> “Ngeni kedzac kpema yoac yomoc negenggec. Naso mi hereemanu yeni Ngicac Medac kererema ngicngac yeneac mariu faigec kpegecde.”

<sup>45</sup> Ifi deu medac yeni yoac imoc mi negen-tegecgecdeac Anutungo uba negen negengngina hedzickeec. Hedzickeu yeni Yesuac yoac obohoma imocac hania kpesimigeacdeac kengecyunuec.

<sup>46</sup> Anu medac yene arunac merang engena ande, imocac yena ocngoc yoacngina engemmama anec.

<sup>47</sup> Ifi anggec Yesungo negen negeng ubanginau feec, imoc bic negemma medac bisic mong mema yegoc faiu nanu

<sup>48</sup> yofi edeyunuec, “Ngiic mong ye kpacna negemma medac yomoc hoanggeude, yeng ni ifingoc hoannude. Nga ni hoannude, yeng Kebu suenuec, ye ifingoc hoanggeude. Imoc yofiac, ngeneac botucfunac ngic mong mamea kecande, yeng engena ande.” Ifi deu

<sup>49</sup> Yohanengo deec, “Kebu, ngic mongngo geac kpacfu hadehade nga yafing kporacyemmeu neni imoc hemma nenangoc mi kecdeac amma kpetarimiding.”

<sup>50</sup> Ifi deu yofi deec, “Ngiic mong ye uanginaac ngaba mi ande, yeng ogongina ande. Imocac ngeni ye mi kpetarimibisia.”

<sup>51</sup> Yesungo kurumennu enudeac nasoya wegene hau negen negenga Yerusarennu sueu kenec.

<sup>52</sup> Kenu ngic goa sueyunuu yeni waraima nenesemeng nga amagerec mengeregecdeac Samariaac guruama monnu kensikegec.

<sup>53</sup> Kensikegec Yesungo Yerusarennu kenude, ngicngac yeneng imoc negenggecac Yesu ama mong mi heimigec.

<sup>54</sup> Ifi anggec medahora Yakobo nga Yohane yereng imoc hemma yofi deoc, “Kebu, neni kurumennunac gerec deni mama ngic yomoc yonohodaru, imoc naric ambing me?”

<sup>55</sup> Deec Yesungo dzigenema yoac ifia negembesonga kpaheiyemeru

<sup>56</sup> medacforagoc guruama monnu kenggec.

<sup>57</sup> Sinnu kemma ngic mongngo Yesu edeec, “Ge ihai me ihai kennadesoc modacguma gegoc kembadeac negenduae.”

<sup>58</sup> Ifi deu yeng yofi meremmiec, “Katekasi yeni bangec manau fefenginagoc nga sawa neng yeni faecnginagoc amma Ngicac Medacngo ine kparicganga kpac.”

<sup>59</sup> Ye ngic mong yofi edeec, “Ge hama ni modacnuna.” Ifi deu yeng deec, “Kebu, negennemmana kemma manna tonggomaguc habade.”

<sup>60</sup> Ifi deu meremmiec, “Homec yeni yenaocngoc tonggoemegec nga geng ine wayunuma kemma Anutuac eucerereng dekperagima kecbesena.”

<sup>61</sup> Nga ngic mongngo deec, “Kebu, ni modacgubadeac negenduae nga kemma arengfocna edeyunumaguc ine habade, imoc naric me?”

<sup>62</sup> Ifi deu Yesungo yofi edeec, “Ngic mong ye negen negenga bic suemaguc dzigenekpe ande, ngic ifiango Anutuac eucererenggacsoc mi ande.”

## 10

<sup>1</sup> Imoc wisickeu Kebungo ngic 72 meisingyunuma yohockang yohockang hendzicyunuec. Hendzicyunuma yengena taong nga amabisic kembesonga negensiec, imohai yeneng waraimigecdeac sueyunuma yofi edeyunuu kenggec,

<sup>2</sup> “Semeng fora homacngoc kpauedac fede nga ua ngic ine efeanecsac kecdae. Imocac ngeni semeng mingina numumigec yeng ua ngic

sueyunuu yeneng kemma foraya mekpedzuc ambisia.

<sup>3</sup> Negenggec, ramamedahango katekasi yeneac botucfu kecdae, siriha imocacsoc suengunuba kembisia.

<sup>4</sup> Ngeni dzobirang me hie nga hanitabe mi mema kembisia. Amma sinnu ngic mong meficgema yoac mi mebisia.

<sup>5</sup> Amma ngeni ama imohai me imohai enggede imohai emma yofi debisia, 'Ruae ngenearu febeso.'

<sup>6</sup> Ifi degec ruaengic mong imohai kecdeu nge-neac ruaengo ye hoanggeude nga mi kecdeu ruae imoc monggoc ngenanu dzigeneude.

<sup>7</sup> Ngicngac ama ngemmegec ngeni imohaingoc tacbisia. Nga yeni yaka nga doku ngemmegec ngeni imocnoc nebisia. Ngeni amayuguc mi kembisia. Uango ua ngic uabungngina meficgeyem-mebesos, imocngo ngereeude.

<sup>8</sup> Ngeni taong monnu kenggec ngic yeneng ama heingemmema wiac mong negecdeac ngemmedae, ngeni imoc nebisia.

<sup>9</sup> Ngeni taong imohai ngicngac hafeinginagoc mengereyunuma yofi edeyunubisia, 'Anutuac eucererengngo ngenearu bic mewegenengunuma hama fede.'

<sup>10</sup> Nga ngeni taong monnu enggec ama mi heingemmegecdeu ngeni ine amasingnginau kemma yofi edeyunubisia,

<sup>11</sup> 'Taongnginaac yubengo hanininau mendanggedac, neni imoc ifingoc kpeni mama imocngo manganangina edzacngunubeso. Nga ngeni ine yofi negembisia. Anutuac

eucererengngo yei bic mewegenengunuma hama fede.’

<sup>12</sup> Amma nasoya hau taong imocac turunga ebiria yombong haude, imoc Sodong amabangec ferahema fingerude, imoc edengunuduae.

<sup>13</sup> Korasing nga Besaida ngicngac, ngeni sowecnginagoc. Ngenearu kucfaka homac bic fingerec. Amma kucfaka ifia Tiro nga Sidong taonnu fingebacfu yeni kopocsicnginaac ubahodunggac wamba bic heima hama nadzicma tacma ubamereng ambau.

<sup>14</sup> Nga ising ising nasotoau Anutungo Tiro nga Sidong areng, yeneac ubamangang negemma turunga efeanec yemmema ngeni ine turunga ebiringoc ngemmeude.

<sup>15</sup> Amma Kafanaung, geng kurumennu enadeac ifi negengkecnec nga kpac yombong. Ge homecamau megu keme kemea siraha annec.

<sup>16</sup> Ngic mong ye kedzaha ngenearu faide, yeng kedzaha nearu faide. Nga ngeni ngadengunuude, yeng ni ngadenuude nga Kebu suenuec, ye ifingoc ngadeheude.”

<sup>17</sup> Anu ngic 72 yeni sogac sogaigoc dzigenema degec, “Kebu, neni kpacga kpacni hadehade nga yafing yeneng yoacnina tofohoma woragecde.”

<sup>18</sup> Ifi degec Yesungo yofi merengyemmeec, “Ni Satang hembra yeng piratac isoc heima kurumenunac maec.

<sup>19</sup> Negenggec, ni uayoac nga kuc bic ngemmeai. Ngemmeba ngeni boudzoc nga wemeweme witinginau naric tigece amma ngabanina nga yeaac arengfora sasawa yeneng ngeneac bageu



kecgecde. Nga wiac mongngo ngeni naric mi memanganengunuude, kpac.

<sup>20</sup> Nga hadehade nga yafingngo enacngina tofohoma woraandae, ngeni imocac homac mi so-gaibisia. Nga kpacarengngina kurumennu oho ohoya fede, ngeni imocac homac yombong so-gaibisia.”

<sup>21</sup> Naso imohaingoc Tiri Asungo Yesu ammiu sogac sogai songongo mewakemiu yoac yofi deec, “Manggac, kurumeng nga bangec mingina, geng wiacga sasawa yomoc mesufuyemmenecac ngicareng negen negentegecnginagoc nga fitira kecdae, yeni imoc mi hennegeng andae. Amma nambaracbisic bisic, yeni wiac yomoc mekper-agiyemmenec, imocac dengereguduae. Manggac, ge imoc hemma ubaga ngereede, imoc fora.

<sup>22</sup> Mannango wiac sasawa nenec imoc mekecduae. Nga mongngo Medahaac hania naric mi negende, Manggacngosac negemmide. Ifi isocngoc mongngo Manggacac hania naric mi negende, Medacngosac ye negemmide. Amma Medacngongo ngicngac meisingyunuma Manggac edzacyunude, yeneng ifingoc ye negemmigecde.”

<sup>23</sup> Anu Yesungo medacfora yenearu dzigenema yeneacsac yofi dema edeyunuec, “Faka yomoc fingeru kicnginango hengkecdae, ngeni kenecnginagoc.

<sup>24</sup> Ni edengunuba negenggec, warac profete nga ngictau homac yeneng ngeni wiac hengandae, imoc hembeso negemma sifu mi henggec. Nga ngeni wiac yomoc kedzacnginango negengandae, yeneng imoc ifingoc negembeso ayemmeu mong

mi negenggec.”

<sup>25</sup> Anu dedeseriyoac negen negengngic mongngo hama Yesu faitobannu faiudeac negemma deec, “Kpoukpou, ni faka dafi amma kekecseriac maridzoming mebade?”

<sup>26</sup> Ifi deu Yesungo yofi meremmiec, “Dedeseriyoacfu yoac oho ohoya fede, ge kibi imohai dafi osonegeng angannec?”

<sup>27</sup> Ifi deu ngicngo meremmiec,  
 “Ge ubaherega nga ubaongaga nga kucga amma negen negengga hafoangoc Kebu Anutuga heresongogoc hoanggebesena.” (*Dedeseri 6:5*)

Amma,

“Ge geangga anggengande, siriha imocngoc gegoc wegena kecdae, yeni heresongogoc hoangyunubesena.” (*Sesememe 19:18*)

<sup>28</sup> Ifi deu Yesungo yofi edeec, “Ge yoac dindingac dema merennendang. Ifi amma kecengkecbesannec.”

<sup>29</sup> Nga ngic ye Yesungo yeaac ngic dindingac debeso, ifi negemma kpesimiec, “Nga ngicngac neac wegena kecdae, imoc merac yombong?”

<sup>30</sup> Kpesimiu Yesungo meremmiec,

“Ngic mongngo Yerusarennac Yeriko taonnu ke-meudeac kemma godzungic yeneac mariu heiec. Heiu yeneng wambaya hesima kpegec homebeso anu ukugec feu woragec.

<sup>31</sup> Femanu womong gareng mongngo imohacsing kemema ngic feec, ye hemma kpegegenggema nobocsing kenec.

<sup>32</sup> Kenu womong gareng yeneac memefic ngic mongngo ifingoc imohai kemeec. Kemema ngic

imoc henu feu ye ifingoc kpegegengema noboc-sing kenec.

<sup>33</sup> Anu samariangic mongngo sing imocngoc modacma kemema ngic feec, ye hemma yeac ubea manganec.

<sup>34</sup> Manganeu yearu kemma kerec doku nga waing dokuya kubehau kpakema kubeha biranggemiec. Biranggema yengena donggi witiau faima kiangamau mekemma henggareng am-miec.

<sup>35</sup> Amma wereckengau siriwa dzo yohockang kiangamaac gareng mima yofi edeec, ‘Ge ngic yomoc henggareng ammima kecbesena. Ni mong-goc dzigeneba dzo imocngo mi heiude isoc, imo-haingoc imocac turunga gembade.’ ”

<sup>36</sup> Ifi dema Yesungo dedeseriyoac negen negengngic yofi kpesimiec, “Ge dafi negennec? Ngic ye godzungic yeneac mariu manganec. Nga ngic harebec yenearunac ngic merang yeac ogo amma wegena kefec?”

<sup>37</sup> Ifi kpesimiu yeng meremmiec, “Yea uba-mangang negemma meficgeec, yeng.” Ifi deu Yesungo yofi edeec, “Ge geanggaoc kemma ye anec, ifi isoc angkecbesena.”

<sup>38</sup> Yesu nga medacfora yeni kengkecma guruama monnu kensikegec. Kensikema ngac mong kpara Mata, yeng Yesu ameau enudeac heitaiec.

<sup>39</sup> Heitaiu Mataac munea kpara Maria, yeng Kebuac haniu matacma yoara negenec.

<sup>40</sup> Negemmanu Matango ine dzandzung namma yenigoc mi tacma ha namma Yesu edeec, “Kebu, ge neac negengyohoc mi annec. Ni

tembucna ngenenggareng ua mebadeac munana wanudac, ye edena meficnuu.”

<sup>41</sup> Ifi deu Kebungo yofi meremmiec, “Mata Mata, ge wiac homacac negengyohoc amma ebic mekec-nec.

<sup>42</sup> Amma wiac mocgusac imoc megec ngereeude. Maria ye wiac gombunga isinggema mekecde, imoc mongngo yearunac naric mi meickeude.”

## 11

<sup>1</sup> Yesungo naso monnu kemma botuha monnu numuu wisickeu medacfora yenearunac mongngo deec, “Kebu, Yohane ye medacfora numugecdeac sing kpouyemmeec, ge ifingoc ifia goa kpounemmena.”

<sup>2</sup> Ifi deu Yesungo yofi deec, “Ngeni yofi dema numubisia, ‘Manggac, geac kpac kpetiac febeso. Anu eucererengga imocngo hanemmebeso.

<sup>3</sup> Ge wenacsoc yaka socnina nemmebesena.

<sup>4</sup> Kopocsicnina wanemmena. Neni ifingoc ngic yeneac kopocsicnginaac turung kpoukpouac wayemmekecdimbe. Faitobannu mi fainunubesena.’ ”

<sup>5</sup> Ifi dema yofi edeyunuec, “Ngenearunac mongngo tofocnac dzongiau ogea monggac amau kemma debac, ‘Ogona, ge ic sogong harebec meficnuna turunga ngade gembade.

<sup>6</sup> Ogona mongngo sing hereaunac hama tofocnac amanau hau yakana kpac anu noc gumbadeac obohoduae.’

<sup>7</sup> Ifi deu ogea ama manau tacma debac, ‘Ge ebic mi nenna. Nagunina bic meserima nambarac-

focnagoc gaufedimbeac naric mi yacma megembade.’

<sup>8</sup> Ni edengunuba, ye ogeaac amma ic sogong mi mibac dede yeng ngombonggema engngoc kpesimibac, imocac amma ye sifu yacma ic sogong miude.

<sup>9-10</sup> Ngic mong ye numukecde, yeng wiac imoc meude nga hofockecdengo wiac imoc meficgeude amma naguu heiande, yeac nagu witimigeude. Imocac ngeni numugec turunga ifi ngemmeude nga ngeni hofocma foraya meficgegeude amma naguu heigec nagu witingemmegeude.

<sup>11</sup> Ngeneac botucfu manggac monggac medahango kondungyanggac kpesimiu yeng boidzoc mangana naric mi miude.

<sup>12</sup> Nga ye kokorec gbomeaac kpesimiu weme weme naric mi miude.

<sup>13</sup> Ngic ngeni mangana angandaengo sifu nambaracfocngina ubangerecac wiac gombunga yemmegecdeac negentegecdae. Imocac yofi negenggec, kurumeng Mangnginango fakangina gombunga imoc homac feraheu ngicngac Tiri Asuya yemmeudeac kpesimidae, yeni Tiri Asuya naric yemmeude.”

<sup>14</sup> Naso monnu Yesungo hadehade mong yoara kpac, imoc ngicfunac kporarec. Kporaru hadehadengo ngicfunac erema kenu ngic yoara kpac kefec, yeng yovac deu ngicngac yeneng kerectegec anggec.

<sup>15</sup> Nga ngicngac goa yeni ine yofi degec, “Ye hadehade nga yafing yeneac ngictaungina Bedzeburu yeac kucfu ngicngac yenearunac kporacande.”

16 Anu goa yeneng ine Yesu kuha isinggegedeac negemma kurumennunac faka kuhagoc mong meudeac edegec.

17 Edegec Yesungo negen negengngina bic negemma yofi edeyunuec, “Bangec monggac ngic yeneng ngaba angemema tohogecdeu bangec imoc kisi fingeru ama mongngo ama monggac witiau makpema kpac anude.

18 Nga Satangngi tohoma yengenaocngoc kporacemeudeu ye nga arengfora naric mi serima nanggede, kpac. Nga ngeni neac ine deandae, ‘Ye Bedzeburungo ammiu yeac kucfu hadehade nga yafing kporacyunuande, imoc obohode.’

19 Neng Bedzeburuac kucfu hadehade nga yafing kporacyunubai dede ngeneac medacfocngina yeni ifingoc yeac kucfu hadehade nga yafing kporacyunubau. Ifi anu ngeneac medacfocnginango yoacngina isinggema desigecde.

20 Nga Anutungo gbonga faiu ni imocngo hadehade nga yafing kporacyunuduae Anutuac eucererengngi ngenearu bic hadac kecde, ngeni imoc negenggec.”

*(Makekeng 8:16-19)*

21 “Ngic kuhagoc mongngo dzikacac iwaiya mema ameaac gareng kecmanu finaha gombunga feude.

22 Nga ngic mong kuha monggoc, yeng yearu hama yegoc ewema firang anudeu yeng ngic yeac dzikacac iwaia wangecmidarude. Wangeru ama minginango dzikac wiac, imocac kucfu seria kefec, imoc kpac anu ngic kuha monggocngi yeac finaha hamangec mema hendzicma ngicngac goa yemmeude.

23 Ifi anu mong ye neac ogona mi ande, ye ubeango wanude. Nga mong ye nigoc mekpedzuc ua mi meude, yeng neac wiac sinsararang kpeudeac ua meude.”

24 “Asu seuhagoc yeng ngicfunac erema bangec dokuya kpac, ihai kemma tacnegenudeac tatic hofocma yerecema kecande. Kecma tatic mong mi meficgeudeu yengenaocngoc yofi deude, ‘Amana warac tacma wayai, imohai monggoc dzigenema kembadeac negenduae.’

25 Ifi dema kemma ama imoc wangge memen-gere angana henude.

26 Hemma monggoc kemma arengfora 7 wange-cyunuu hagecde. Arengfora imoc yeneng ye ferahema mangana yombong andae, yeni meyunuma kemma ama imohai enarangina anu tacgecde. Tacgec ngic ye warac mangana kefec, imoc ferahema imocac mangana yombong kefude.”

27 Yesungo yoac ifi demanu ngac mongngo habu yeneac botucfunac kpacma deec, “Ngac meguma namuu garengguec, ye kenehagoc.”

28 Kparu Yesungo imoc wama yofi deec, “Ngicngac Anutuac yoac negemma hoanggeandae, yeni kenecnginagoc.”

29 Ngicngac habu yeni engngoc hamangoc fegec Yesungo yoac torokpema yofi deec, “Naso yomocac ngicngac ngeni areng mangana yombong. Ngeni kucna isinggegecdeac faka kuhagoc fingecngemmeudeac derecgeandae. Nga ngeni faka kuhagoc mong mi ngemmengemmea, Yonaaru kucfaka fingerec, ifiasac henggecde.

<sup>30</sup> Niniwe taonggac ngicngac yeneng negensinggegedeac Kebungo Yonaaru faka kuhagoc meec. Nga siriha imocngoc Ngicac Medac yengenaoc ngicngac yomocngo negensinggegedeac fakaya kuhagoc meude.

<sup>31</sup> Seba bangecac ngactau ye Saromoac negen negentegec meudeac bangec tegiau sautfunac haec. Imocac amma yeng ising ising nasou ngicngac yomoc yenigoc yacma nammagec fakangina isinggema yeneac mangana deyemmeude. Anu negenggec, yomocngo\* Saromoac negen negeng ferahade. *(1 Ngictau 10:1-13)*

<sup>32</sup> Niniwe taonggac ngic yeni Yonaac dedekperagiyoac negemma ubamereng anggecac amma yeneng ising ising nasou ngicngac yomoc yenigoc yacma nammagec yeneac fakangina isinggema yeneac mangana deyemmegecde. Negenggec, yomocngo† Yonaac faka ferahade.

<sup>33</sup> Mongngo kifa kpedzereckema sufu sufuu me pake bageau naric mi faiude, ye kifa imoc tatahau faiu tacma kperagiu ngicngac yeni erema kperagia henggecde.

<sup>34</sup> Kicga imoc sebigaac kifa amma kicga gombunga fema sebiga sasawa mekperagidarude. Nga ge kickerec me kicmangang mekecma kicgango manganeudeu ine sebiga sasawa kundung kpeude.

<sup>35</sup> Imocac amma ge kperagia fegende, imoc kundung kpebacac amma garengemema kecbesena.

---

\* **11:31:** Yesungo yengenaac imoc deec. † **11:32:** Yesungo yengenaac negemma “yomocngo” deec.



36 Ge sebiga sasawango kundunga kpac kperagigoc feudeu sebiga kperagiango sokoma feude. Imoc kifa mong kperagitoayagoc mekperagiguande, ifi isoc.”

37 Anu Yesungo yoc demanungoc farisaio mongngo yegoc yaka neudeac heitaiu yeac amau emma taroc.

38 Matacma maria mi dzuacma yaka eng neudeac anu farisaiongo imoc hemma kpidohou

39 Kebungo ine yofi edeec, “Farisaio ngeni teratasengina ngadeasac dzuacandae nga ngeni uba-herengina manau ine kickerec amma wiac manganango wake wakea fede.

40 Ngeni negen negengtegecngina kpac. Kebungo ngadeau wiac meec, yeng manaac ifingoc meec.

41 Ngeni imocac amma ngicngac makpekpea wiac heregoc yemmebisia. Ifi anggec wiacngina sasawa dzuac dzuara anude.

42 Farisaio, ngeni romboc nga gime amma mondzangngina sasawa imocac kpete mema 10 imohacnac mocgu hendzicma Anutu miandae. Nga faka dindingac nga heregoc Anutuac songo negembesonga, imoc ine ihoc bahoc amma waandae, imocac ngeni sowecnginagoc. Ngeni faka gombunga imoc modacbisia amma tosea mi wabisia.

43 Farisaio, ngeni kpekpeturang amau tatarac warac warac imohai tacgecdeac angemmeande nga ngicngac yeneng kpedzaroc sobennu eweheihei faka angemmegecdeac songo negengandae, imocac ngeni sowecnginagoc.

<sup>44</sup> Kicsere esea mong wiaha kpac ngic yeneng mi negemma eng witiau kengha andae, ngeni kicsere ifia isoc kecdae, imocac ngeni sowecnginagoc.”

<sup>45</sup> Ifi deu dedeseriyoacac negen negengngic yenearunac mongngo edeec, “Kpoukpou, ge ifi dema neni ifingoc denggarinnununec.”

<sup>46</sup> Ifi deu Yesungo yofi merenec, “Dedeseriyoacac negen negengngic, ngeni ifingoc sowecnginagoc. Ngeni ngic yeneac ngadenginagoc finac ngicngoc memecac soc kpac, imoc faiandae nga ngenang ine ngicngac ebicngina efea anude, imoc meficyunugecdeac gbongngina mong mi sinegecde.

<sup>47</sup> Bangecfocnginango profete esea yunuhomegec homegecmoc yeneac kicsereu simengngina miacandae, imocac ngeni sowecnginagoc.

<sup>48</sup> Yeneng profete yunuhomegec nga ngeneng kicserengina simenggoc miackeandae, ngeni ifi amma yofi dekperagidae, ‘Neni fakaninagoc uba mocgu kecdimbe.’

<sup>49</sup> Ngeneac amma Anutuac negen negentegecngoc bicngoc yofi deec, ‘Ni profete nga aposoro yenearu sueyunuba yeneng goa yunuhomegecde nga goa yunukporac ayemmegecde.’

<sup>50</sup> Imocac amma bangec hanac hanaheaunagoc erekecma profete yunuhomegec sacngina maec, imocac turunga yagucac ngicngac kecdae, ngenearunagoc kpoudacgecde.

<sup>51</sup> Turung imoc Abeac sacfunac hanahema erekecma Dzekariaac sacfu erede. Yeni Dzekaria arata nga kpetiac ama botucngirau kpehomegec. Oc, ngicngac areng yomoc ngeneng turunga imoc kpoudacbisia, imoc edengunuduae.

<sup>52</sup> Dedeseriyoacac negen negengngic, ngeni Anutu negemmigeceac ki, imoc ngicngac yenearunac meickegec. Amma ngenang imohai mi emma ngicngac yeneng embesonga ammagec ine kpae bic faiandae, imocac ngeni sowecnginagoc.”

<sup>53</sup> Anu Yesungo wama ngadeau kemeu mitiac negen negengngic nga farisaio, yeneng yeac negemmangang amma kpesi kpesi hania hania kpesimigec.

<sup>54</sup> Yeni, “Yoac goa segeu meni.” dema yeac gareng mema kecgec.

## 12

<sup>1</sup> Ngicngac homac yombong, teng tauseng nga noc ifiacsoc yeni kpezucnema nanggecac yenaocngoc timbimbingemegec. Nga Yesungo medacfora, yeneac negemma yofi deec, “Ngeni farisaio yeneac ikoc fakangina imocac henghomema kecbisia, imoc yis isoc ic sogonnu sokoude.

<sup>2</sup> Wiac mong sangoyagoc fede, imoc kecma nonongkac fingectegerude nga sufu sufuya fede, imoc negendacgecde.

<sup>3</sup> Imocac ngeni kundunnu yoac sasawa deandae, imoc kperagiau negenggecde nga ama mana kapiau kedzacnginau sangic deandae, yeni imoc ama witiau namma dekperagigecde.

<sup>4</sup> Nga tosofocna, ngic goa yeni sebingina kpehomegecdeac kuc mekecma monggoc memanganungungecdeac kuc hofocandae, ngeni yeneac mi kengecngunubeso, imoc edengunuduae.

<sup>5</sup> Ngeni ine Kebu monggacsac damungunubeso. Yeng ngunuhomema gerechofeu ukungunuu ke-

megecdeac uayoac nga kuc mekecede. O, yofi deduae, ngeni yeac ine damungunubeso.

<sup>6</sup> Ngicngac yeni nengbisc 5 faigec peni yohockang sacsacngo bummeandae nga Anutungo neng imoc yeneacunac mong naric mi nigeckpeude.

<sup>7</sup> Amma ngeneac orucdzongina kpete, imoc ifingoc oso osodara. Nga ngeneng sawaac nengarengtoa yeni feracyunudae, imocac ngeni mi kengecngunubeso.

<sup>8</sup> Ngic mong ye ngic yeneac kicfu Ngicac Medac yeac deande, 'Ni yeac areng anduae.' ifi deu Ngicac Medacngo yeac ifingoc Anutuac angerofora yeneac kicfu yofi deude, 'Ye neac ngic.'

<sup>9</sup> Nga ngic mong ye ngic yeneac kicfu ine ni basicnuude, neng ye ifingoc Anutuac angerofora yeneac kicfu basic kpebade.

<sup>10</sup> Ngic mong ye Ngicac Medac emmiude, yeac kopocsic wamigece nga mongngo Tiri Asu denggaringgema emmiude, imocac kopocsic wawaya ine mi fede.

<sup>11</sup> Ngic yeneng mengunuma kpekpeturang amau nga yoacgarenggac enara nga ngickuneng, yeneac kicfu faingunugece, ngeni naso imohai negengyohoc amma yofi mi debisia, 'Neni turunga dafi merennide nga noc yoac denide?'

<sup>12</sup> Naso imohaingoc Tiri Asungo yoac enacnginau faiu ngeni imoc debisia."

<sup>13</sup> Anu ngicngac habu yeneac botucfunac ngic mongngo Yesuac deec, "Kpoukpou, dacna ye mannaac maridzoming tembuha mekecede, imocac geng dena noboha ni mederema nenu."

14 Ifi deu Yesungo yofi meremmiec, “Ngic, ngereac iwai mederema gareng ambadeac mongngo mi fainuec.”

15 Ifi dema torokpema yeneac yofi deec, “Ngeni dzofinactoaac kichodung ambauac garengngina mebisia. Ngic monggac dzofinactoa, imocngo yengena kekehaac siriha mi heficgeude.”

16 Ifi dema yoac mong heima yofi edeyunuec, “Ngic dzofinactoaac mongngo uayau semeng fora homac anu

17 semenga dahai faiudeac negengemema

18 yofi ambade negenec, ‘Ni semengama dafiguc mekecduae, yeni hembarackema monggoc meyadiyunuma mema semeng nga wiacna gombunga sasawa kpedzucnema ihai kpeturangebade.

19 Kpeturangeba wisickeu neanna ubaonganaac yofi debade, ni kifa homacacsoc wiac gombunga bic kpedzucnedua, imocngo kekecna meefaiu menec amma sogac sogaigoc kecbade.’

20 Ifi deu Anutungo yeac yofi deec, ‘Kapangic, tofocnac yomohaingoc kekecga wangecgugecde. Nga wiacga mekpedzuc amma wanade, imoc goa yeneng megecde.’ ”

21 Nga Yesungo monggoc torokpeec, “Ngic mong ye yengenaac amma bangecac dzofinactoa mekpedzuc amma Anutuac kicfu ine dzofinaha kpac kecde, yeac kekeha imocacsoc anude.”

22 Imocac amma Yesungo medacfora yofi edeyunuec, “Neni noc yaka nenide nga sebininau noc wamba heima kecni. Ngeni imocac kekecnginaac defagung mi ambisia.

23 Kekecngo yaka ferahaude nga sebingo ngakpikporuc ferahaude.

24 Ngeni wondong yenenggec. Yeni heikpenec nga netohong mong mi negenggec Anutungo sifu eng semeng yemmekecde. Nga Anutuac kicfu ngeneng neng yeneac engena andae.

25 Ngenearunac mongngo dewaidzoc amma kefu imocngo kekecnasoya kapianec monggoc naric mi mehereeude.

26 Ngeni wiac kapia ifiaac obohoma tosea goaac ifingoc negengyohoc mi ambisia.

27 Dzaring eng tohoandae, ngeni yenembisia. Yeni witic mi yumuandae amma uatoa mi mema sifu yadiandae. Ngictau Saromongo warac wamba kibia gombunga gombunga heikefu kibikperagitoayango ine dzaring yeneac kibi kereng kereng mi ferahaec.

28 Nga dzaring amasobennu eng tohoandae, yeni yagucac fingeadae nga ngic yeni wereckenu herecgema gerecfu ukuyunugecde. Nga Anutungo dzaringtehec ifia wamba heiyemmeudeu yeng ifingoc ngicngac negen negensingnina kapia mekecdae, ngeni ngakpikporucngina torokpeu torokpe imoc monggoc ngemmeude.

29 Imocac ngeni noc yaka nga doku dahacnac fima negecdeac negengyohoc nga demadzac imoc wabisia.

30 Nga bangeha bangeha ngicngac yeneng imoc megecdeac negen negengngina imohai faigec fekecde. Nga ngeni wiac imocac obohoandae, Mangnginango imoc bic negende.

<sup>31</sup> Ngeni yeac eucerereng meficgegecdeac ua mebisia nga wiac imocnoc ifingoc torokpeu torokpe megecde.”

<sup>32</sup> “Habubisic, ngeni mi ebiribisia. Mangngina ye eucererenga ngemmeudeac negenu ngereede.

<sup>33</sup> Ngeni finacngina suegec ngicngac yeneng imoc bummedacgec ngeni dzo imoc mema ngicngac makpekpea kecdae, yeni ubangerecac wiac imoc yemmebisia. Ngeni dzobirang mi barackeudeac meficgebisia. Nga ngeni dzofinac kuha mi maude, imoc kurumennu kpedzucnebisia. Ihai hamangecngic yeni mi hagecde nga dzaukpadzadzangngo wiac mi memanganeude.

<sup>34</sup> Imoc yofiac, ngeni dzofinacngina nofu faigec fede, imohaingoc ubasongongina ifingoc feude.”

<sup>35</sup> “Ngeni kporucngina seria kpema kifangina kpedzereckema efaima kecbisia.

<sup>36</sup> Ngic kuneng ye memeturang amaunac hama naguu heiu ua ngihango yeac tomai kecma nagu bic witimiude, ngeni ifi isoc tomai kecbisia.

<sup>37</sup> Nga mingingnginango hama uamedacfora yeni gaugbori kecgec meficcyunuude, yeni kenecnginagoc. Foracngoc, ye yengenaoc yeneac kingang kpeudeac kporuha mewegenema ‘Ngeni tacmagec.’ deu tacgec yaka meha yemmeu negecde, imoc edengunuduae.

<sup>38</sup> Ye tofocnac dzongiau me ama werec wereckenggac gaugbori kecmagec hama yenenudeu uamedac imoc yeni kenecnginagoc.

<sup>39</sup> Hamangecngic ye ama hetackema engande. Nga ama mingina mong ye hamangecngic noc

nasou haude negendeu ye hamangecngic kpae heimiude.

<sup>40</sup> Nga ngeni Ngicac Medacac aua mi negemmagec ye haude, imocac amma ngeni ifingoc efaima kecbisia.”

<sup>41</sup> Anu Petorongo deec, “Kebu, ge yocac heima dedammoc, imoc neneac me ngicngac sasawa yeneac denec?”

<sup>42</sup> Ifi deu Kebungo yofi merenec, “Amagareng gombunga mong negen negentegehagoc minginaac yocac dede modacande, minginango amagareng ifia uayoac miu ye uamedacfora yeneac enarangina amma yaka nasou hendzicma deecfu negecdeac yemmekefude.

<sup>43</sup> Yemmekefu minginango dzigene hama henu uamedacngo ua imoc medarudeu uamedac ye kenehagoc.

<sup>44</sup> Foracngoc, minginango wiara sasawa garenggeudeac demiude, imoc fora yombong.

<sup>45</sup> Anu wanacngic mong ye yengenaocngoc ine yofi negensiudeu, ‘Minginnango bic mi haude.’ Ifi dema ua ngicngac goa yunuma minginaac wiac nedacma doku seria nema ubea sufuude.

<sup>46</sup> Ifi anudeu wanacngic ye tomai mi kecma minginaac uamemenaso nga auaya mi negemanu minginango haude. Hama uamedac imoc herecge meickeu kemema negen negensingngina kpac, yenigoc kefude.

<sup>47</sup> Nga wanacngic mong ye minginaac yocac negemma mi efaima kecde, yeng dzikac ebiria kiude.

<sup>48</sup> Nga wanacngic mong ye minginaac uayoac nga songo mi negemma dzikacac arennu faka



goa angande, ye dzikac efeaneacsac kiude. Ng-icngac yeneng ngic mong wiac ebiria migec mekecde, yearu wiac ebiriangoc fingecmiudeac negenggecde. Nga yeni ngic mong wiac homac garenggeudeac uayoac migec mekecde, yeng wiac monggoc negen negengtegecgoc garenggeu imoc mi memanganeudeac negenggecde.

49 Ni bangecfu gerec habuya habuya fiba dzeudeac mayai. Amma gerec imoc bic dzebacfu ubana ngereebac.

50 Amma ni dokunadzic siriha mong nadz-ichesare. Ni imoc negemma herenango ebiriu kecma uana imoc hafoangoc wisickeu herena ngereeu.

51 Ni bangecfu ruae meficgebadeac mayai, ngeni imoc mi negembisia, imoc kpac. Ni ine tohoemegecdeac mayai, imoc edengunuduae.

52 Nga yofinenggac nga namma enude, imohai ngicngac 5 ama mana monnu kecdae, yeni tohoma kecgecde. Harebec yeneng yohockang yerigoc nga yohockang yeri harebec yenigoc ngaba ngaba angemegecde.

53 Yeni tohoma manggacngo medac yegoc ngaba anude nga medac yeng mamagoc ngaba anecde. Nenggac ye naroangagoc ngaba anude nga naroangngo nonggeagoc ngaba angemeecde. Nga erangi yeri tohoemema ngaba angemeecde.”

54 Anu Yesungo ngicngac yeneac yofi deec, “Ngeni wenac keme kemeau hoeng mong hemma yofi bic deandae, ‘Kia kuneng kpeude.’ ifi degec kia kpeude.

<sup>55</sup> Nga sautfunac firang kpeu negemma yofi de-andae, 'Bangec gerea anude.' degec ifi angkecde.

<sup>56</sup> Ikocngic, ngeni bangecfu nga sawau wiac fingecande, imoc hemma naric isinggegecde. Nga naso yofinenggac kecdimbe, imocac faka hemma isinggebau dede imocngo naric ambac.

<sup>57</sup> Amma ngeni faka damocngo dindingac ande, imoc ngenaoc isinggebau dede imoc naric ambac.

<sup>58</sup> Anu ngabaga mongngo yoacfu faiguudeac meguu ngerahafoc sinnu kengkecdape, ge imohai yoacngira dengereecdeac uatoa mebesena. Ifi mi annadeu ye desi desingic yearu faiguude. Nga desi desingicngo keracnatanggaru faiguu keracnatangngo witicamau faiguude.

<sup>59</sup> Faiguu ge ihai takecma ngabagaac turung hafoangoc nga dzo wisic wisickea yombong kpoumaguc witicamaunac manade, imoc edeguduae."

## 13

<sup>1</sup> Naso imohaingoc ngic goa yeneng Yesu siduc yofi ammigec, "Gariraiangic goa yeni sesenginaac yang Anutuac hosuc heimagec Piratongo deu ngicfora yeneng kemma yunuhomema sacngina imoc sesenginaac yang sawagoc meturanggegec."

<sup>2</sup> Ifi degec Yesungo yofi kpesiyemmeec, "Ngc homegec, yeneac kopocsicngo gariraiangic sasa yeneac kopocsic ferahaecac ifi fingecyemmeec, ngeni imoc negensidae me?

<sup>3</sup> Nga imoc kpac yombong. Ngeni ubangina mi merenggecdeu ngeni sasawango yeni homegec, ifi isocngoc homedacgecde, imoc edengunuduae.

4 Nga Siroang amaherecngo barackema ngicngac 18 witinginau mama yunuhomeec. Imocac ngeni dafi negensidae, yeneac kopocsicngo Yerusarennu ngicngac sasawa kecdae, yeneac ferahade me?

5 Imoc kpac yombong. Nga ngeni ine ubangina mi merenggecdeu ngeni sasawango yeni homegeg, ifi isocngoc homedacgecde, imoc edengunuduae.”

6 Anu Yesungo yoac mong heima yofi edeyunuec, “Ngic mong ye fig ic mong waing uayau homeru nanec. Nanu ye kemma fora hofocma

7 waing uaac gareng edeec, ‘Ic yomocac fora hofocma kecbare kifa harebec bic ande nga ye nocac eng namma bangec kereha nedarude? Imocac ic imoc herecgema ukuna.’

8 Ifi deu waing uagarengngo deec, ‘Kunenna, ge imoc wana kifa yomohai ifingoc nammanu haniau usuma bangec goa kerehagoc heikecbesare.

9 Ifi amba ngadeguc fora gombunga anude gedang. Nga fora mi anudeu ge naric herecgema ukubesena.’ ”

10 Sabata naso monnu Yesungo kpekpeturang ama monnu emma kpoukpou ua meec.

11 Meu ngac mong imohai tarec, ye hafeiac hadehade mongngo ngadea mendanggeu ngadehokuc kefu kifaya 18 bic anu naric mi kpehen-gaibac.

12 Nga Yesungo ye hemma yearu haudeac kpacma edeec, “Ngac negenna, ni hafeiga meickeba kpac ande.”

13 ifi dema maria witiau faimanu ngac ye

ngadea bic kpehengaima sorongaiu yacma namma Anutu dengereec.

<sup>14</sup> Ifi anu kpekpeturang amaac gareng yeng ine Yesungo sabatau mengec mengere ua meecac herebu negemma ngicngac edeyunuec, “Uameme 6 fede, imohai ua mebesonga. Ifi anu ngeni nasou imohai hagec mengerengunugecde nga sabata nasou ine kpac.”

<sup>15</sup> Ifi deu Kebungo meremmiec, “Ikocngic, ngeni sasawa burumaka nga donggifocngina doku yem- megecdeac sabata nasou yungecyunugec, yeni amanginaunac magec meyunu kengandae, imoc- ngo ngereede.

<sup>16</sup> Nga ngac yomoc Abrahanggac naroannoc, ye ine Satangngo kifa 18 bic dzegeu kecmanu sabata nasou yungec yungera anude, imoc negenggec ifingoc ngereede.”

<sup>17</sup> Yesungo ngabafora turunga ifi merengyem- meu yeni gameyunudarec. Nga ngicngac tosea yeni ine faka engena sasawa meu henggec, imo- cac sogac sogai andacgec.

<sup>18</sup> Imocac Yesungo yofi deec, “Ni noc wiacfusing yoac heiba ngeni Anutuac eucererenggac siriha naric negengecgecde?”

<sup>19</sup> Imoc mastet gbomea isoc, ngic mongngo mas- tet gbomea mema uayau homeru yadima ic we- gena anu sawau neng yeneng hama fawau faec heigec.”

<sup>20</sup> Ifi dema Yesungo monggoc deec, “Anutuac eucerereng, imoc noc wiacfusing yoac heiba ne- genggecde,

21 Imoc yis isoc, ngac mongngo farawa 20 kiroacsoc meu uuha yisgoc yerecgema meu hafaogoc yisagoc anude.”

22 Yesungo taong nga amabiscifu yerecgema ng-icngac yenearu kpoukpou ua mema Yerusarennu kenudeac kenec.

23 Kemmanu ngicngac goa yeneng kpesimigec, “Kebu, ngicngac efeanec, yenengsac komoc kpegecde me?” ifi degec Yesungo yofi merenec,

24 “Ngeni nagu kapiau enggecdeac ua seserigoc mekecbisia. Ni edengunuba, ngicngac homac yeni Anutuac eucererennu enggecdeac uatoa mema obohogece.

25 Nga ama minginango yacma nagu heiu ngeni ngadeau namma nagu heima degecde, ‘Kebu, nagu witinemmena ereni.’ Ngeni ifi degec yeng merengngemmema yofi deude, ‘Ngeni dahacnac? Ni mi negengngunuduae.’

26 Ifi deu ngeneng degecde, ‘Neni gegoc nenedoku neing nga geng neneac sinnu namma edekpou anemmenec.’

27 Ifi degec, yeng ine monggoc edengunuude, ‘Ngeni dahacnac? Ni mi negengngunuduae. Man-ganameme, ngeni neac kicfunac meickegec.’

28 Ngeni Abrahang nga Isaka amma Yakobo nga profete sasawa Anutuac eucererennu tacgec yenenggecde. Nga ngeni ine ngadeau ukun-gunugec kemegecde. Ihai ngeni kiacma enac kisaranggema kegcgecde.

29 Nga ngicngac yeni wenac ere ereaunac nga keme kemeaunac amma nort amma sautnac-ngo hama Anutuac eucererennu tacma neneyaka negecde.

<sup>30</sup> Amma goa ngadea kecandae, yeni warac warac anggecde nga warac warac kecandae, yeneng ngadea anggecde.”

<sup>31</sup> Naso imohaingoc farisaio goa yeneng hama Yesuac degec, “Herodengo gubeso andeac bangec yomoc wama kenna.”

<sup>32</sup> Ifi degec Yesungo yofi merengyemmec, “Ngeni kemma katekasi imoc yofi edegec, ‘Negenec, ni yaguc nga wereckenu hadehade nga yafing kporacyunuma hafeigoc mengereyunuba uameme harebecfu uana wisickeude.

<sup>33</sup> Ni yaguc nga wereckenu amma wereu kengkecbade. Profete yeni bangec goau naric mi yunuhomebesonga, kpac. Yeni Yerusarennusac yunuhomebesonga, faka ifi fede.’

<sup>34</sup> Yerusareng Yerusareng, ge profete yunuhomeannec nga ngic gearu sueyunuyunuya, yeni hocngo yenereannec. Nga Kokorec nonggeango nambaracfora kpeganga bageau foforacyunuande, ni ifi isoc naso homac nambaracfocga kpedzucngunubadeac negembare ngeneng ine imocac songo mi negenggec.

<sup>35</sup> Nengendae, amangina kisi nanude nga ngeni monggoc mi nenggecde kecma yofi degecde, ‘Ke-buac kpacfu ngic hade, ye kenehagoc.’ ifi degecde, imohai ngeneng monggoc nenggecde.” (*Mitiyegec 118:26*)

## 14

<sup>1</sup> Yesungo sabata naso monnu farisaio yeneac enarameme monggac amau yaka neudeac enu

farisaio yeneng yeac haifaka hennegeng amma tacgec.

<sup>2</sup> Imohai ngic mong sebia yadi yadia, yeng hama Yesuac kicfu nanu

<sup>3</sup> Yesungo dedeseriyoacac negen negengngic nga farisaio yofi kpesiyemmeec, “Sabatau ngic mengec mengereyunuac sing mong fede me kpac?”

<sup>4</sup> Ifi deu yeni turunga mong mi merenggec Yesungo ine ngic imoc maringo mema men-gerema sueu kenu

<sup>5</sup> yofi edeyunuec, “Ngenearunac monggac medac me burumaka mongngo dokuteng monnu kemeu sabata naso anu ye sifu bic kemma kpedziu ereude.”

<sup>6</sup> Ifi deu yeneng yoac imocac turunga merem-migeceac obohogec.

<sup>7</sup> Anu imohai ngic heitaiyunuyunuya goa yeneng tatac warac warac isinggema ihai tacgec Yesungo yenensima yoac heima yofi dema edeyunuec,

<sup>8</sup> “Ngc mongngo memeturanggac yakau heitaiguude, imohai ge yakaac tatac warac waracfu bic mi tachesena. Ngic heitaiyunuyunuya, yenearunac mongngo gedang geac engena anu

<sup>9</sup> ngic ye nga ge ngerahafoc heitainguruec, yeng hama yofi edeguude, ‘Ge meickemana ngic yomocngo taru.’ Ifi deu gameguu tatac wisic wisickeau yombong kemma tacnade.

<sup>10</sup> Ngic mong heitaiguu ge ine kemma tatac wisic wisickeau tachesena. Ifi anna ngic heitaiguec, yeng hama gemma yofi gedang deude, ‘Tosona,

ge tatac warac waracfu ekemma tacna.' Ifi deu ngicngac bic tacdae, yeneac kicfu eweheihei anggenude.

<sup>11</sup> Ngic mong ye yengena sebi meengande, ye memagecde nga mong ye sebia memaemeande, ye meenggecde."

<sup>12</sup> Nga Yesungo ngic heitaiec, yea ifingoc yoac mong yofi deec, "Ge wenacfu me marai yakaneneac areng goa heitaiyununade, imohai ogofocga me dacmunac me arengfocga me dzofinacnginagoc geac wegenacfu kecdae, yeni mi heitaiyunubesena. Yeneng turunga gedang monggoc kpougenggec sing imohai turunga bic menade, imoc mi ngereede.

<sup>13</sup> Ge heitaiyununadeac yaka mengerenade, naso imohai ine ngic makpekpea nga sebimangang nga hanimangang amma kicpisc heitaiyunubesena.

<sup>14</sup> Ge ifi amma kenecgagoc annade. Imoc yofiac, ngic imoc yeni turunga kpougenggecdeacsoc mi anggecde. Nga geng yaka imocac turunga imoc ngicngac dindingac gborima yacgecde, naso imohai menade."

<sup>15</sup> Ifi deu yeni yaka netacma yoara negenggec yeneacunac ngic mongngo Yesu edeac, "Mong ye Anutuac eucererennu emma yaka netarude, ye kenehagoc."

<sup>16</sup> Ifi deu Yesungo yofi edeac, "Ngc mongngo nese-meng kuneng mengereudeac negemma ngicngac homac yeneac yoac faima heitaiyunuec.

<sup>17</sup> Heitaiyunuu yakaneneac naso hau ye wanacngiha sueu yeng ngic heitaiyunuec, yeni



edeyunuudeac kemma deec, ‘Hagec, wiac sasawa bic mengereding tacde.’

<sup>18</sup> Ifi deu ngic sasawango degbedic amma ngic warac warac yeng deec, ‘Ni bangec mong bummedua, imoc hembadeac kembeso negenduae, imocac negenna mi manganebeso.’

<sup>19</sup> Nga mongngo deec ‘Ni burumaka ngiwa 10 uaac amma bummedua, imocac kemma uau to-bangyunubeso negenduae, imocac negenna mi manganebeso.’

<sup>20</sup> Ifi deu ogongira mongngo deec, ‘Ni ngac medua, imocac amma naric mi habade.’

<sup>21</sup> Nga wanacngic ye kemma yocac imoc sasawa mingina edeu minginango herebu negemma wanacngic yofi edeac, ‘Ge taonggac sinnu nga singbisicfu bic kemma ngicngac makpekpea nga sevimangang amma kicpisis nga hanimangang, yeni hesicyununa hagec.’

<sup>22</sup> Ifi deu wanacngicngo kemma deec, ifi isoc amma dzigenema yofi edeac, ‘Kunenna, ge dedang, imoc bic andacdua nga ama manau ine tatak fedengoc.’

<sup>23</sup> Ifi deu minginango deec, ‘Ge singtoa nga singbisic fedacde, imohai kemma ngicngac yenemma hagecdeac serima dema hesicyunuma hana yeni amana mana yomoc mewakebisia.

<sup>24</sup> Ngic heitaiyunuyunuya, yeneacunac mongngo yakana ohoai, imoc naric mi nehembesande, imoc edengunuduae.’”

<sup>25</sup> Yesungo kenu ngicngac habutoango ye modacma kenggec dzigenema yenemma deec,

<sup>26</sup> “Ngic mong ye hama modacnubeso negen-side, ye yengena nonggomama nga eneng nam-

baracfora amma dacmunac nga yengena kekeha ifingoc mi ngadeheudeu ua medacna naric mi anude.

<sup>27</sup> Nga mong ye yengena mariponga mi tofohoma modacnuudeu ye medacna naric mi anude.

<sup>28</sup> Ngenearunac ngic mongngo kicfifiac amaherec mebesonga negende, ye ama naric medarude me kpac, imocac waicke tacma hanahema iwaiac buma osoareng andarudeu ngereeude.

<sup>29</sup> Nga ye hanahema ifi mi amma eng simenga yerecgema faima ama tosea mi medzickebac dede ngicngac yeneng imoc hemma deendema am-mima

<sup>30</sup> yofi degecede, 'Ngic yomoc ye ama mebesonga amma kuha mong mi feecac ama ua mi mesiec.'

<sup>31</sup> Anu ngictau mongngo ngicfora 10 tauseng eng meyunuma kemma ngictau mong ye ngicfora 20 tauseng, yenigoc ewegecede, imoc mi ngereeude. Ye matacma yofi isinggemaguc anude, neac ngicfocna 10 tauseng yeneng ngabafocna hagecede naric yunugecede me kpac.

<sup>32</sup> Imoc naric mi anudeu yeni hereaungoc kecmagec yeng gubekisang ngic ruae dafi fingerudeac sueu kenude.

<sup>33</sup> Imocac ngenearunac mongngo yengena wiac sasawa mi ngadehedarudeu ua medacna naric mi anude.

<sup>34</sup> Kondung imoc wiac gombunga. Nga kondungngo kiacma songea kpac anudeu ine ye songea monggoc naric mi meficgeude.

<sup>35</sup> Kondung ifiango yaka sereau ukuni memefic mi anude nga bangec kereha semeng uau faian-

dae, imocgoc kpeturanggenideac siric ifingoc mi ande. Imoc eng ukuandae. Kedzahagoc yeng yoac yomoc negembeso.”

## 15

<sup>1</sup> Takesimeme ngic nga manganameme sasawa yeneng Yesuac yoac negembesonga yeac hoannu kendacgec.

<sup>2</sup> Nga farisaio nga mitiac negen negengngic yeneng negenggec imoc naric mi anu nasosoc yofi dekecgec, “Ngc yomoc ye manganameme hoangyunuma yenigoc yaka neande.”

<sup>3</sup> Ifi degec Yesungo yoac mong heima yofi edeyunuec,

<sup>4</sup> “Ngeneacunac ngic mong ye ramafora 100 femide. Ifi femiu yeneacunac rama mong su-fuudeu minginango dafi anude? Ye rama 99 wayunuu bangec kisiu nanggec kemma mocgu imoc hofockecma meficgeude.

<sup>5</sup> Meficgema ubangerec negemma fuayau faima tofohoma mekenude.

<sup>6</sup> Mekemma ameau kensikema ngic ogofora nga tosofora wegenac kecdae, yeni kpacyunuma yofi edeyunuude, ‘Ngeni hagec nenahafoc sogaini. Ni ramana sufuec, imoc meficgedua.’

<sup>7</sup> Ifi isoc ngic kopocsihagoc mocgungosac ubamereng anu sogac sogai siriha imocngoc kurumennu fingerude, imoc edengunuduae. Nga ngicngac 99 yeni ubamerenggac sing mi obohoma kpetiac bic kecdae, yeneac amma sogac sogai ifia mi fingerude.

<sup>8</sup> Me ngac mong ye siriwa dzoya 10 mekecma mong ukuu sufuudeu ye dafi anude? Ye kifaya

kpedzereckema ama wanggema serima hofock-engkeckema meficgeude.

<sup>9</sup>Meficgema ngac ogofora nga tosofora wegenac kecdae, yeni kpacyunuma yofi edeyunuude, ‘Ngeni hagec nenahafoc sogaini. Ni dzona ukuba sufuec, imoc meficgedua.’

<sup>10</sup>Nga ngic kopocsihagoc mongngo ubea merenu Anutuac angero yeni yenahafoc ifingoc sogaigecde, imoc edengunuduae.”

<sup>11</sup>Yesungo torokpema deec, “Ngcic mong ye medahora yohockang kefoc.

<sup>12</sup>Nga medaha kapiango mama edeec, ‘Mang-gac, ge dzofinac goa hendzicma neac nobohana nenna neannaoc mekecbade.’ Ifi deu mangngi-rango iwaiya hendzicma medahora yemerec.

<sup>13</sup>Yemeru naso mi hereemanu medaha kapia ye dzofinaha kpedzucnedacma mema bangec hereau kenec. Kemma imohai bangecac sicsauck-ekcfu dzofinactoya mekefec, imoc ukudarec.

<sup>14</sup>Ukudaru kpac ammanu bangec imohai bodi-toa fingeru ye yaka nga wiac sasawaac obohoec.

<sup>15</sup>Obohoma bangec imocac mingina mong yearu kemma ogo ammiu yeng bereha garenggeudeac berecodau sueu kenec.

<sup>16</sup>Kenu berec yeneng yaka sebera negec, imoc neudeac ammiac nga mongngo ine yaka mong mi gumegec.

<sup>17</sup>Ifi anu ye yengenaoc kekeha hentegecma deec, ‘Mannaac uamedacfora yaka negebec angandae. Nga neng ine yei yakaac homema homebeso anduae.

<sup>18</sup>Imocac ni yacma mannaaru kembadeac nengenduae. Kemma yofi edebade, “Manggac, ni ku-

rumeng arenggac nga geac kicfu momoc kopocsic meficgeai,

<sup>19</sup> imocac monggoc medacga kpacnugecde, imoc mi ngereeude. Ge sifu menuna yagurangicfocga yenearunac mong isoc amma kecbesare.” ’ ifi negemma kenec.

<sup>20</sup> Amma medac ye hereaungoc kemmanu mamango bic hemma yeac ubea manganeu yearu nedzima kemma tofohoma titikokoc ammiu

<sup>21</sup> medacngo deec, ‘Manggac, ni kurumeng arenggac nga geac kicfu momoc kopocsic meficgeai, imocac medacga monggoc kpacnugecde, imoc mi ngereeude.’

<sup>22</sup> Nga manggacngo ine wanacngicfora yofi bic edeyunuec, ‘Ngeni bicbic kemma ngakpi-herec gombunga yombong mehama heimigec kemeu gbonggac ring heimima hanitabe haniau heimigec kemeu.

<sup>23</sup> Ngeni kemma burumakamedaha gbofoma, imoc mehagec kpema nenahafoc nesogai anni.

<sup>24</sup> Medacna yomoc ye bic homeec, ifi negening ammanu ye kekec monggoc meficgedac. Ye sufuecfunac monggoc meficgeding.’ Ifi deu yeni nesogaitoa anggec.

<sup>25</sup> Ifi ammagec medaha kunengngo semeng uau kecma ihacnac ama mewegenema hama ine musi nga yegec fede fedeac udumeng negemma

<sup>26</sup> uamedac mong kparu hau kpesimiec, ‘Noc faka fingece?’

<sup>27</sup> Ifi deu uamedacngo turunga yofi merenec, ‘Munagango kpesipiriha kpac gombunga amau monggoc dzigenedacac amma manggango deu burumakamedaha gbofoma kpeding.’

<sup>28</sup> Ifi deu dara ye herebu mefigema ngadeau namma amau enudeac mi ammiu mamango mama amau enudeac demekiri ammiu

<sup>29</sup> darango mama edeec, 'Negenna, ni kifa dafiguc geac wanac ua mema kecma yoacga mong mi kpeai. Ifi mekecha ogofocna yenigoc non-ingmedaha mong nenideac mong mi nennec, kpac.

<sup>30</sup> Nga medacga imoc ye iwaiga singtoangacgoc kecma ukuma hau geng ine yeac amma burumakamedaha busia kuneng kpenec.'

<sup>31</sup> Ifi deu mamango deec, 'Medacna, ge nasosoc nigoc kecanec nga neac wiac sasawa imoc geacnoc.

<sup>32</sup> Nga nenang yaguc ubangerec negemma nesogai ambisina. Munaga yomoc ye bic homeec, ifi negening ammanu ye kekec monggoc mefigedac. Ye sufuecfunac monggoc mefigedingac ifi anni.' "

## 16

<sup>1</sup> Yesungo medacfora yoac yofi edeyunuec, "Ngic mong dzofinacgoc yeng dzogareng ngic mong meec. Meu yeng yegoc kecma yeac dzofinac garenggekefec. Garenggekefu goa yeneng yeac yofi dema edegec, 'Dzogarengga imoc ye dzofinacga mi garenggema sicsauc faiande.' Imocac amma yeng dzogarenga kparu hau

<sup>2</sup> edeec, 'Geac fakaga mangana degec negengkecduae. Dzogarenga monggoc naric mi kecnade. Ge imocac dzofinacac nga uagaac siduc hafoangoc ohoma nenna.'

<sup>3</sup> Ifi deu dzogareng yengenaocngoc yofi negenec, 'Ngickunennango dzogareng ua nearunac meickeude. Nga ni ama uamemeac osiduae amma kucna mi fede, derecgenecngic ambadeac gamenude, imocac dafi ambade?'

<sup>4</sup> 'O, yaguc negenduae. Uaunac meicnugec kpac anu goa yeneng amanginau heitainugecdeac faka mong ambade.'

<sup>5</sup> Ifi negemma ngic sasawa kunengaac turung mekecgec, yeni tembuc tembuc kpacyunuec. Kpacyunuu ngic warac enec, ye kpesimiec, 'Ge kunenna yearunac turungga dafiguc annec?'

<sup>6</sup> Ifi deu meremmiec, 'Oriwa kereha kes 600.' Ifi deu edeec, 'Ge turungkibiga mema bic tacma kes 300sac ohona.'

<sup>7</sup> Dema ngic mong kpesimiec, 'Nga ge turung dafiguc annec?' Kpesiu meremmiec, 'Wit toru 800, imocacsoc.' Ifi deu edeec, 'Ge turungkibiga mema 640sac ohona.'

<sup>8</sup> Anu dzogareng mangana ye negengising amma anecac dzofinac minginango dengereec. Nocac bangectoa bangec yomocac medacfora yeni kperagiaac medacfora ferahema ebiriangoc meficemeandae.

<sup>9</sup> Neng ine yofi edengunuduae, dzofinac yengenaocngoc fakaya dindingac kpac, ngeni wiac imoc mema ogo gboria meficgebisia. Ifi anggec dzofinacac naso kpac anude, imohai ogofocnginango bangec feengkefude, ama imohai heitaingunugec enggecde.

<sup>10</sup> Ngic mong ye yocac modacma wiac kapi-anec gombunga garenggeande, ye ifingoc yocac modacma wiac kuneng garenggema kefude. Nga

mong ye yoac mi modacma ikoc amma wiac kapi-anec gombunga mi garenggeande, ye ifingoc yoac mi modacma ikoc amma wiac kuneng gombunga mi garenggeude.

<sup>11</sup> Nga ngeni yoac mi modacma bangecac dzofinac mangac manganea gombunga mi garenggegedce isoc ngic mongngo dzofinac fora garenggegedceac maringinau naric mi faiude.

<sup>12</sup> Nga ngeni yoac mi modacma ngic monggac dzofinac gombunga mi garenggegec isoc, imohai wiac ngeneac desi desia imoc ngemmegecedceac osiude.

<sup>13</sup> Uamedac mocgungo ngic kuneng yohockang yereac kingang naric mi kpeude. Ye monggac songo negemma mong ngadeheude me monggaru kpeketahema mong waude. Ngeni, Anutu nga dzofinac yereac kingang sofucngoc kpegecedceac-soc mi ande.”

<sup>14</sup> Yesungo yoac imoc deu farisaio yeni hied-zoac songo kuneng feyemmeecac amma imoc negemma detenic ammigec.

<sup>15</sup> Ammigec Yesungo yofi edeyunuec, “Ngic yeneng dindingac dengemmegecedceac ngeni imoc yeneac kicfu faka dindingac angkecdae. Nga Anutungo ine wiac ubaherenginau fede, imoc negendacde. Imoc yofiac, ngic yeneng wiac monggac negenggec engena angkecde, imoc Anutungo henu faka mangana yombong ande.

<sup>16</sup> Moseac dedeseriyoac nga profete yeneac yoac dekperagigec erema Yohane fingeru naso imoc wisickede. Nga imohacnac erema ngicngac yeneng Anutuac eucerereng dekperagigecde. Dekperagigec ngicngac yeni serima ihai endae.



17 Bangec nga kurumeng meickeu kpac anude, imoc efea nga Anutuac dedeseriyoac imohacnac dzikangabasic meic meicke imoc ine naric mi fingerude.

18 Ngic mong ye enema wama ngac mong meude, ye serofaka anude nga mong ye ngac wawaya meude, yeng ifingoc serofaka anude.”

19 Anu Yesungo monggoc deec, “Ngc mong kefec, ye dzeingakpia gombunga linengngo memea\* amma ngakpia witiau sacsac siriha gombunga heima wenacsoc nenesemengtoagoc nga ond-zonggboc amma songo witiau takefec.

20 Nga yeac amasinnu, oda ngadeau ine ngic mong makpekpea kpara Radzaro kefec. Ye sebiau kubecngo wake wakea nga ngic yeni ihai faigec fekefec.

21 Fema ngic dzofinacgoc yeac tebounac yaka tosea maande, imoc neudeac ammikefec. Nga kasi yeneng ine hama kubeha aberekecgec.

22 Kecma ngic makpekpeango homeu angero yeneng ye mekemma Abrahanggac hoannu faigec kefu ngic dzofinacgocngo ifingoc homeu tonggogec.

23 Tonggogec ye homecamau kecma ihai kpendzeng kuneng kpekefec. Ifi kpekecma kic fima henu Abrahanggoc hereau yombong tarec nga Radzaro henu yeac hoannu tarec.

24 Ifi hemma kpacma deec, ‘Abrahang manna, ni yei gerec manau kpendzeng kuneng kpeduae, imocac amma ge ubaga neac manganeu Radzaro

---

\* **16:19:** Lineng imoc dzaring mong dzuama imoc ambi feranga isoc.

suenā kemmā gbongā susiango dokuu nemurucke hama nedzaranna menomanēu.’

<sup>25</sup> Ifi deu Abrahāngngo yofi deec, ‘Medacna, ge wiac mong negensibesena. Ge bāngecfu kecmānā ngicngac yeneng iwai gombungā gombungā genggec mekecna Radzaro ine manganasac migec. Yaguc Radzaro yei menomanēdāe ngā geng ine kpendzeng kpekecne.

<sup>26</sup> Ngā monggoc torokpēmā deduāe, botucnīnāu tufatōā fāifāiā fedē. Ifi anu mongngo yeihacnac ferecgēmā gearu haudē mē ihacnacngo yei hahā, imoc ososia.’

<sup>27</sup> Ifi deu dzofinacgocngo deec, ‘Ifi anu manggac derecgegēmā, ge Radzaro suenā mānāac amāu kēnu.

<sup>28</sup> Dacmunāfocnā 5 ihai kecdāe, yeneng kpendzengbāngēc yomohai habāuac ye kemmā goronginā kpēmā edeyunubeso.’

<sup>29</sup> Ifi deu Abrahāngngo ine yofi deec, ‘Yeni Mose ngā profete yēnēc yōac mekecna nēgēngkecbisia.’

<sup>30</sup> Ifi deu dzofinacgoc kefecngo deec, ‘Abrahāng mānā, imoc kpac. Ngic mongngo homecfunac gborimā kemmā edeyunūu ine ubāmēreng ānggēcdē.’

<sup>31</sup> Ifi deu Abrahāngngo yofi deec, ‘Yeni Mose ngā profete yēnēc yōac mī nēgēmā wāgēcdēu ngic mongngo homecfunac gborimā deu ye ifingoc naric mī modāgēcdē.’ ”

## 17

<sup>1</sup> Anu Yesungo medacforā yēnēc yofi deec, “Ngicngac fakā māngānā ānggēcdēac fāitobāng,

imocngo bangecfu fingerude. Nga ngic mongngo ngicngac ogofora faitobang ifia ayemmeude, ye ine sowehagoc.

<sup>2</sup> Ye nambarac kapia yenearunac mong mangana mi kpoumiudeac ye yagucnoc dzamandzing ubeau ubahemima kondunnu ukugec kemeu, imoc yearu ngereebac.

<sup>3</sup> Ngeni ngenaocngoc garengemema kecbisia. Tosoga mongngo kopocsic meficgeudeu ge goroyoac edena. Nga ye ubea merenudeu kopocsiha wabesena.

<sup>4</sup> Nga ye uameme mocguac manau atac 7ngoc ge memanganeguu naso 7 ifingoc gearu dzigenema hama yofi deude, 'Kopocsic yomoc anaiac ubahodung negenduae.' Imoc deudeu kopocsiha wakecbesena."

<sup>5</sup> Anu aposoro yeneng Kebuac degec, "Ge negen negensinnina meyardinemma."

<sup>6</sup> Ifi degec Kebungo yofi merengyemmeec, "Negen negensinggina kapia mastet gbomea isoc fengemmeudeu ngeni fig ic yomoc ye yengenaoc godeagoc fukema kondunnu kemema nanudeac edegec ye enacngina tofohoma naric kemema nanude."

<sup>7</sup> "Anu ngenearunac mongngo wanacngiha bangec mendzic mendzic kefude me ramaburumaka garenggekefude, yeng semeng uaunac hama amau ereu minginango matacma yaka neudeac mi deude.

<sup>8</sup> Ye ine yofi edeude, 'Ge ngakpikporucga mewegenema yakana mengerema henggareng anemma tomai nanna. Tomai nammana neba wisickeuguc ge yaka naric nenade.'

9 Minginango wanacngic uayoac ifi miu yeng yoara tofohoma ua medacdac, imocac ubangerecyoac mi edeude.

10 Ngeni ifingoc wiac anggecdeac dengecdengemma, imoc mesidacma yofi debisia, 'Neni wanacngic amma uaninasac meding.' "

11 Yesungo ifi dema Yerusarennu kenudeac sing modacma Samaria nga Gariraia botucngirau kenec.

12 Kemma guruama monnu emmanu ngic 10 kukuseringinagoc sinnu hamagec meficyunuec. Anu yeni hereaungoc namma

13 kpacma degec, "Yesu, kunennina, ge neneac ubaga manganeu."

14 Ifi degec Yesungo yenemma edeyunuec, "Ngeni kemma womong gareng fingecyemmema sebingina edzacyunuec." *(Sesememe 14:1-32)*

Ifi deu yeni sinnu kemmagecngoc sebingina ngereec.

15 Ngeregec yeneacunac mongngo sebia ngereeu hemma dzigene hama seriangoc arohoma Anutu dengereec.

16 Dengerema Yesuac haniau kicmesuya hetutuckema makpe fema yeac ubangerec yoac deec. Amma ngic imoc ye Samariangic.

17 Ye ifi anu Yesungo kpesimiec, "Ni negemba ngic 10 yeneng ngerec ngeree meficgedau nga ngic 9 yeni damoc?"

18 Ngic yomoc ye areng monnunacngo yeneac botucfunac yengsac Anutu afeheudeac dzigenema hade nga goa yeni ifingoc anggec naric ambac."

19 Dema Yesungo yeac yofi deec, “Ge yacma kenna, negen negensingango mengeregudac.”

20 Farisaio goa yeni Anutuac eucerereng noc nasoac haudeac Yesu kpesimigec yofi merengyem-meec, “Anutuac eucerereng hau ngeni imoc kicngo naric mi henggecde.

21 Amma yofi naric mi degecde, ‘Ngeni henggec, ye yoc me ngeni henggec, ye edimoc.’ Negenggec, Anutuac eucerereng imoc ubaherenginau fede.”

22 Ifi dema medacfora yeneac yofi deec, “Kecma naso mong hau ngeni Ngicac Medacac uameme mocusac henggecdeac angemmeude amma naric mi henggecde.

23 Nga ngicngac yeni ngeneac yofi degecde, ‘Ngeni henggec, ye edi.’ me ‘Ngeni henggec, ye yei.’ Ifi degec ine mi modacyunubisia nga ihai bic mi kembisia.

24 Imoc yofiac, sawau piratac heiu kperagiango nobocnac ferecgema noboc kengande, Ngicac Medac ye ifi isocngoc hahanasoyau fingectegerude.

25 Hanahema ine naso yomocac kisic yeneng ye ngadehegec kpendzeng homac kpeude.

26 Noaac nasou faka fingerec, Ngicac Medacac haha nasou faka ifiangoc fingerude.

27 Ngicngac yeni nenedoku nema ngic ngacfu kenggec nga manggac yeneng degec, ‘Ni naroanna ngic mibade.’ Ifi angkecmagec Noango wageu enu doku yadima wiac sasawa semedaru manganema kpac andarec.

28 Nga Rotiac nasou faka ifiangoc fingerec. Ngicngac yeni nenedoku nema iwai bummema suema nenyaka mehomeckecma ama mekecgec.

<sup>29</sup> Nga wenac mong ifi amma kecmagec Rotingo Sodong waec, wenac imohaingoc Anutungo negenu kurumennunac geric nga sarafa hoc\* imoc ine kia isocngo mama wiac sasawa dzedaru kpac andarec.

<sup>30</sup> Nga Ngicac Medac fingectegerudeac nasoyau faka ifia isoc fingerude.

<sup>31</sup> Naso imohai ngic me ngac mong ye ama witiau tarude nga iwaiyango ama manau taru ye imoc meudeac ama manau mi embeso. Nga mong ye semeng uau nanude, ye ifingoc ameau dzigene mi kembeso.

<sup>32</sup> Roti enemaaru faka fingerec, ngeni imoc negensibisia.

<sup>33</sup> Ngic mong ye kekeha segereudeac ua mekecde, ye kekeha ukuu sufumiude nga mong ye kekeha ukuu sufuude, ye kekeha fingecmiude.

<sup>34</sup> Tofocnac imohaingoc yohockang yeri fefe mocguac witiau femaec Kebuac areng yeneng yerearunac mong mema mong ine wagec feude.

<sup>35</sup> Nga ngac yohockang yerahafoc imohaingoc namma flawa medzamema kecmaec Kebuac areng yeneng yerearunac mong mema mong ine wagec nanude.

<sup>36</sup> Nga ngic yohockang yeri semeng uau kecmaec Kebuac areng yeneng yerearunac mong mema mong ine wagec uau kefude, imoc eden-gunuduae.”

<sup>37</sup> Ifi deu medacfora yeneng kpesimigec, “Kebu, faka imoc dahai fingerude?” Kpesimigec Yesungo

---

\* **17:29:** Sarfa hoc imoc hoc mong dzagec dzagec. Gerecfu dzeu gereha gerecyohoc ande.

yofi merengyemmeec, “Koec koec neng yeni fareng fede, imohai eacgecde.”

## 18

<sup>1</sup> Medac yeneng nasosoc modzotitia kpac nunumu ua megecdeac Yesungo yoac mong heima yofi edeyunuec.

<sup>2</sup> “Yoac isic isingge ngic mong ye taong monnu kefec. Ye Anutuac kengec mi angkefec nga ngicngac yeneac eweheihei mong mi angkefec.

<sup>3</sup> Nga taong imohaingoc ngac hodzec mong kefec, ye nasosoc yearu hama yofi dekefec, ‘Ngabafocna yeneng memanganenubeso amma kecdaeac neac yoac dindingac dema meficnubesena.’

<sup>4</sup> Ngac ye ifi dekefu yoac isic isinggengo meficgeudeac mi negenec. Amma ngade ngac imocac modzea tiu yengenaocngoc ine yofi negenec, ‘Ni Anutuac kengec mi anduae nga ngic yeneac eweheihei mong mi negenduae.

<sup>5</sup> Nga ngac hodzec yomoc ye nasosoc nearu hama hatahenengkecde, imocac amma yoara mengeremibesare. Ifi mi ambadeu ye nasosoc hakefu modzona tiyombonggeude.’ ”

<sup>6</sup> Anu Kebungo yofi deec, “Ngeni yoac isic isinggengo faka dindingac mi modacande, yeng yoac deec, imoc negensibisia.

<sup>7</sup> Anutungo ngicngacfora meisingngunuec, nge-neac amma modzea mi tiude. Ngeni hadzing toforec ye meficngunuudeac kiacnginango yearu kenu ye ngeneac amma faka dindingacfu meficngunuudenoc.

<sup>8</sup> Nga nasongina mi mehereema faka dindingac fingengemmeudeac ua bic meude, imoc eden-gunuduae. Nga Ngicac Medacngo haude, imohai ngicngac ye negensinggedae, ngicngac ifia negemba homac kecgcede.”

<sup>9</sup> Ngic goa yeni yenanggac negenggec dindingac anu goa ngadeyunuma kecgcec, yeneac negemma Yesungo yoac mong heima yofi deec,

<sup>10</sup> “Ngcic yohockang, farisaio mong nga takesimeme mong, yereng numuecdeac Anutuac womonnu enoc.

<sup>11</sup> Emma farisaiongo yacma namma yengenaac negemma yofi dema numuec, ‘Anutu ni ngic goa, godzungic nga faka mangana me kaisero angandae, yeni isoc kpac. Nga takesimeme ngic edimoc, ni ifingoc ye isoc kpac, imocac ubangerec edeguduae.

<sup>12</sup> Amma sondasoc uameme yohockang yakasege kecanduae nga wiac sasawa mekecduae, imoc 10nunac mocgu genganduae.’

<sup>13</sup> Anu takesimeme ngic yeng farisaioac hereau namma kpehengaima kurumennu fiu enudeac negengebirima ine ngonducnema mokuhau kpema yofisac dema numuec, ‘Anutu, ni kopocsicmeme, ge neac ubaga manganeu.’

<sup>14</sup> Nga takesimemengo ifi deecac Anutuac kicfu ngic dindingac amma amau kenec, imoc eden-gunuduae. Nga farisaio ye ine kpac. Ngic mong ye yengena sebi meende, yeni ye memagecde nga mong ye yengena sebi memaemeude, ye meenggecde.”

<sup>15</sup> Ngicngac goa yeni Yesungo sabacfocngina mariango kpesereyunuudeac yearu meyunu



hagec. Hagec medac yeneng yenemma ine kpetariyemmegec.

<sup>16</sup> Kpetariyemmegec Yesungo ine kpacyunuma deec, “Nambaracbisic yeni nearu naric hagec, ngeni kpae mi heiyemmegec. Anutuac eucerereng imoc nambaracbisic yofia yeneac.

<sup>17</sup> Foracngoc, mong ye nambarac kapia angkecdae, ifi isoc mi angkecde, ye Anutuac eucererennu naric mi enude, imoc edengunuduae.”

<sup>18</sup> Ngic enara mongngo Yesu kpesimiec, “Kpoukpou gombunga, ni dafi amma kekecseri mebade?”

<sup>19</sup> Ifi deu Yesungo yofi meremmiec, “Ge nocac gombunga denendang? Anutu mocgungo gombunga kecde.

<sup>20</sup> Ge dedeseriyoac yomoc bic negennec, ‘Ge kaisero mi ambesena, ngicngac mi yunuhomebesena, hamangec mi mebesena, enacfu faifai mi ambesena nga nonggo manghocga seseheyurubesena.’”  
*(Makekeng 20:12-16; Dedeseri 5:16-20)*

<sup>21</sup> Ifi deu ngicngo merenec, “Ge denec, imoc sasawa sebigborinaungoc angereai.”

<sup>22</sup> Ifi deu Yesungo imoc negemma edeec, “Ge wiac monggac engngoc kpedadangganec, imoc yofi ambesena. Finacga sasawa fegende, imoc suena hiedzo kirecgeu imocngo ngicngac makpekpea medereyemmebesena. Ifi anna kurumenggac dzofinac fingeccenu hama modacnubesena.”

<sup>23</sup> Ifi deu ngic ye yoc imoc negemma ubae-bic kuneng meec, nocac ye dzofinactoa homac femiec.

24 Yesungo ngic henu ubaebic meu yofi deec, “Ngic dzofinactogoc yeneng Anutuac eucerereng manau enggecdeac uatoa yombong ande.

25 Kamerengo bungic singau engeng imoc ua efea nga ngic dzofinactogocngo Anutuac eucererennu engeng, imocngo ine uatoayagoc.”

26 Ifi deu ngicngac yeneng yoac imoc negemma kpesimigec, “Ifi anu merang naric komoc kpeude?”

27 Ifi degec Yesungo deec, “Ngic ngeni faka goa megecdeac obohodae, imoc Anutungo naric meude.”

28 Ifi deu Petorongo deec, “Negen nec, neni ama nga iwainina wama ge modacguma kecdimbe.”

29-30 Ifi deu Yesungo yofi deec, “Ni foracngoc edengunuduae, ngic mong ye Anutuac eucererenggac amma amea me enema me nambaracfora nga dacmunafora amma nonggomama wayunuma kecde, yeac yofi fingerude, ye warac iwaiagoc kefec, imoc ferahema kecec nasoyau iwaiia monggoc homac meficgeude. Amma wisickeu bangec siraha mong haude, imohai kekecseri ifingoc meficgeude.”

31 Anu Yesungo medacfora 12 ngadeau meyunuma yofi edeyunuec, “Negendae, nenang Yerusarennu ennide. Enni imohai profete yeneng warac Ngicac Medacac yoac kibinginau ohogecmoc, imocac fora fingeccdarude.

32 Nga ngic yeni ye mema faigec bangec monnunac ngic Anutu mi negemmidae, yeneac mariu enu yeneng detenic nga meenti memati ammima desofoc ammigecde.

33 Amma dzikacngo ye kpekecma kpehomegecde. Nga ye uameme harebec ammanu ine monggoc gborima yarude.”

34 Ifi deu medac yeneng yoac imoc negemma mong mi negengireckegec. Yoac imocac hania imoc yenearu sufu sufuya feu Yesungo yoac deec, imoc mong mi negengireckegec.

35 Yesungo Yeriko taong mewegenemanu ngic kicpisc mongngo sing tegiau tacma iwaiac derecgekefec.

36 Amma negenu ngicngac habutoango ferahema kengha anggec kpesiec, “Imoc dafi andae?”

37 Kpesiu edegec, “Yesu Nadzaretenc, yeng fercegema kende.”

38 Ifi degec yeng kunengngoc kpacma deec, “Yesu Dawidiac bangec, neacnec ubaga manganeu.”

39 Kparu ngicngac kiwau kenggec, yeneng kpetarimima waickema tarudeac edegec yeng ine monggoc arohoec, “Dawidiac bangec, neacnec ubaga manganeu.”

40 Kparu Yesungo namma kicpisc yearu mekenggecdeac edeyunuu yeni wegenac mekenggec Yesungo yofi kpesimiec,

41 “Ni noc wiac anggembadeac negennec?” deu merenec, “Kebu, kicfifi ambadeac negenduae.”

42 Ifi deu Yesungo edeec, “Negen negensingango mengeregudeac, ge monggoc kicfifi anna.”

43 ifi deu ngic ye imohaingoc kicfifi amma Yesu modacma Anutu dengereu ngicngac sasawa yeneng imoc hemma Anutu dengeregec.

## 19

<sup>1</sup> Yesungo Yeriko ferecge kemmanu

<sup>2</sup> takesimeme ngic yeneac enara mong dzofinac-toayagoc, kpara Sakaio, ye ihai kefec.

<sup>3</sup> Yeng Yesu ye ngic dafia dema hembesonga negenec. Amma ye ngic wegena anu ngicngac homac yeneac botucfu nanecac Yesu naric mi henec.

<sup>4</sup> Ifi anu Yesungo sing kenudeac kenec, ye ngicngac yeneac botucfunac ihai waraima nedzi kemma fig ic mong nanec, imocac witiau emma kic fima tarec.

<sup>5</sup> Taru, Yesungo imohai kensikema kiwa fiu enu edeec, “Sakaio, ni yaguc amagau hama tacbade, ifi nengenduaeac ge bic mana.”

<sup>6</sup> Ifi deu Sakaiongo icfunac bicbic mama Yesu ubangerecgec hoanggeu ameau kenoc.

<sup>7</sup> Kenec ngicngac sasawa yeneng imoc hemma negenggec naric mi anu degec, “Yesungo man-ganamemengic yeac amau nocac kendac?”

<sup>8</sup> Ifi degec Sakaiongo ine ihai namma Kebuac deec, “Kebu negenna, finacna mekecduae, imocac noboha ngicngac makpekpea yemmebade nga goa ikoc ayemmema wiac meai, yeneac turung atac fo meemma monggoc yemmebade.”

<sup>9</sup> Ifi deu Yesungo yofi deec, “Anutungo yaguc ama mana yomocac mingina ebicfunac mesiyunuu komoc kpegecde. Ngic yomoc ye ifingoc Abrahanggac kisicfunac.

<sup>10</sup> Imoc yofiac, Ngicac Medac ye ngicngac sufu sufuya hofocyunuude nga kpedzucyunuude amma ebicfunac meyunuudeac maec.”

11 Ye ifi dema kemma Yerusareng taong mewegeneec, imocac yeneng yofi negenggec, “Anutuac eucerereng imoc kicninau yombong bic fingectegerude.” Ifi negenggecac amma Yesungo yoac mong heima torokpema yofi edeyunuec,

12 “Ngic mongngo ngickunenggac arenunac fingec fingera, yeng yofi negenec, ‘Ni bangec hereau kemba yeneng ngictau kpac nenggec dzigenema bangec yomocac ngictau ambade.’

13 Nga ye kembesonga dema wanacngicfora 10 kpacyunuma dzo mong kpara mina mocgu tembuc tembuc yemmema deec, ‘Ni kembareng ngeni dzo yomocngo emekeng emeha amma kpetea meyadibisia.’\*

14 Nga ngic yeac ama mocgufora, yeneng ine ye ubango ukugec. Ifi anu ye kenu ngic goa yofi dema edeyunuma sueyunugec kenggec, ‘Yeng neneac ngictau kefudeac songo mi negendimbe.’

15 Nga ye ihai kefu yeneng ngictau kpac migec kecma monggoc dzigenema bangehau haec. Hama wanacngicfora dzo yemmeec, imoc dafi meyadigec, imoc negenudeac kpacyunuec.

16 Kpacyunuu wanacngic warac warac yeng hama deec, ‘Kebu, ni dzo nennec, imoc meyadima dzo 10 monggoc meficgeai.’

17 Ifi deu ngictaungo yofi deec, ‘Ge wanacngic gombunga amma ua gombunga medang. Ge yoac dedena modackecma wiac kapia gombunga garenggedanggac taong 10 garengyununadeac uayoac nga kuc genduae.’

---

\* **19:13:** Mina mocgu imoc wenac 100ac uabung.

18 Nga wanacngic ngade, yeng hama deec, 'Kebu, dzo nennec, imocngo dzo 5acsoc monggoc meyadiec.'

19 Ifi deu ngictaungo edeec, 'Ge taong 5 imocac gareng faiguduae.'

20 Anu ua ngic mongngo hama deec, 'Kebu, dzoga yomoc kporuc manau sufuba tarec, imoc henna.

21 Ge ngic gerea amma kpekpeturang uaac hiedzo mi faima sifu meanneec. Nga uau heihomec mi amma sifu foraya kpedziannec, imocac geac kengecnuu ifi anai.'

22 Ifi deu ngictaungo deec, 'Ge wanacngic mangac manganea, yoacga meremba imocngo giude. Ni ngic gerea amma kpekpeturang uaac hiedzo mi faima sifu meanduae. Nga uau heihomec mi amma sifu foraya kpedzianduae, imoc bic negenec.

23 Nga ge nocac dzona yomoc dzo tohonu mi fainec? Ifi ambannu dzigenema dzona imoc nobohagoc mebai.'

24 Ifi dema ngicngac goa ihai nanggec, yeneac deec, 'Ngeni dzo imoc wangecma wanacngic minadzoya 10 femide, ye migece.'

25 Ifi deu yeneng degec, 'Kebu, ye dzoya 10 bic fede.'

26 Ifi degec yofi merengyemmeec, 'Ngcic mong wiac goa femide, ye wiac monggoc migeccde nga mong ye wiac mong mi femide, yearu wiac fedemoc, imoc ifingoc wangecgeccde, imoc edengunuduae.

27 Anu ngabafocna yomoc yeni neng ngictaungina kecma garengyunubadeac wagec, ngeni ngic

imoc yei meyunu hama kicnau yunuhomegec.’ ”

<sup>28</sup> Yesungo yoac ifi deu wisickeu ye waraima Yerusarennu enec.

<sup>29</sup> Emma tiki kpara Oriwa, imocac wegena hama Betefage nga Betania amabangec mewegenema medac yohockang, yofi dema sueyuruec.

<sup>30</sup> “Ngeri dindingac kemma amabangec sing enarau tacde, imohai enec donggi medaha mong ngicngo witiau mi tatara, imoc witickegec nande. Nanu ngeri imoc meficgema witic yungecma mema haec.

<sup>31</sup> ‘Ngeri nocac donggi yungecdape?’ Ifi kpesigecdeu ngeri yofi debesera, ‘Kebungo imocgoc ua meudeac dede.’ ”

<sup>32</sup> Yesungo ifi dema ngic sueyuruu kemma yeng deec, imoc sasawa meficgedaroc.

<sup>33</sup> Meficgema donggi medaha yungerec minginango deec, “Ngeri nocac donggi medaha yungecdape?”

<sup>34</sup> Ifi deu yereng deoc, “Kebungo imocgoc ua meudeac dede.”

<sup>35</sup> Ifi dema yeri donggi medaha imoc Yesuaru mema kenoc. Amma Yesungo emma tarudeac yeri ngakpingira herea hesima donggi medahaac witiau kpesorohoma Yesu enudeac meficgeoc.

<sup>36</sup> Meficgeec ye emma tacma kenec, imohai ngicngac yeneng ngakpiherecngina hesima sinnu tiamegec.

<sup>37</sup> Nga Yerusareng wegenac Oriwa tikiac sing keme nande, imohai yeac arengfora habu kuneng yeneng kucfaka hengkecgecac amma ubangerec negemma udumengyadango Anutu dengerema yofi degec,

38 “Ngictau Kebuac kpacfu hade, ye kenehagoc.  
Kurumennu ruae feu sawau wi dedengerec  
febeso.” *(Mitiyegec 118:26)*

39 Ifi kpacma dengeregec farisaio goa habu ye-  
neac botucfu nanggec, yeneng Yesuac degec,  
“Kpoukpou, ge arengfocga dena waickebisia.”

40 Ifi degec Yesungo merengyemmeec, “Yeni  
waickegecdeu hoc yeneng arohogece, imoc  
edengunuduae.”

41 Yesungo Yerusareng mewegenema taong  
imoc hemma kiacma

42 yofi deec, “Geng yofinenggac ruaegoc kec-  
nadeac sing hentegecna ngereebac. Nga sing imoc  
ine yaguc sufu sufu fema kicgau mi fingectegece.

43 Geac nasoga haude, imohai ngabafocga  
yeneng noboc noboc orongguma bangec usuma  
heiemma igocgugece.

44 Igocguma yeneng memanganeguma nam-  
baracfocga geac botucfu kecdae, yeni yunuhome-  
dacgec bangecfu fegece. Amma geac manau hoc  
mong wagec mongngo monggac witiu mi tarude,  
nocac Kebugango hadac, ge imoc mi hentegec-  
dang.”

45 Amma Yesungo Anutuac womonggac oda  
manau emma ngicngac yeneng wiac emekeng  
emeha amma nanggec, yeni kporacyunuma

46 yofi edeyunuec, “Yoaç oho ohoya yofi fede,  
'Ni womonna yomocngo nunumuac ama ambeso.'  
*(Yesaia 56:7)*

Nga ngeneng ine imoc merenggec  
hamangecmeme yeneac sufu sufuama  
ande.” *(Yeremaia 7:11)*



<sup>47</sup> Anu Yesungo wenacsoc womonnu kpoukpou ua meu womong gareng enara nga mitiac negen negengngic amma habu yeneac enarafocngina yeneng ye kpegecdeac nasoyombonga hofocma kecgec.

<sup>48</sup> Nga ngicngac yeni yeac yoac negengyombonggema kecgec nga yoara mong wagecdeac mi negenggec. Imocac amma ngaba yeneng ye meickegecdeac sing mong mi meficgegec.

## 20

<sup>1</sup> Yesungo naso monnu Anutuac womonnu ngicngac edekpou ayemmema siduc gombung edeyunuu womong gareng enara nga mitiac negen negengngic amma yudangic enarafocngina yeni yenhafoc hama kicnginau namma

<sup>2</sup> kpesimigec, “Ge noc kucfu ua yomoc menec nga merang uayoac imoc genec? Imoc edenununa.”

<sup>3</sup> Ifi degec yeng yofi merengyemmeec, “Ni ifingoc kpesingemmeba wiac mong edenugec,

<sup>4</sup> Yohanengo dokunadzic ua mekefec, imoc kurumennunac me ngicfunac?”

<sup>5</sup> Ifi deu yeni yenaocngoc denegeng amma degec, “‘Imoc kurumennunac.’ Ifi denideu yeng yofi kpesinemmeude, ‘Anu ngeni nocac ye mi negensinggec?’

<sup>6</sup> Amma ‘ngicfunac’ ifi denideu ngicngac sasawa yeneng hocngo neneregecde nocac yeni Yohane ye profete, imoc ubaherenginango negensidae.”

<sup>7</sup> Ifi dema meremmigec, “Dahacnac haec, imoc mi negendimbe.”

<sup>8</sup> Ifi degec Yesungo yofi merenec, “Ifi degec, ni merang uayoac nenu ua mekecduae, imoc ifingoc mi edengunubade.”

<sup>9</sup> Ifi dema Yesungo yoac mong heima ngicngac yofi edeyunuec, “Ngic mongngo waing uayau waing homerec. Homeru wisickeu waing ua garenggegecdeac ngic meficyunuma yenigoc uayoac dedzege anggec nga yengena ine naso herea bangec monnu kefudeac kenec.

<sup>10</sup> Kemma kecmanu fora kpememe naso hau wanacngiha mong sueu waing uaac gareng yenearu kenu yeneng waing fora imohacnac yeac noboha migeceac kenec. Kenu waing uaac gareng yeneng wanacngic imoc dzoboya kpema entegeng suegec kenec.

<sup>11</sup> Kenu minginango ifi hemma ngic mong sueec. Sueu kenu waing uaac gareng yeneng ye ifingoc kpema faka mangana yombong ammima entegeng suegec kenec.

<sup>12</sup> Kenu wanacngiha atac harebec sueu kenu yeneng ye ifingoc kpegec sawa mau kporacgec kenec.

<sup>13</sup> Ifi anu ua minginango yofi deec, ‘Dafi ambade? Ni medacyombonna songo negemmiandu-aemoc, ye sueba kenu ye sifu eweheimigece.’

<sup>14</sup> Dema medacyombonga sueu waing uaac gareng yeneng ye hemma yenaocngoc denegeng amma degec, ‘Yeng kecma ua yomoc tiu enude. Nenang ye kpehomeni yeac bangec nga marid-zoming imoc nenang anude.’

<sup>15</sup> Ifi dema medac imoc kporacgec oda ngadeau kemeu kpehomegec.”

Ifi dema Yesungo kpesiyemmeec, “Ua ming-ina imocngo waing uaac gareng yeni dafi ayem-meude?

<sup>16</sup> Yeng hama waing uaac gareng yunuhomema waing ua imoc uagareng goa yeneac mariu faiude.” Ifi deu yeneng imoc negemma yofi degec, “Ifi naric mi fingeCBSO.”

<sup>17</sup> Ifi degec Yesungo yenemma yofi deec, “YoaC yofi oho ohoya nande, imoc titiha negensibisia, ‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.’ *(Mitiyegec 118:22)*

<sup>18</sup> Ngicngac sasawa hoc imocac witiau mayunude, yeni sebingina tegerude. Nga hoc imocngo yeneac witiu makpema hedzameyunuu kapuc kpegecde.”

<sup>19</sup> Mitiac negen negengngic nga womong gareng enara yeni imohaingoc ye mebeso anggec. Yesungo yeneac yoaC heima deec, imoc bic negenggec amma ngicngac yeneac kengecyunuu ine wagec.

<sup>20</sup> Anu yeni Yesu hembima ngicfocngina sueyunugec, yeneng yoara negendimbe siric yearu kenggec. Kemma noc yoaC dafi deu negemma ine prowinsiac desi desingic yeac mariu faigeCdeac negenggec.

<sup>21</sup> Nga ngic imoc yeneng Yesuac degec, “Kpoukpou, ge yoaC denec nga wiac kpounemmenec, imoc fora sasawa. Amma ge Anutuac sing ngicngac edekpou ayemmema yoaC monde monde mi angkecnec, geac ifi negendimbe.

22 Imocac edenununa, neni takesi ngictau Sisa naric minide me kpac?”

23 Ifi degec Yesungo ikocngina hentegecma yofi edeyunuec,

24 “Ngeni dzo mong edzacnugec hembra. Onga nga kibi yoc, imoc meracac?” deu degec, “Imoc Sisaac.”

25 Ifi degec Yesungo deec, “Imocac ngeni Sisaac wiac, imoc Sisa mibisia nga Anutuac wiac, imoc Anutu mibisia.”

26 Ifi deu yeni ngicngac yeneac kicfu enacfu faifai ammima meme, imoc obohogec. Amma yoacngina turunga merenec, imocac kerecetegec amma yoac mong mi degec.

27 Anu Sadukaio yeneng homecfunac yacyac mong mi fede, ifi deandae. Amma yenearunac goa Yesuaru hama kpesimigec,

28 “Kpoukpou, Mosengo dedeseriyoac yofi ohonemmec,

‘Ngic mong ye ngac mema gboriha kpac kecma homeu ngic imocac muneango daraac hodzec mema gboric kpefigema daraac kpac miacma kecbeso.’ *(Dedeseri 25:5-10)*

29 Naso monnu dacmunac seweng kecgec nga waracdacnginango ngac mema gboriha kpac kecma homeec.

30 Homeu muneango daraac hodzec mema

31 eng kecma homeec. Anu munangirango hodzec imoc mema ifingoc sabaha kpac kecma homeu dacmuna seweng yeni ngac imocngoc mema gboricfocngina kpac kecma homedacgec

32 amma ngac ye wisickeu ifingoc homeec.

33 Amma yeng ngic seweng yeneac enengngina amma kecma yacyac nasou ye dacmunac seweng yeneacunac meracac enema anude?”

34 Ifi degec Yesungo yofi merengyemmec, “Bangec yomocac kekec nasoac medacfora yeneng ngac meandae nga manggac yeneng yofi deandae, ‘Ni naroanna ngic mibade.’

35 Nga ngicngac homecfunac gborima yacyac nga kekeseri megecdeacsoc andae, yeni ihai eweeneng mi anggecde.

36 Yeni homecfunac yacyac, imocac kisic anggecde. Amma yeni Anutuac nambaracfora kecma angero isoc anggecdeac yeni monggoc naric mi homegecde.

37 Homecfunac yacyac fede, imoc Mosengo ifingoc ohoma dekperagiec. Imoc yofi, icfu gerec dzeu ye hemmanu Kebuac dede yoacfu yofi fingerec,

‘Ni Abrahang nga Isaka amma Yakobo yeneac Anutu.’ *(Makekeng 3:6)*

38 Yeac hehennu yeni sasawango kekecnginagoc. Ye gbori kecdimbe, neneac Anutu, homemea yeneac Anutu kpahac.”

39 Ifi deu mitiac negen negengngic goa yeneng yofi degec, “Kpoukpou, ge yoac gombunga yombong denec.”

40 Anu imocac ngadeau yeni kengecyunuu mongngo kpesi kpesi monggoc mi kpesimigec.

41 Ifi anu Yesungo yofi deec, “Ngeni yoac yofi negembisia, yoac mong yofi fede, ‘Messia ye Dawidiac arennunac fingerude.’

42 Nga Dawidi ye yengenaoc Mitiyegecfu yofi deec fede,

'KEBUNGO neac Kebuna yofi edeec, "Ge foinaugeng tacmana

<sup>43</sup> ngabafocga hanigaac bageau faiyunuba yeni hanititiga anggecede." ' *(Mitiyegec 110:1)*

<sup>44</sup> Imocac Dawidi ye 'Neac Kebu' kparecngo dafiu yeac arenunac ande?"

<sup>45</sup> Yesungo ngicngac sasawa yeneac kicfu medacfora yofi edeyunuec,

<sup>46</sup> "Ngeni mitiac negen negengngic yeneac henghomema kecbisia. Yeni ngakpi herec gombunga faima amayuguc anggecedeac songo negengandae nga suenefu kemma ngicngac yeneng yeneac wenacngerec deyemmegecedeac songongina kuneng fede. Amma yeni kpekpeturang amau nga yakatoa nasou warac warac tatacfu tachbesonga songongina angkecede.

<sup>47</sup> Amma yeni ngac hodzec yeneac amangina wangecyunuandae. Amma yeneac negengngerec fingerudeac nunumu hereangoc numuandae. Yeni ikocfaka ifia angandaeac turunga ebiringoc megecede."

## 21

<sup>1</sup> Anu Yesungo kic fima henu ngicngac dzofinagoc yeni sesengina Anutuac womonggac sesekatapau faigec kemeu

<sup>2</sup> ngac hodzec makpekpea mongngo peni saccac yohockang, ifisac faiu kemeu hemma

<sup>3</sup> yofi deec, "Foracngoc, ngac hodzec yomoc ye hiedzoya kpac kecma dzo faima ngic sasawa sese faidau, imoc feracyunuma faidarec, imoc eden-gunuduae.

<sup>4</sup> Imoc yofiac, yeni finactoangina wakema fede, imohacnac tosea mema sesengina faidau. Ngac ye ine noc wiac femidac imocnoc hafoangoc faidacma entegeng kecede.”

<sup>5</sup> Anu ngic goa yeneng Anutuac womong hoc kibia gombungango memea amma sese nga ubangerec hania haniango Anutu mikecgec, imocngo womong kibiagoc anudeac memengere anggec, imoc hemma siduc degec Yesungo yofi edeyunuec,

<sup>6</sup> “Ama yomoc hensongo homac andae, imoc naso herea mi tarude. Naso mong haude, imohai ngic yeneng imoc sasawa hembarackegecde. Hembarackegec hoc mongngo monggac witiau wagec mi tarude.”

<sup>7</sup> Ifi deu yeneng kpesimigec, “Kpoukpou, ge faka denec, imoc noc nasoac fingerude nga naso imohai noc soi fingeru hemma naso wegenede negennide, imoc edenununa.”

<sup>8</sup> Ifi degec Yesungo deec, “Ngic yeneng ikocfu wangepngunubauac ngeni henghomema kecbisia. Ngic homac yeneng hama neac kpac kpacma yofi degecde, ‘Ni Messia.’ nga ‘Naso bic hadac.’ ifi degec ngeni mi modacyunubisia, kpac.

<sup>9</sup> Nga ewekpekpetoa amma ubakpekpe udu-mengtoagoc fingeru ngeni imoc negemma kengec mi ambisia. Wiac ifia hanahema fingeCBSO nga naso ine imohaingoc yombong mi kpac anude.”

<sup>10</sup> Amma monggoc torokpema yofi deec, “Bangec goa yeneng ogofocngina yenigoc ewekpekpe anggecde nga ngictau monggac arengngo ngictau monggac areng yenigoc ngaba

angemegecde.

<sup>11</sup> Usoctoa meude nga bodinaso nga hafei kuneng bangec monnu nga monnu ifiangoc fingeckenude. Fingeckenu bangecfu nga sawau soi hania hania fingeru henggecde.”

<sup>12</sup> “Faka ifia mi fingezmanungoc yeni kpac-naac amma ngeni ngunukporac angemmema mengunuma kpeketuranggac amaareng yeneac mariu faingunugecde. Nga yeneng witicamau faingunugec ngeni ngictau nga gawana yenearu mengunuma kenggecde.

<sup>13</sup> Nga naso imohainoc neac dedekperagi yoc edeyunugecdeac sing fingezmanemde.

<sup>14-15</sup> Ni negen negentegec ngemmema yoc enacnginau faibade. Ifi amba ngabafocngina yeneac botucfunac mongngo yoc ngemmebade, imoc naric mi memaude me kpeude. Imocac amma ngeni yeneac kicfu noc yoc deni dema mi arengekecbisia.

<sup>16</sup> Kecma nonggo mang nga dacmunafocngina amma sactoso nga ogofocngina yeneng kererengunuma ngaba yeneac mariu faingunugec ngenearunac goa yunuhomegecde.

<sup>17</sup> Neac kpacnaac amma ngicngac sasawango ubango ukungunugecde.

<sup>18</sup> Nga ngeneac orucnginaunac orucdzongina mongngo ine naric mi sufuude.

<sup>19</sup> Ngeni seriangoc namma kekecngina ong-gonggegecde.

<sup>20</sup> Wasaingic habu yeneng hama Yerusareng oronggegecde, naso imohai ngeni yofi bic negenggecde, taong manganeudeac naso bic hade.



21 Imohai ngicngac Yudia bangecfu kecdae, yeni worama tikiu embisia nga Yerusareng taong manau kecdae, yeni worama ngadeau kemebisia amma ngadeau kecdae, yeneng Yerusareng manau mi embisia.

22 Naso imoc turung kpoukpou naso anude. Imohai yoac sasawa oho ohoya fede, imocac fora fingerude.

23 Naso imohai ngac heregoc kecdae nga nenggac sabac namuu meyunukecdae, yeni ebicnginagoc anggecde. Bangec yomohai ebic kuneng fingerude nga bangecac ngicngac witinginau ngaba fingerude.

24 Nga ngaba yeneng dzikacac beangngo ngic noboha yunuhomema noboha wicityunuma bangeha bangeha meyunuma kemma faiyunugecde. Amma bangeha bangeha ngicngac areng Anutu mi negemmidae, yeneng hama Yerusareng haninginango tima kecmagec nasongina dedea, imoc wisickeu kenggecde.

25 Naso imohai wenac nga afo amma asomeng yenearu soi fingerude. Nga bangeha bangeha ngicngac yeni ubaebic mema kondunnu namma kondung tembonggac udumeng negemma negengyohoc amma dafi ambesonga obohogece.

26 Ebic imocngo bangecfu fingerudeac ngicngac yeni imoc negemma negengyohoc nga kengec amma homecgboric anggecde. Sawau kuc sasawa yeni kockpac anggecde.

27 Anu naso imohai yeni Ngicac Medac henggec ye kuctoayagoc nga kibikperagitoayagocngo hong witiau haude.

28 Faka imoc fingeCBSO ammanu ngeni

kpehengaima yacma orucngina miacma nambisia. Naso imohai ebicfunac mesingunugec enggecdeac naso wegeneude.”

<sup>29</sup> Anu Yesungo yoac mong heima yofi edeyunuec, “Ngeni fig ic nga ic sasawa hemma negembisia.

<sup>30</sup> Ic yeni maringina besaiudeu wenac naso wegenede, imoc ngenaoc bic negenggecde.

<sup>31</sup> Ngeni wiac sasawa deduae, imoc fingeru hemma ifingoc yofi negembisia, Anutuac eucere-reng bic mewegenengunude.

<sup>32</sup> Foracngoc, ngicngac areng yomoc, yeni mi homemagec wiac yomoc fingeccdarude, imoc edengunuduae.

<sup>33</sup> Bangec nga kurumeng, yeri kpac anecde nga neac yoac imoc naric mi kpac anude.

<sup>34</sup> Ubasufu nga dokunene amma bangecac negengyohoc imocngo meebiringunubauac ngeni garengngina meemebisia. Wenac imoc utac fingeccngemmebacac.

<sup>35</sup> Wenac imohai subango yang kpeande, ifi isoc bangectoa bangec imohai hama ngicngac sasawa yenearu fingeccdarude.

<sup>36</sup> Imocac ngeni nasosoc garengemema kecma nunumu ua mekecbisia. Mekecma wiac sasawa yomoc fingeccbeso ande, imohacnac woragecdeac kuc mema Ngicac Medac, yeac kicfu serima nanggecde.”

<sup>37</sup> Yesungo naso imohai wenacsoc Anutuac womonnu kpoukpou ua meec. Mema kecmanu ama marai anu tiki mong kpara Oriwa, imohai kenu toforeu takefec.

<sup>38</sup> Wereckenu ngicngac sasawa yeneng Anutuac womonnu yeac yoac monggoc negenggedeac kengkecgec.

## 22

<sup>1</sup> Hombang mong, ic sogong yisya kpac nene, kpapa mong makekeng deandae, imoc wegeneec.

<sup>2</sup> Wegeneu womong gareng enara nga mitiac negen negengngic yeni Yesu homecfu faigecdeac sing mong meficgegedeac negensigec. Amma yeni obohogec nocac yeni ngicngac yeneac kengcyunuec.

<sup>3</sup> Yuda kpapa mong Karioto ye medacfora 12 yeneanunac mong. Nga Satanggo yeac ubahereau kemeu

<sup>4</sup> yeng kemma womong gareng enara nga womonggac keracnatang garengngina, yenigoc tacma Yesu sing dafiu mema yeneac mariu faiudeac yoac denegeng anggec.

<sup>5</sup> Nga yeni ubangerec negemma dzo kpetea mong dema migeceac yoac dedzege anggec.

<sup>6</sup> Yudango yenigoc uba mocgu amma sing dafiu meficgema habu yegoc mi kecmagec Yesu sufu sufuu yeneac mariu faiudeac kicfifi kefec.

<sup>7</sup> Kecma ic sogong yisya kpac nene, imocac hambannu ramamedaha kpeandae, uameme imoc hau

<sup>8</sup> Yesungo Peto nga Yohane yofi dema sueyuruec, “Nenang makekenggac ramamedaha nenideac ngeri kemma wiac mengereec.”

<sup>9</sup> Ifi deu kpesimioc, “Dahai mengerededeac negensinec?”

10 Deec merengyecmema yofi deec, “Ngeri kemma taonnu enecde, imohai ngic mong dokuenanga tofohoma hau ngeri yegoc ewacma modacma kemma ye ama monnu enu ngeri yegoc emma

11 ama mingina yofi edebesera, ‘Kpoukpoungo yofi kpesigende, amamana damohai medacfoc-nagoc makekenggac ramamedaha nenide?’

12 Ifi deec yeng ama witiau amamana mong kuneng edzacnguruude. Nga ihai wiac bic faifaia tadcacde, ngeri imohai iwai mengerebesera.”

13 Ifi deu yeri kemma Yesungo edeyuruec, imocac sirihau wiac meficgema makekenggac ramamedaha ohomengere anoc.

14 Anu yakanene naso hau Yesungo medacfora yenigoc yaka nebeso tacma

15 yofi edeyunuec, “Ni makekenggac ramamedaha yomoc ngenigoc nebesonga homac yombong anende. Amma imoc nemaguc kpendzennu embade.

16 Imoc yofiac, ni yaka yomoc monggoc mi nene kecbarengoc Anutuac eucererennu foraya fingerude.”

17 Ifi dema kpakenec mong mema Anutu dengerema yofi deec, “Ngeni yomoc mema ngenaoc emema negec.

18 Ni waing gbomeaac dokuya monggoc mi nene kecbarengoc Anutuac eucerereng haude.”

19 Ifi dema ic sogong mong mema Anutu dangge edema mendzicma yemmema yofi deec, “Yomoc fusina, imoc ngeneac amma faifaia. Ngeni neac negensima imoc negec.”

20 Yaka negec wisickeu ye kpakenec ifingoc

mema deec, “Kpakenec yomoc sacnaac dzadza-hac gboria, imoc ngenec amma kpetic kpet-inggea.

<sup>21-22</sup> Ngicac Medac ye Anutungo sing demiecfu kenudenoc nga ngic docfu fainuude, ye maria neac marinagoc yakatebou tacdape, ngic imoc ye ine sowehagoc.”

<sup>23</sup> Ifi deu medacfora yeni merang yeneac botucfunac faka imoc anude, ifi dema yenaocngoc kpesiemegec.

<sup>24</sup> Anu medac yeni yenang botucfunac merang engena kecde, imocac yoacngina engemmama anu

<sup>25</sup> Yesungo edeyunuec, “Bangec monnunac ngicngac Anutu mi negensinggeandae, yeni ngictaufocnginango ngicngac garengyunuma enac tofoc tofohofocngina meyunuandae. Ifi meyunuma ine yofi deandae, ‘Neni memeficngina kecdimbe.’ ”

<sup>26</sup> Ngeneng ine ifi mi ambisia. Mong ye engena ande, ye ngadea ambeso nga enarangina kecde, yeng tosofora yeneac kingangkpekpengina siricfu kecbeso.

<sup>27</sup> Imocac yofi kpesiduae, ngic merang engena ande? Ngic yaka eng tacma neude me yakau kingangkpekke ua mema kecde? Yaka eng tacma neude, ngeni yea negenggecde. Nga neng ine sifu ngenec botucfu kingangkpekke siricfu kecduae.

<sup>28</sup> Amma ni faitobang manau kecbareng ngeni mi wanuma nigoc kecgec.

<sup>29</sup> Mannango eucererenggac kuc neac mariu faiec, ifi isocngoc neng eucererenggac kuc ngenec mariu faibade.

<sup>30</sup> Faiba ngeni imocgoc kecma eucererennau yaka nga doku nema tacgecde. Amma ngeni ifingoc ngictautatac mema Israe kisic 12 yeneac fakangina isinggema desigecde.

<sup>31</sup> “Simong, Simong, negenna, Satang ye ngic yeneng wit seuha kpegec maudeac kpemindzaheandae, ifi isoc gombungaunac merengngunuu manganegecdeac bic arenggema derecgenendac.

<sup>32</sup> Nga Simong ge ine negen negensingga ukuna mi maudeac, neng geac amma nunumu ua bic medua. Amma ubaga meremma nearu monggoc dzigenema dacmunafocga meseriyunubesena.”

<sup>33</sup> Ifi deu Petorongo merenec, “Kebu, ni gegoc witicamau kembade amma homebadeac bic efaidua.”

<sup>34</sup> Ifi deu Yesungo edeec, “Petro, ni edeguba yaguc tofocnac yomohaingoc kokorec mi arohomanu geng neac sebiheina atac harebec anude.”

<sup>35</sup> Anu Yesungo yofi edeyunuec, “Ni warac suengunuba kenggec, imohai dzobirang me hie me hanitabe mi mekecgec ngeni wiac monggac kpedadanggec me?” Ifi deu yeneng degec, “Kpac.”

<sup>36</sup> Ifi degec Yesungo yofi deec, “Nga yaguc ine yofi deduae, Ngic mong ye dzobirangagoc me hieagoc kecde, yeng imoc mebeso. Amma wasaibeanga kpac kecde, ye ngakpitoaya sueu hiedzo kirecgeu imocngo wasaibeang bummebeso.

<sup>37</sup> Mitikibiu yoac oho ohoya fede, imocngo nearu fora fingeccbeso, imoc edengunuduae. Yofi, ‘Yeni yeac godzungic degec.’ *(Yesaia 53:12)*

Neac negemma yoac degec fede, imoc yaguc fora fingeदारुदे.”

<sup>38</sup> Ifi deu medac yeneng degec, “Kebu henna, neni wasaibeang yohockang mekecdimbe.” degec Yesungo deec, “Imoc soha.”

<sup>39</sup> Dema Yesungo faka angkefec isoc amma taong wama Oriwa tikiu kenu medacfora modacma kenggec.

<sup>40</sup> Kensikema yofi edeyunuec, “Ngeni faitobannu embauac numugec.”

<sup>41</sup> Ifi dema medacfora wayunuma kapianec kpesima kemma fafoc heima

<sup>42</sup> yofi dema numuec, “Manggac, ge negenna naric anu kpakenec yomoc nearunac meickena. Amma neac songo mi fingechedo, kpac. Geac songo nga negen negeng imocngo seribeso.”

<sup>43</sup> Ifi numumanu angero mongngo kurumenunac fingeemima mama meseriu

<sup>44</sup> Yesungo ine negengebirima seriangoc numuu sengerangango sac isoc amma bangecfu maec.

<sup>45</sup> Numuu wisickeu yacma medacfora yenearu dzigene kemma yenenu yeni ubahodung negemma gau fegec

<sup>46</sup> yofi edeyunuec, “Ngeni nocac gau fedae? Ngeni faitobannu embauac yacma numugec.”

<sup>47</sup> Yesungo yoac denammanungoc habutoa mong yearu hagec. Hama medac 12 yenearunac mong kpara Yuda, yeng waraiyemmema Yesu muduckeudeac yearu mewegeneu

<sup>48</sup> Yesungo deec, “Yuda, ge Ngicac Medac muduckema doc menec, ec.”

<sup>49</sup> Ifi deu ngic Yesu oronggema nanggec, yeneng faka mangana imoc fingecebesonga anu hemma kpesima degec, “Kebu, neni wasaibeango yununide me?”

<sup>50</sup> Nga yeneacunac mongngo womong garengtoa yeac wanacngic kpema kedzaha foiugeng herecgeec.

<sup>51</sup> Herecgeu Yesungo yofi deec, “Ngeni faka imoc wagec.” Ifi dema wanacngiac kedzaha kpeserema mengereec.

<sup>52</sup> Anu ngic Yesu mebesonga hagec, imoc womong gareng enara nga womonggac keracnatang enaramemengina amma yudangic enarafocngina yeneac yofi deec, “Ngeni godzungic meandae, ifi isoc wasaibeang nga gbarucnginagoc hadae.

<sup>53</sup> Ni Anutuac womonnu wenacsoc ngenigoc kecbareng ngeni sifu imohai mi menugec. Nga yaguc ine ngeneac naso anu kundunggac kucngo garenggac tatic mekecde.”

<sup>54</sup> Ifi anu yeni Yesu mema womong garengtoaac amau mekenggec Petoero ye ngadenginau hereaungoc modacyunuma kenec.

<sup>55</sup> Kenu ngic goa yeni amaac oda manau sobeng dzongiau gerec figec dzeu dzeunegemma tacgec Petoerongo yeneac botucfu mataru

<sup>56</sup> wanac naroang mongngo Petoero gerecfu taru kic fima hemma deec, “Ngc yomocngo yegoc kecande.”

<sup>57</sup> Ifi deu Petoerongo ine sebi heima deec, “Ngac, ge denec, ni ye mi negemmiduae.”

<sup>58</sup> Ifi deu naso mi hereemanu ngic mongngo Petoero hensima deec, “Ge ifingoc yeneacunac



mong.” Ifi deu Petorongo deec, “Nging, ge negennec ni kpac.”

<sup>59</sup> Nga aua mocgu isoc nammanu nging mongngo monggoc serima deec, “Fora yombong, nging yomoc ye gariraiangic, ye ifingoc yeac arenunoc kecande.”

<sup>60</sup> Ifi deu Petorongo ine merenec, “Nging negenna, ge denecmoc, imoc mi negentegecduae.” Dema yoac imoc mi desimanungoc kokorecngo arohoec.

<sup>61</sup> Arouhou Kebungo dzigenema Petoro henu Petoro ye Kebungo yeac yoac deec, imoc negensiec, “Kokorecngo tofocnac yomohaingoc mi arohomanu geng neac sebiheina atac harebec anude.”

<sup>62</sup> Imoc negemma Petorongo ngadeau kemema ubahodung kuneng mema kiac hodung kiarec.

<sup>63</sup> Nging Yesuac gareng kecgec, yeneng Yesu dedzomoc ammima kpema

<sup>64</sup> kiwa kporucngo biranggema degec, “Merang gudac, geng imocac kpefingyoac dena.”

<sup>65</sup> Ifi dema yeni faka hania hania ammima desusuic ammigec.

<sup>66</sup> Ama wereckenu yudangic enarafocngina, imoc womong gareng enara amma mitiac negen negengngic yenahafoc kpeturanggemagec Yesu yudangic yeneac tutumangtoau mekemma

<sup>67</sup> yofi degec, “Edenununa, ge Messia me?” Ifi degec yeng yofi merengyemmeec, “Edengunuba naric mi negensinggegede.

<sup>68</sup> Nga kpesi kpesi kpesingemmedeadeu turunga naric mi merenggede.

69 Nga yofinenggac nga namma enude Ngicac Medacngo Anutu Kuctoa minginaac foiaugeng tarude.”  
(*Mitiyegec 110:1*)

70 Ifi deu yeneng degec, “Ifi anu ge Anutuac Medac me?” Ifi degec, yeng merengyemmec, “Ni imocnoc, ngeneng ine imoc dedae.”\*

71 Ifi deu yeneng degec, “Yoacninaac boingicac monggoc mi obohodimbe. Ye imoc yengena enarango deu bic negending.”

## 23

1 Dema kpeturanggema tacdagec, yeni sasawa yacma Yesu mema Piratoaru mekemma

2 imohai yoacfu namma haniaya yofi degec, “Ngic yoc ye ngicngacfocnina yenearu singngina mesufuma takesi Sisa minideac kpetarinem-mema yengenaac ifi dekecede, ‘Ni Messia, ngictau mong.’”

3 Ifi degec Piratongo kpesimiec, “Ge yudangic yeneac ngictau me?” Ifi deu meremmiec, “Imocnoc geanggaoc denec.”

4 Anu Piratongo womong gareng enara nga habu yeneac deec, “Ngic yomocngo singyoac mong mi kpeec, ni kopocsiha hofocduae.”

5 Ifi deu yeneng ine serima degec, “Ye ngicngac kpouyemmema here miac miac Gariraiianac hanahema ayemme hakecma Yudaia bangecfu sokoma ihai wisickede.”

6 Ifi degec Piratongo imoc negemma kpesiyem-meec, “Ngic yomoc Gariraia ngic me?”

---

\* **22:70:** “Ni imocnoc” imoc Anutuac kpara mong. Ge “Yoac goaac dedekperagi.” henna. Hafac 1128.

<sup>7</sup> Amma ye Yesuac hania negemma Herodengo bangec garenggede, ye ihacnac, ifi negenec. Negemma Herodengo naso imohai Yerusarennu ifingoc kefecac Yesu sueu yearu kenec.

<sup>8</sup> Kenu Herodengo Yesuac siduc bic negenec. Ye Yesungo faka kuhagoc goa meu henudeac negengkefec. Ifi negemma naso herea Yesu hofockefecac amma Yesu yearu mekenggec ubangerec yombong negenec.

<sup>9</sup> Negemma Yesu kpesi kpesi homac kpesimiu yeng ine imocac turunga mong mi merenec.

<sup>10</sup> Nga womong gareng enara nga mitiac negen negengngic yeneng hama namma yeac hania seri-angoc yombong degec.

<sup>11</sup> Nga Herode nga wasai arengfora yeneng ye ngadehema dedzomoc ammima ngakpi mong kibiagoc heimigec kemeu Piratoaru monggoc suegec mekenggec.

<sup>12</sup> Herode nga Pirato yeri warac ngaba ngaba kefoc nga wenac imohaingoc ogo ogo anoc.

<sup>13</sup> Anu Piratongo womong gareng enara nga enarameme amma ngicngac kpacyunuu hadacgec

<sup>14</sup> yofi dema edeyunuec, “Ngcic imoc ye ngicngacfocnina herengina miacande, ifi dema mehadau. Nga neng ngeneac kicfu kpesimiba wiac negemma yoacfu faidae, imoc kpac anu kopocsiha hofocduae.

<sup>15</sup> Nga Herodengo ifingoc negemma eng merenu mema hadau. Ifi anu ngic yomocngo mangana mong mi memanu neng homecfu faibadeacsoc mi ande, ngeni imoc

negentegecbisia.

<sup>16</sup> Ifi anu ye memeting goa mima waba kenudeac negenduae.”

<sup>17</sup> Anu hombang nasou gawanango ngic mocgu witicamaunac yungecbeso, faka imoc feec.

<sup>18</sup> Imocac habutoa sasawa yeneng arohogec, “Ye meickema Baraba yungecnemmena.”

<sup>19</sup> Baraba ye warac taonnu ngicngac yeneac here miac miac faka amma ngic kpehomeec, imocac amma witicamau faigec.

<sup>20</sup> Nga Piratongo ine ngicngac yenearu monggoc serima deec nocac ye Yesu yungeru kenudeac negenec.

<sup>21</sup> Ifi deu yeni arohogec, “Ge mariponnu kpena homeu, mariponnu kpena homeu.”

<sup>22</sup> Arohogec naso harebec anu Piratongo deec, “Ngic yomoc ye noc kopocsic yombong meficgeec? Ni kopocsiha mong mi meficgema homecfu faibadeacsoc mi anduae. Ifi anu memeting mima waba kenudeac negenduae.”

<sup>23</sup> Ifi deu yeni mariponnu homeudeac serima seriangoc arohoma Piratoac yoac ferahema udu-mengtoa meficgema yeneng firang anggec.

<sup>24</sup> Ifi anggec Piratongo yeneac yoac negemma negengyemmema Yesu desiyemmec.

<sup>25</sup> Amma ngic ye here miac miac faka angkecma ngic kpehomeu witicamau faigec tarec, ye yungecgecdeac degec, imoc yungecyemmema Yesu ine maringinau faiu songongina modacgecdeac wayemmec.

<sup>26</sup> Wayemmu wasaingic yeneng Yesu mekemma henggec ngic mong Kirene taonnunac,

kpara Simong, ye semeng uaunac hau sinnu mefigema yeng Yesuac maripong tofohoudeac ngombonggegec tofohoma Yesu modarec.

<sup>27</sup> Nga ngicngac habu kunengngo modagec, yeneac botucfu ngac homac yeneng yeac dekiac amma ubamangang kuneng anggec.

<sup>28</sup> Ifi anggec Yesungo dzigenema edeyunuec, “Yerusarennac ngacnaroang, ngeni neac mi ki-acgec. Ngeni ngenang nga nambaracfocongina, yeneac amma ine kiacbisia.

<sup>29</sup> Naso mong haude, imohai ngicngac yeneng yofi degecde, ‘Ngac kufing nga sabac mi megec amma namu mi gumecyunugec, yeni kenecngi-nagoc.’

<sup>30</sup> Naso imohai ngicngac yeneng tikiac degecde, ‘Tiki ge witininau mama ferandzinununa.’ Nga faganggac yofi degecde, ‘Fagang ge tohoma kper-acnununa.’ *(Hosea 10:8)*

<sup>31</sup> Yeni ic sabayagoc nande, imohai faka ifia andaeu ic bic ururuedacfu, imoc memanganey-ombonggegecde.”

<sup>32</sup> Anu yarengic yohockang yeri Yesugoc yurugecdeac ifingoc meyuru kemma

<sup>33</sup> bangec buma mong kpara Hatasic degec, imohai kensikema Yesu mariponnu kpegec amma yarengic mong foiugeng nga mong kanaugeng, ifi yurugec.

<sup>34</sup> Yunugec Yesungo deec, “Manggac, yeni ua medae, imoc mi negentegecma andaeac kopoc-sicngina wana.” Nga yeneng wambaya kpeing kpema mederegec.

<sup>35</sup> Ngicngac yeni wiac fingerec, imoc ifi hennammagec yudangic enarafocnginagoc yeneng ifingoc desusuic ammigec, “Ye Messia, Anutuac meisingmedaha andeu yeng ngicngac goa ongongyunuec, ifi isoc yengena ifingoc onggongemeu.”

<sup>36</sup> Nga wasaingic yeneng ifingoc defagoc ammima yeac wegenacfu hama waing aengagoc yearu sinemima

<sup>37</sup> degec, “Ge yudangic yeneac ngictau kecnecfu geangga onggongemena.”

<sup>38</sup> Nga oruha witiau yoac yofi oho ohoya nanec, “Yomoc yudangic yeneac ngictau.”

<sup>39</sup> Anu yarengic yohockang yerearunac mong nanec, yeng Yesu desusuic ammima deec, “Ge Messia annecfu geangga onggongemema neri ifingoc onggonnuruna.”

<sup>40</sup> Ifi deu ogeango kpetarimima deec, “Ge ifingoc yoacfu firang mi andang amma Anutuac kengecguu ngereebac.

<sup>41</sup> Nerang kopocsicniraac turunga faka dindin-gacfu ifi anecmedae nga ngic yomoc ye ine kopocsic mong mi meficgeec.”

<sup>42</sup> Ifi dema Yesuac deec, “Yesu, ge eucerereng-gau kensikema ngictau tatac mema ni negensin-ubesena.”

<sup>43</sup> Ifi deu Yesungo yofi edeec, “Foracngoc, yagucngoc nigoc eucererennu kecdede, imoc edegduae.”

<sup>44</sup> Anu wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec.

<sup>45</sup> Nga wenackiwa kundung kpeec, naso imohaingoc Anutuac womonnu kpoructoa womongmana kpetiac yombong naguyau nanec, imoc tohou yohockang anec.

<sup>46</sup> Nga Yesungo ubaudumeng kunengngoc kpacma deec,

“Manggac, ongaasuna marigau faiduae.” *(Mitiyegec 31:5)*

Ifi deu asuya ereec.

<sup>47</sup> Anu wasai garengngo imoc hemma Anutu eweheimima deec, “Ngic yomoc ye kopocsiha kpac, imoc fora.”

<sup>48</sup> Nga ngicngac sasawa yeni faka fingerec, imoc hennegeng ambesonga hagec, yeneng faka imoc fingeru hemma mokucnginau kpema kiacma amanginau kenggec.

<sup>49</sup> Nga Yesuac arengfora sasawa nga ngac goa Yesu modacma Gariraianac hagec, yeni ine hama hereau namma faka fingerec, imoc henggec.

<sup>50-51</sup> Ngic mong kefec kpara Yosefe, ye Yudaia bangecfu Arimataia taonnunac. Amma ye yudangic yeneac tutumangtoaac memba kefec. Ye ngic yumea nga fakaya dindigac amma Anutuac eucererenggac tomai kefec. Nga yeac ogoforango yoc degec nga faka anggec, yeng imocac negenu mi ngereec.

<sup>52</sup> Ifi anu yeng Piratoaru kemma Yesuac fareng meudeac kpesimiec.

<sup>53</sup> Kpesiu negemmiu ye Yesuac fareng mesima linengkporuc imocngo tembonggema mekemma

kicsere mong gboria, imohai faiec.\* Kicsere imoc gboria amma hoc sirango mengec mengerea nga ngic mong imohai mi tonggo tonggoya.

<sup>54</sup> Anu wenac imoc sabataac efac kpefac naso anu sabata naso hanahebeso anec.

<sup>55</sup> Nga Gariraia bangecfunac ngac goa Yesu modacgec, yeneng Yosefe modacma kicsereu kemma Yesuac fareng faigec, imoc hennegeng amma

<sup>56</sup> monggoc dzigenema amanginau kemma fareng imocac kerecdoku homuna gombunga memengere amma sabatanasoac singyoac fede, imoc modacma tomai kecma tacnegengec.

## 24

<sup>1</sup> Sonda gboria hanahema asoac ama negemma ngac yeni kerecdoku homuna gombunga memen-gere anggec, imoc mema kicsereu kenggec.

<sup>2</sup> Kemma henggec hoctoa kicsere sing hedzic hedzickeamoc, imoc bic kpedic kpedidinggea feu kicsere naguya eng nanec.

<sup>3</sup> Nanu ngac yeni kicsere manau emma Kebu Yesuac farenga ine mi meficgegec.

<sup>4</sup> Amma yeni noc wiac fingeacdac dema obo-homa nammagec imohaingoc ngic yohockang ngakpingira kongac koporarac yombong, yereng hama kicnginau fingeacma nanoc.

<sup>5</sup> Nanec ngac yeni kengec amma ngonducnema nammagec ngic yohockang yereng yofi edeyun-uoc, "Ngeni ngic gboridac kecede, ye nocac kicsereu hofocdae?"

---

\* **23:53:** Lineng imoc kpingding mong ambiac ogea, imocngo wamba megec.



<sup>6</sup> Yenoc Anutungo homecfunac bic megboriu yacma yei mi kecde. Amma yeng Gariraia kec-mangoc yoac edengunuec, imoc negensibisia.

<sup>7</sup> 'Ngicac Medac ye kopocsicmeme yeneac mariu faigec, yeneng mema mariponnu kpegec home-ude.' imoc fingerudeac deec, 'Nga uameme hare-bec ammanu monggoc gborima yarude.' "

<sup>8</sup> Ifi deu ngac yeni yeng yoac bic deec, imoc negensigec.

<sup>9</sup> Negensima kicsereunac monggoc dzigene kemma medac 11 nga tosofocngina faka sasawa fingerec, imoc edeyunudacgec.

<sup>10</sup> Ngac kenggec, yeneac kpacngina Maria Madara nga Yohana amma Maria Yakobo nonggea nga ngac goa yenahafoc kenggec, yeneng siduc imocngoc aposoro edeyunugec.

<sup>11</sup> Nga ngac yeneng yoac imoc edeyunugec, imocac medac yeneng negenggec sicsauc anu yoacngina mi negensingegec.

<sup>12</sup> Nga Petorongo ine yacma nedzima kicsereu kenec. Kemma kicsereu okarima henu kporuc-susu tembonggegec imocngosac tarec. Ye imoc hemma negenu wiac engena anu monggoc dzigene kenec.

<sup>13</sup> Anu wenacnaso imohaingoc ngic yohockang Yesu modacandape, yereng ama mong kpara Emausi, imohai kembesonga kenoc. Bangec imoc Yerusarenggac hereau 11 kiromita, imocfi tarec.

<sup>14</sup> Nga yeri faka sasawa fingerec, imocac dene-geng amma kenoc.

<sup>15</sup> Yeri yoac imocac denegeng amma negen negeng ua mema kemmaec Yesu yengenaoc ngaden-

girau kemma meficyuruu yerigoc kenggec.

<sup>16</sup> Amma yeri kic mesufuu ayecmeu mi hensioc.

<sup>17</sup> Ifi anu Yesungo yofi kpesiyemerec, “Ngeri sinnu noc wiacac ngeraocngoc denegeng andape?” Ifi deu yeri ubahodung siric amma waickema nanoc.

<sup>18</sup> Namma mong kpara Kereopa, yeng kpesimiec, “Ge kuricngic mocgungosac Yerusarennu kecmina sonda yomocac manau ihai faka finge-dac, imoc mi negendang me?”

<sup>19</sup> Ifi deu yeng deec, “Noc faka finge-dac?” Ifi deu yereng edeoc, “Yesu Nadzaretenc yearu faka fingerec. Ye profete mong amma Anutu nga ngic yeneac kicfu yoc deec nga faka sasawa meec, imoc kuhagoc yombong anec.

<sup>20</sup> Nga womong gareng enara nga israengic enarafocnina, yeneng ye homeudeac dema gamang yeneac mariu faigec yeneng mariponnu kpegec homeec.

<sup>21</sup> Nga neni yofi negensinggeing, yennoc israengicngac mesinunuude. Faka fingerec, imocac uameme yaguc harebec ande.

<sup>22-23</sup> Anu ngac goa neneac habuunac, yeni yaguc asoac yombong kicsereu kemma farenga hofocdau. Hofocma dzigenema hama yofi edenunuda, ‘Angero yereng ongau finge-cnemmemma yofi deec, “Yesu ye bic gboridac kecde.” ifi dedau.’ Ifi degec kpidohoding.

<sup>24</sup> Amma nenearunac ngic goango kicsereu kemma ngac yeneng dedau, ifi isoc yombong meficgedau nga yengena ine mi hendau.”

<sup>25</sup> Ifi deu Yesungo yofi edeyuruec, “Ngeni nengen negengngina kpac nga wosongina nomana

yombong. Profete yeneng bicngoc yoac sasawa degec, imoc bic mi negensinggedae.

<sup>26</sup> Imoc yofi fingerudeac degec, ‘Messia ye kpendzeng kpekefu wisickeuguc kibikperagia-toaac ameau naric enude.’ ”

<sup>27</sup> Yengena siduc imoc mitikibiu oho ohoya fedacde, imoc Moseac kibiunac hanahema kengkecma profete sasawa yeneng yeac siduc ohogec, ye imocac hania deireckeyemerec.

<sup>28</sup> Anu yeri ama kembesonga kenoc, imoc mewegenema Yesungo ferecgema kembeso siric isoc anu

<sup>29</sup> yereng kpetarimima deoc, “Ama marai anu kundung kpebeso andeac ge nerigoc kenni.” Ifi deec yerigoc amau emma tacgec.

<sup>30</sup> Yesungo yerigoc tacma yaka nebesonga ic sogong mema kenecyoac dema mendzicma yemerec.

<sup>31</sup> Yemeru kicngira tegeru Yesu hensimaec yeng imohaingoc aockeu

<sup>32</sup> yeraocngoc denegeng amma deoc, “Yeng sinnu mitikibiac hania edekpou anecmema deireckenemeru herenirango yacyombonggedac, imoc fora yombong.”

<sup>33</sup> Nga yeri imohaingoc yacma dzigenema monggoc Yerusarennu kemma medacfora 11 ogofocnginagoc kpeturanggema tacmagec meficyunuoc.

<sup>34</sup> Meficyunuec yeneng edeyuruma yofi degec, “Kebungo fora homecfunac gborima yacdac, ye Simong bic fingecmidac.”

<sup>35</sup> Ifi degec yereng sinnu yerearu faka fingerec nga Yesungo ic sogong mendziru hensioc, imocac

siduc andaroc.

<sup>36</sup> Siduc ifi andarec yeni yoac imoc negemma tacmagec Yesu yengenaoc botucnginau namma deec, “Ruae ngenearu febeso.”

<sup>37</sup> Ifi deu yeni kpidohoma kengec amma negensigec, “Wosonga hendimbe.”

<sup>38</sup> Ifi negensigec yeng yofi deec, “Ngeni nocac kpidohoma negengyohoc andae?”

<sup>39</sup> Imoc ni neanaoc, ngeni hanimarina henggec. Wosonga yeni sicfusingina kpac. Ngeni imocac hama kpeserenuma nenggec.”

<sup>40</sup> Ifi dema hanimaria edzacyunuu

<sup>41</sup> yeni kerectegec amma ubangerectoa negemma sifu mi negensingegec yeng yofi kpesiyemmeec, “Ngeni yaka mong faigec tacde me?”

<sup>42-43</sup> Ifi deu yeni kondungyang dzedzea noboha migec mema kicnginau neec.

<sup>44</sup> Nema yofi edeyunuec, “Ni ngenigoc kefai, imohai yofi bic edengunuai, wiac sasawa neac negemma Moseac dedeseriyoacfu nga profete yeneac kibi u amma Mitiyegecfu oho ohoya fede, imoc sasawa fora fingecheso.”

<sup>45</sup> Ifi dema ye imohaingoc negen negengngina meireckeyemmeu yeni mitikibi ac yoac negentegecgec

<sup>46</sup> yofi torokpema deec, “Imocac amma yofinoc oho ohoya fede, Messiango kpendzeng kpema homema uameme harebecfu monggoc gborima yarude.

<sup>47</sup> Yaru ngicngac yeni yeac kpacfu ubamereng nga kopocsic wawaac sing imoc Yerusareng taon-

nusing hanahema bangeha bangeha ngicngac sawa yenearu yoc dekperagigec kenude.

<sup>48</sup> Faka yomocnoc kicnginau fingeacdacmoc imoc dekperagibisia.

<sup>49</sup> Nga Mannango wiac ngenmeudeac deec, neng imoc suengemmeba mebisia. Negenggec, ngeni taong yomohai tacma imoc mi wabisia kecma wihacnac kuc heingemmebade. Ngeni kuc imoc memaguc naric kengha ambisia.”

<sup>50</sup> Anu Yesungo waraiyemmeu taong wama ngadeau Betania amabangec, imohai kemma maria miacma kenecyunumanu

<sup>51</sup> Anutungo meu wayunuma kurumennu enec.

<sup>52</sup> Enu yeni afehema songo kuneng meficgema Yerusarennu monggoc dzigenema kenggec.

<sup>53</sup> Nga yeni nasosoc womonnu kecma Anutu ubangerec edekegec.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

19b7c48c-f4ce-5007-838d-58f01dc01ecc